



4

ДАРГАН
МЕЗ

Девла цахІнабик Аслу ва ахир

неш
узи
унц

ла

неш

ли
ла
лис

Приставка

че

батес
буцес
бихъес
бухъес

Приставкаби

ка
са
у
а
чеб

батес

Суффикс

арши
арцІи
мура
дуки

кьяна

Суффиксун

буц

ес
ни
иб

Гъайла бутІнала разбор бируси тяхІяр

Существительное

Хасси ва тІинтІси

Адам, НасихІят
адам насихІат

Цалихъ – дахълихъ лугІи

унц – унци
парта – партаби
чяка – чякни
дубура – дубурти
ши – шими

Падежуни:

Уйхъу п.
Актив п.
Хас П.
Лугу п.
Барх п.
Гъалаб. п.
Сабаб п.
Гъам. п.
Паргъ. п.
БяхІч. п.
ДекІар.п.

узи

ни
ла
с
чил
чила
чибли
чи
чиб
чибяхІ
чибад

Существительное ла жинс

вяхІ гъавкъя
ряхІ гъаркъя
бяхІ гъабкъя

Местоимение бала бяхІ

I б. – ну – нуша
II б. – хІу – хІуша
III б. – ит – итди

Прилагательное

Прилагательное ла лугІи

ЦІакъси – цІакъти
итил – итдилти
халал – халати

Прилагательное ла жинс

вабза вялхъя
рабза рялхъя
бабза бялхъя

Таманти ва таманахІенти прилагательное би

бугІяр – бугІярси
мурхъ – мурхъси (л)
ахІер – ахІерси (л)

А07

МЗ

ГІЯХІМАДОВ И.ГІ., СУЛЕЙМАНОВ ГІ.ГІ.

(дні сессіи
школ)

ДАРГАН МЕЗ

ГРАММАТИКА (ЛУКІНІ)

АВЪИВИЛ КЛАССЛИС ЖУЗ

Дагъистан Республикала багъудила Министерствили
къабулбарибси саби

МЯХІЯЧКЪАЛА

ООО «ЛОТОС»

2007

МЗ
1007

83.3 (2-Дарг)

С – 89

Ахмедов И.О., Сулейманов А.А.,

Даргинский язык для 4 кл. – Махачкала: ООО «Лотос», 2007. – 144 с.

Дарган мез 4 кл. ГіяжІмадов И.ГІ., Сулейманов ГІ.ГІ.

ДЕЛЧІУНТИ ТИКРАРДАРНИ

ТІАМРИ ВА ХІУРПРИ. БИРКІАН.

ХІянчи 1. Чумал предложениеличилси хабар пикрибарая ва белкІеная. Илала бекІ мурадличила бурая. БелчІудила дус хІушала школализиб секъяйда бехІбирхјули бирарал, бурая. ХІушани белкІунсилазир абхъибти хІурпри даргая ва, уди тугъаили, декІардарая.

Ируси гъайлизибси дев цахІнабикибси саби тІамразибад. ЛукІуси гъайлизибси дев цахІнабикибси саби хІурпризабад.

Девлизирти хІурпралара тІамралара лугІи цагъуна хІебиэс асубирар, сенахІенну цацадехІти хІурпрани кІикІел тІама иргъахъу.

ХІянчи 2. Текст чеббелкІеная. ЦІударли декІардарибти дугъбазир чум тІама ва чум хІярп лерал, бурая.

Дунъя – инса тавхана, –
Марли, гІяхІси мер саби,
ГІяхІлас хІядурбарибси
ЛигІматла анкъи саби. (Х.Ю.)

ХІебра янира жалдыхъибси дусла замана бакІиб. (Р.ГІ.) Юлдашдеш детахъили хІейгалли, чеблалис арц дедлугад. (Х.Д.)

– Елка баршес дигулла, –
БикІули саб шан дурхІни,
ГъамдикІухІели чучи
Сагаси дусла бурхІни. (С.Р.)

Суалти.

1. Чум хІярп лера даргала алфавитлизир?
2. Илдазирад абхъибти чум сари?
3. КъяпІти чум сари?
4. Абхъибталара къяпІталара ургаб сегъуна декІардеш леба?
5. КІирка хІярп чум лера?

ХІянчи 3. Пѣргъити дугъбазирти хІурпри алфавитла гъаб-гѣргъидешличил делкІеная (ца хІярп кІина яра имцІали къаршибиркули биалли, ил, гъачамцун белкІи, батирая).

Къалабаси, буцІарси, къакъадеш, хъирхъа, цІедеш, хъанцІа, тІутІударес, пІягъи, хІябцІали, гІяргІя, юргъа.

ХІянчи 4. КІиркІа хІурпри, гъарил сагаси тугълизи лукІули, делкІеная ва гъариллис, тугъ бицІайчи, дугъби пикридарая ва делкІеная.

ХІянчи 5. Пѣргъити предложениеби тетрадунази делкІеная. Дугъбазир кІирка хІурпри даргая ва, уди тугъаили, декІардарая.

1. Сецад къайгънаиркъули хъалли, балкІдеш дигІянбарес хІейрар.

2. ВегІличи вегІ вирхни – черяхІтї бехІбихъудунала цаибси чараагарси шартІ саби.

3. БегІлара дигеси – хІела бархъдешцун бурести гъалмагъуни биахъни саби.

4. Юлдашла някъбаницун дурайсу уркІилизи атІунти занзби.

5. ЧІянкІли – гІибкъси, къабулси хІянчилицун – луга уркІилис паргъатдеш.

ХІянчи 6. Назмулизир цІударли чедаахъибти дугъбазирти абхъибти ва къяпІти (абхъибти ца тахтализи, къяпІти – цархІиллизи) хІурпри черделкІеная.

Ванза! Дила уркІира
КьутІбикІули саб хІези.
КьутІикІули вакІира –
ГІяхІял сайхІели марси.

ХІела лезми сайра ну,
ХІед кьадин гъайикІуси,
ХІела кьацІра шинраван.
Халкъ уржили дигуси.

ХІ. Кьурбанов.

ХІянчи 7. Удиб гибси назму саркъахъили белчІеная. ЦІударли чедаахъибти дугъбани сегъуна суайс жаваб лугулил бурая.

Россия

Агъ, Россия, Россия,
Дила чебяхІси улка,
Дила ВатІанна кьакъбяхъ,
Дила дуклумар улка.

Чулахъбиубри чуйна,
Бикили душмантази,
ГІелабикири чуйна
ХІу кахти ГІязабтази...

Дила дурхъал Россия,
Дила ВатІанна уркІи,
Дила талихІла хъарихъ,
Калаби хІу хІулкІули.

А. ГІябдулманапова.

ХІянчи 8. ЦІударли чедаахъибти дугъби биркІантаци дуртІули, текст чеббелкІеная.

1. ГІяхІси адам вебкІалли, зубрира дархли дисур.
2. Дявти – кърциндеш, гьалмагъдеш – эркиндеш.
3. АцІес дигули виадли, кацІесра мер хІядурбара.
4. Лезми гІеркърбаалли, гІякълу кърантибирар.
5. БелчІуди агарси адам ар агарси бардагъуна сай.
6. Къркърла кърмурлаб кърцІ берубси бирар.
7. Мургъила вегІ кърцІла вегІличи вашар.

ХІянчи 9. ГІергъити предложениебазир чи? се? ибти суалтас жаваб лугути дугъби декІардарая, илди тетрадунази делкІеная.

1. Дураб аргъ тІякърбикІулри, хърливад гІяйни ну хІерикІулри. (Р.А.)

2. Тарлай хІулби кърпІдариб, сай хІулбас гьалав дудеш. Дудешла тІама аргъиб: «Илдив хІела гърбаздеш?!» (Г.-Б.Б.)

3. Амма дила децІ, гъира, талихІ, бахърли хІергърси, ахІерси поэзия, хІечил саби бархбаси. (А.ГІ.)

4. Бац шалал дугилизив ну хъралчличи айцІулра, ун-рала шятІахъила аги бакърс карцІлира. (А.Гър.)

5. РиштІаси рурси хІерейс урхър-дубла ракІилри. Шадти тІамрачил сунес чайка гърнибаилри. (Р.Р.)

6. Халумчакар гьалар дебали мухІли бурдибси адам рирусири. Шилизиб илини чила-биалра хатир кахІе-лахърниси бархІи рахлира арбашуси ахІенри. (А.Кър.)

7. Нуни ярагърлис кърдин кадирхъира дукІ-дураз, мургър-арцла мерличи – барда, гІябли, къркър ва рас. (М.ХІ.)

ХІянчи 10. Ца, кІел, хІябал ва авал биркІайзирад цаладикибти кІикІел дев пикридарая ва делкІеная.

ХІянчи 11. ГІергъити предложениебазирти дугъбазирад гъала-
гъала кІирка хІурпри делкІеная, кІинайс – кІел тІамализирад дета-
урти абхъибти хІурпри.

1. Арши сари дургъули тІяхІуси цІуэрлизир, мургъи-
ван лямцІидикІули савлила берхІилиур. (Ахъ. Ахъ.)

2. ДягІи дисули дебшиб, хІеб садаиб юргъали,
хъубяхІрумала байрам бехІбихъахъес къугъали. (Ю.Х.)

3. Дила някъбазиб къялкъя зайкабухъун разили,
мурити маркаличи хупІбашули бизили. (Ан.Ад.)

4. ИлхІели неш чІакара шурмачиб дакІубухъун,
дурхІни дерцахъес или, мялгІунничи чІяпІбухъун. (С.Р.)

5. Дубурла бяхІяназирад вацІурбазир дягІли
къячІардикІахъути галгубала вайти бисалагъунти тІамри
дашулри. (ГІ.А.)

ХІянчи 12. Сегъунти хІурпри лера чІянкІли урус мезлизирад
гІерасибти дугъбазирцун къаршидиркути? Илдачил 5-6 дев пикри-
дарая ва делкІеная.

ХІянчи 13. ДуцІрумлизир хІуша чина дашули калунрая? Шила
мякълаб вацІа лебу? Илар сегъунти галгуби лера? ДуцІрумличила ва
хІушани чедаибтачила биштІаси хабар белкІеная.

ХІянчи 14. Урдатурти хІурпри кадалтули, предложениеби
черделкІеная.

1. Къяш агарли ду...би...ан, къак агарли къа...
би...ан.

2. ВецІну кІи...а узи леб, цалис гІер...и ца ду...ли,
гІеб...азс хІебирули.

3. ТІаби...ятлис пІя...иби хІейга...у.

4. Игъубси къар...аван, пикри...ебарили бурибси девра ча...барес хІе...рар.

5. Барсур хІу...мат хІеби...ули...ергъи, се...унтилла гъал...агъдеш ди...с хІе...ирар.

ДЕВ

Девла цахІнабик

(ІІІ класслизир делчІунти тикрардарни)

ХІянчи 15. Се саби приставка? Девличил ил секъяйда лукІа? Дура чумал мисал.

ХІячи или селис бикІара? ХІячира абзурси девра цугтили диэс дирару? Чумал мисал пикридара ва делкІен.

Ишди гІергъити предложениебазир тухумти дугъби дарга ва делкІен. Илдазиб хІячи чебаахъа.

Гъалмагъдешличибра дурхъаси бархбас лебси ахІен! Дудешлис сунела дурхІя дигахъу, дурхІялис дудешра нешра дигахъу. Илцун баибси ахІен, узби: жаниварлис-ра сунела дурхІя дигахъу, амма хІиличил ахІи, уркІи-уркІилавад чІянкІли ца адамличилцун виар гъалмагъ-икес. (Н.В.Гоголь)

Гъалмагъдеш – гІямрулизир бегІлара чараагарти секІал сари, сенахІенну сунела сецад-дигара давлуми лерли хъалли, юлдашуни агарли хІериэс чисалра хІейгахъу. (Аристотель)

Гъалмагъдешличиб гІяхІси ва дигеси секІал дунъяли-чиб лебси ахІен. (Цицерон)

БегІлара къиянси – вегІла гъалмагъунала хІурмат сархни бирар. (Э.Къапиев)

ХІянчи 16. Суффикс се саби? Девлизиб ил чинаб башара? Чумал мисал дура.

Удирти дугъбачи -си, -ала, -чи, -деш суффиксуни имцІадарили, сагати дугъби детаахъая ва делкІеная.

Узи, шин, гІяхІ, бажарди, илхъи, вяш, къркър, диркъ.

ХІянчи 17. Ахир или селис бикІара? Чинаб башара ил девлизиб? Мисалти дура. Пѣргъиси белкІлизир цІударли чедаахъибти дугъбазир ахирти даргая ва, уди тугъаили, декІардарая.

Нушала шила мякълаб вацІа леб. ВацІала цІедеш ди-кърли сари. ВацІалис нушани къараулдеш дирулра, сенахІенну вацІализирти галгуби дяхъес адапти мур-талра музабулхъули саби. ВацІурби мяхІкамдирес нушала чебла саби. Вайнукъябази вацІализирти жаниварти кахІедушахъес къайгъибирулра нушани. ВацІали нушази сунела дигІяндешуни дуру. ВацІаличилси нушала бархбас даимлис бихІехІе.

ХІянчи 18. КІунтІрала мерла гІягІнити девла бутІни имцІадйрули, чеббелкІеная.

1. Гъанагарси балагъ... кърургъ...уржиб...низам буун. (С.М.) 2. Салам, хъярхъти бурям..., урхъначи... духъ...ти, хІушала шайчирадли агив гІяхІ... хабурти?! (А.ХІ.) 3. ГІяхІлад ракІиб...

Раисат... хала нешла хъулирти лерил секІал хІясибдариб. (ГІ.Къ)

ХІянчи 19. Таблица хІербарая ва девла аслу мягІна чиди бутІализиб бирарал, бурая.

Узидешла	—	узи	деш	ла
Гъалабуцнила	гъала	буц	ни	ла

ХІянчи 20. Чум даладая хІушани бекІ член? Илди дурая. Пергъиси текст чеббелкІеная. Сунезир бекІ членти даргая ва, гІягІниси тугъиули, декІардарая.

1. Цали ханжал исули сай ВатІан багъандан, цали ханжал багъандан бирцули сай ВатІан. (М.ГІ.)

2. Урхъула дяхІимцІала бамкъахъур варачай, дягІла бугъа бевличил дуцІбухъун закибяхІли. (А.ГІ.)

3. Унра-хунрала ургаб нешли кагъар бучІулри. (Р.Р.)

4. Сирисли, дубсиливан, ванза-неш кІапІбарайчи, ну, хІеркІличи къачаван, дуцІикІира низбачи. (А.Гъ.)

5. Дудешли айкъурри хІу, ярагъ мякъла кархъули, нешли лайла белчІун хІед, ВатІан дигахъен или. (Х.д.)

ХІянчи 21. ЧеббелкІеная, подлежащее декІарбарая ва, ил сели аргъахъилил, чебаахъая.

сущ.

ГІибрат: Галгубала кІари духъутІдиуб. 1) Гъачам улкъайла гъала кайили, нуни жуз бучІулри. 2) Анхълизир дучІути арцантала макъамти чедихулри. 3) Чилирил унза гъаргдариб. 4) Нуни ласяхъили хІеръира. 5) Бай хъулив Паша тІашлири. 6) УркІи къалабали тимхъбухъун. 7) Иллини някъби кисала датаиб. 8) Ну, тамашаиубли, хІерлири. 9) Рахли ил набчи гъамиуб.

(М.СягІидовла хІясибли).

ХІянчи 22. ЧеббелкІеная, подлежащеебира сказуемоебира декІардарая, ва илди сели аргъахъилил, чедаахъая.

ГІибрат: Дубурла мер-мусаличбси ^{сущ.} гъава ^{глагол.} умуси
бирар.

1) Къарала хъунул нуни чераибси ахІенри. 2) Илини сунела мурулла халаси хІурмат бири. 3) Къара пергер адам сай. 4) Ил цунси сай. 5) Къара дебали вабза сай. 6) Амма илала ахъдеш камсири. 8) Гъачам Къарала дудешличи сирагъан гІяхІял вакІили сай. 9) Къарала дудешли ил замана акІубси сунела дурхІялис Сирагъан ибси у бихъили сай.

XI. ГІялиевла хІясибли.

ХІянчи 23. КІунтІрала мерличи объект имцІабирули, чеббелкІеная.

ГІибрат: Нешли наб... асиб. Нешли наб хІева асиб.

1) Ил хабарли Хартумличи халаси ... бариб. (М-д.Р.)

2) Къяшмала удиб гъурчІъили бучІуси дяхІиличи лехІризурси Раисатли нешла рузила ... иргъусигъуна ахІенри. (ГІ.Къ.)

4) Хъямики ... буциб Тарлай итил някълизи. (Г.-Б.Б.)

ГЪАЙЛА БУТІНИ СУЩЕСТВИТЕЛЬНОЕ

ХІушани сегъунти гъайла бутІни даладая?

ХІянчи 24. Пергъиси план хІясибли существительноеличила бурая.

1. Се саби существительное?

2. Илини се иргъахъули?
3. Сегъунти суалтас жаваб луга?
4. Существительноеби сегъуна жинслизир дашара?
5. Илди секъяйда дарсдикІара?

ХІянчи 25. Пергъиси белкІелизир существительноеби даргая. Илдала жинс, лугІи белгидарая.

Даг машиналичир азбарла гъум хиб. Гъумла бекІа-алав дурхІни цахІнабикилри. Илар дахъал тІама-гъамари. Ца уршили гъумлизирад сунес хъулри ди-рулри. ГІяхІхІедизалри, итсегІят дулъулри. КІинайс вехІирхъулри, кІялгІни тІашдалтас или, илди-алав тІутІила унхъри удалтас или. ДурхІяли кІялгІнала куц лѣбкъяхъулри, илдас алав бару бирулри. Илини къапу гъаргли датур, чучи мурталра гІяхІли башахъес.

Р. Рашидовла хІясибли

Существительное гъайла бутІа саби, суненира секІал иргъахъуси ва **чи? се? чини? сели? чис? селис?** ва цархІилти суалтала цалис жаваб лугуси.

Масала: *дурхІя, рурси, хІяйван.*

Существительноеби дирар хаста ва тІинтІти: *ГІяли, ХъябцІа, Каспи урхъу, хя, урчи, ута, Зенала дубура.*

Существительноеби дирар мурул жинсла, хъунул жинсла, урга жинсла: *ХІялима, Хадижат, МяхІяммад, узикъар, рузикъар, къача, унц, мура.*

Существительноеби дарсдикІар лугІи хІясибли (шагъар – шагъурти, майдан – майдунти, адам адамти) ва падежуни хІясибли (шагъар, шагъарли, шагъарла, шагъарлис; далай, далайли, далайла).

СУЩЕСТВИТЕЛЬНОЕЛА ЖИНС СЕКЪЯЙДА ДЕКІАРБАРЕС ВИРАРА?

ХІянчи 26. Пѣргъити существительноеби хІябал къанилизи делкѣная: цаибиллизи – мурул жинсла, кІиибиллизи – хъунул жинсла, хІябъибиллизи – урга жинсла.

Урчи, мукъара, ухъна, рузи, рухъна, хала неш, хала дудеш, узикъар, урши, рурси, мукеки, къяца, эмхІе, вархкъя, ралликъяна, къуръан, къалам, ГІямарович, ГІялиевна, Запир, гурда, гІяра, мукъара, ХІясан, Рази-ят, рузикъар, кІуркІур, кІуцІул, вяхІ, варг, вай, регІ, рай, хъунул.

Мурул жинслизи кадурхути сари:

1) Лебилра мурул адамтала хасти уми, фамилияби, отчествоби. М а с а л а: Къадир, Расул, НухІкъади, ГІялиевич, Шамилов, Ванатов ва ц.

2) Чузиб мурул жинсла гІяламат в лебти яра ил кабикибти (агарті) мурул адамличи хасті тІинтІти существительноеби. М а с а л а: мурул, регІ, валликъяна, узи ва ц.

3) Мурул адамла къаркъа декІар-декІарти биркІантала уми. М а с а л а: вай, варг, вяхІ ва ц.

Хъунул жинслизи кадурхути сари:

1) Хъунул адамтала хасті уми, фамилияби ва отчествоби. М а с а л а: Хамис, ГІяйша, Къурбановна, ГІисаевна ва ц.

2) ЦацадехІ хъунул жинсла гІялймат р лебти яра ил агарті хъунул адамличи хасті тІинтІти существительноеби. М а с а л а: рухъна, рархкъя, рай, регІ, хъунул, рузикъар ва ц.

Урга жинслизи кадурхути сари:

Мурул, хьунул жинсла ахленти существителъноеби.
Масала: кьаркъала, къацI, хъали, дубура, улкъай,
хIенкъ, урчи ва ц.

ХIянчи 27. БелчIеная. ДекIардарибти существителъноеби чидил
жинсла сарил, бурая.

– ВелхIунрив, виштIал узи!
– РелхIунрив, рузи, хIура!
– Гъу, итцадхIи усули,
Сецад дурсирил, бура?

Марли бурасли, рузи,
Цаагили усира.
Диъра бибгIянбарили,
Картошкара дурсили.

* * *

Гъачам ГIисачи шадив
ВакIилри унра ГIябдул,
Арбухили уббухъун
Абуи ца буркъа гIябул.

Р. Рашидов.

ХАСТИ ВА ТIИНТИТИ СУЩЕСТВИТЕЛЬНОЕБИ СЕЛИЧИРЛИ ДЕКИАРДУЛХЪАНА?

ХIянчи 28. Ишди дугъбала цалабикуни дакIахъили, предложе-
ниеби цаладахъая.

Россияла Игит, ВатІа ЧебяхІси дергъ, Дагъиста пача-
лихъла университет, Избербашла педучилище, Каспи
урхъу, КъарабяхІ хя, Дагъиста тахшагъар, Лавашала ши.

Хасты существительноеби сари:

1. Адамтала уми, фамилияби, отчествоби, чеуми:
Ибрагъим, ХІяжи, КъадибяхІяммаев, БяхІянович, Къа-
рат ва ц.

2. Шагъуртала, шимала, мер-мусала, къакъурбала,
дубуртала, зубартала, улкнала уми: МяхІячкъала, Ахъу-
ша, ГІяякъакъа, Казбек дубура, Азербайджан, Марс, Бац
ва ц.

3. ХІуркІбала, шарубала, урхънала, океантала уми:
Волга хІеркІ, ЦІудара урхъу, Тихий океан, Балхаш шара
ва ц.

4. ХІяйвантала (мицІирагла) уми: БяхІцІа, Хъула,
Дава, ЦІудара ва ц.

5. Жузала, журналтала, газетабала, фабрикабала, за-
водунала, колхозунала, совхозунала уми: «Лачин» (жур-
нал), «Замана» (газета), «Партизан» (колхоз), «СирхІя»
(совхоз), «Миш ва къякъ» (завод), «Зубари» (фабрика)
ва ц.

ГІелар калунти существительноебас тІинтІти или
бикІар: къада, хІеркІ, дубура, гъарга, хъалч, тІени ва ц.

ХІянчи 29. Хасты существительноеби дакІахъили, гъарил прави-
лолис хІяб-хІябал предложение пикридарая ва делкІеная.

ГІибрат: 1. Амир Гъази даргала поэт сай. 2. МяхІячкъала шагъар Дагъиста тахшагъар саби. 3. Нуни
ЦІуба урхъуличила хабар белчІунра. 4. Нушала къула-

зибад цалис БяхІцІа бикІар. 5. «Замана» газетализирад-
ти цацадехІ макъалаби нуни, дарсличи хІядурирухІели,
пайдаладирис.

СУЩЕСТВИТЕЛЬНОЕ ЛУГІИ ХІЯСИБЛИ БАРСБИКІНИЛИЧИЛА СЕ БАЛАДАЯ?

ХІянчи 30. Ишди существительноеби чиди лугІила сарил,
бурая. Цалихълизир ва дахълихълизир дакІахъили, хІяб-хІябал
существительноеличил предложениеби пикридарая ва делкІеная.

Кагъар, унци, хъали, гъарга, чІябар, мукъри, кякян-
ти, вацІурби, къада, къаркъа, къялкъя, шанти, дубур-
ти, урхъу, шаруби, хІева, хІяка, варгъни.

ИмцІатигъунти существительноебала кІел лугІи лер:
цалихъ ва дахълихъ.

Цалихъли чебиахъу секІултала ца секІал. М а с а л а:
дурхІя, тйй, къача, рурси, узи, рузикъар ва ц.

Дахълихъли кІел яра илдачир имцІати секІулти че-
диахъу. М а с а л а: ванзурби, зубарти, нешани, бурхІни,
къадурби, хІурхъи ва ц.

ХІянчи 31. ГІергъиси назмулизир существительноеби даргая ва
илдала лугІи белгибарая.

ЧатІнала макъамтауб
Гъав акІуб уркІилизиб.
Къабулдан архІяличи
Арцур ургубализи.

Мирхъиливан тѣм асиб
ДухъутІа вава-къарла,
Аръа марка супІбариб
ДяхІличибад илдала.

Дубуртала гъавала
ТІягІямлизиб ил базиб,
Савлила маркалиуб
Зубри рангла вававан.

АтхІебла далуйтала
Цаибси дев берхъахъес
УркІилизиб, талихІла
Нургъбала кІантІван бацІиб.



Зугъра Ханум.

ДАРГАЛА МЕЗЛИЗИР ЧУМ ПАДЕЖ ЛЕРА?

Даргала мезлизир вецІну цара падеж лер: уйхъу, актив, хас, лугу, барх, гъалабихъ, сабаб, гъамдешла, бяхІчибизла, паргъатдешла, декІарбикла. Илдазирад верхІел гІядатла падежуни сари, авал – мерла падежуни.

ГІядатла падежуни

- | | |
|----------------|---------------------|
| 1. Уйхъу падеж | чи? се? |
| 2. Актив падеж | чини? (чили?) сели? |
| 3. Хас падеж | чила? села? |
| 4. Лугу падеж | чис? селис? |



- | | |
|--------------------|---------------------|
| 5. Барх падеж | чичил? селичил? |
| 6. Гъалабихъ падеж | чичила? селичила? |
| 7. Сабаб падеж | чичибли? селичибли? |

Мер падежуни

- | | |
|-----------------------|-----------------------|
| 1. Гъамдешла падеж | чичи? селичи? |
| 2. БяхІчибизла падеж | чичибяхІ? селичибяхІ? |
| 3. Паргъатдешла падеж | чинаб? селичиб? |
| 4. ДекІарбикла падеж | чичибад? селичибад? |

Суалти хІясибли существительноебала ахирти дарсдикІнилис падежуни хІясибли барсбикІни яра склонение или бикІар.

ХІянчи 32. Пѣргъити существительноеби падежунардарая. Илдала ахирти, тугъаили, декІардарая.

Макъам, хъали, ГІяли.

ГІибрат:

У.п.	тІал	марка
А.п.	тІай	маркали
Х.п.	тІа	маркала
Л.п.	тІайс	маркалис
Б.п.	тІайчил	маркаличил
Гъ.п.	тІайчила	маркаличила
С.п.	тІайчибли	маркаличибли
Гъ.п.	тІайчи	маркаличи
Б.п.	тІайчибяхІ	маркаличибяхІ
П.п.	тІайчиб	маркаличиб
Д.п.	тІайчибад	маркаличибад

ХІянчи 33. Пѣргъиси белкІлизир существителноеби даргая, тугъаили, илдала ахирти декІардарая, чеди, сегъуна падежлизир дакІилил, белкІеная.

Ахъти шурмала ургабси дякъличир урчила мурда дуцІли сари. ХІера, ил вацІализи рухІнарерхур, диркъ-бикличи дурарикиб, арсаварличилси гуми ахъиб, кунк-ли музала гІелар реткахъиб. Савлила шалалиур, цІуб арцли дакибтиван, кадизурли сари дубурти. Дубуртала къанти къарличир гъачамлис аръа марка лерал. ХІера, иш къушра, бишунси цІара, ита-иша лайдакІибти варгъ-нира, дагла лигуби лутІути хурира. Цабара тѣйдили хъябличи баршибси занкъарайличилси тѣй саби.

ГІяхІмадхан Абу-Бакар.

Х.п.

П.п.

ГІибрат: Шурмала. Дякъличир.

Уйхъу падеж

Гулжанат вецІну верхІра дус риублири. (М-д-Р.). Нуржанна бурушла мякълар – ГІѣйшат. (ГІ.А.) Чиллала гІѣргъити бурхІни сарри... (И.ХІ.) Хъули бедибси дарс-лизиб ТІалхІятли хатІа барилри: гъану шурала мерли-чиб гъал белкІири. (М.А.) ВатІан! Чилири набзир хІечи диги алкунти? (Ф.ГІ.) Кункти мукърала гулби чубкарти детаахъес, къяшми кункти туйрала хІихІи жагабиахъес. (Ан.Ад.) Лебал гІурра адамти ванзакад къунзбикІули, халдарлаб урхІли талихІ лебхниличи бирхули. (ГІ.С.) Саламти дурхъули берхІила нурлис, вавни чедиулра дубурла къярдла. (Р.ХІ.) ДягІи дисули дебшиб, хІеб садаиб юргъали, хъубяхІрумала байрам бехІбихъахъес къургъали. (Ю.Х.)

Чедир гъандушибти предложениебазир Гулжанат, Гяйшат, бурхІни, ВатІан, диги, гулби, къяшми, хІихІи, адапти, талихІ, Самур, Шагъдагъ, салапти, вавни, дягІи, хІеб, байрам ибти существительноеби уйхъу падежли-зир дакІили сари.

Селичила - биалра хабар бурухІели, чиди-биалра секІа у айхъухІели, яра чичи-биалра дугъаилзухІели, чули **чи? се?** ибти суалтала цалис жаваб лугути дугъби уйхъу падежлизир дакІибти существительноеби сари.

Предложениелизиб уйхъу падежлизиси существительное подлежащееели яра объектли бирар. М а с а л а : *Алхас школализи вакІиб. Алхасли дарс белчІун.*

Подлежащее актив падежлизибра башар ва сунени **чили? сели?** ибти суалтала цалис жаваб луга. М а с а л а : Мухтарли газета белчІун. ХІера, ишаб подлежащее Мухтарли саби. Объект газета саби. Подлежащее уйхъу падежлизиб биалли, предложениелизиб объект хІебирар. Объект бируси чІянкІли подлежащее актив падежлизиб биаллицун саби.

ХІянчи 34. Гибси гІибрат хІясибли, дугъбала цахІнабяхъуначи далдикибти существительноеби делкІеная.

ГІибрат: духълумала уми: жяр, хІябкІапІи, вава, пІялпІялаг, бириз, хур...

МицІирагла уми:

Адамтала уми:

Арцантала уми:

Шагъуртала уми:

ТІабигІятла анцІбукъунала уми:

Шимала уми:

Хъа ваяхІла уми:

БелчІудила гІягІниахълумала уми:

Хіянчи 35. Уйхъу падежлизир существительноеби дакІахъили, чумал предложение пикридарая ва делкІеная.

Хіянчи 36. Гергъити дугъбачил предложениеби пикридарая ва делкІеная. ГІялихан, чяка, шара, анхъ, варачан, тІутІи, къаркъа, къакъ, мачайти.

Актив падеж

Лералли чихъти зубри, закли алавдуцили, духъабая, хъубзури, игъбарли гІердуцили (Г.-Б.Б.) КъацІли бахун илини чумилра цІуръа хъяша, бахъ эршибарилрину балагъла дургъба яшав. (ХІ.ГІ.) ПарчбикІули саби ил шурлиубад шарабли, мукърази жибикІули вичІбикІуси тІамали. (Б.С.) Чеблуми дахъал сари набчирти, илбагъандан къакъадешла шишимли гъав булъулигу гъаман. (Ш.Гъ.) Янили къацІбикІи къяркъси бугІярдеш, дуцІрум нур чахъдикІи дуцІар-дуцІарли. (ГІ.Ж.) Нешли бетІу каргъулри, рикІулри ил дурхІнази: «ДяхІили ишкъяйдари урзуси янилизиб». (Р.Р.) ЦІуба къацІла къидикъ саб къирли буцибси гъуйчиб. (М.ХІ.).

Чедирти предложениебазирти закли, игъбарли, къацІли, шарабли, тІамали, шишимли, янили, нешли, къирли актив падежлизир дакІибти существительноеби сари.

Предложениелизиб актив падежлизибси существительное имцІаливан подлежащеели бирар. Масала: Дудешли газета бучІулри. Рузини масъала ирзулри. Нушала совхозли гІебшнила ризкъи дегІи тамандариб.

ЦацахІели актив падежлизибси существительное подлежащеели хІебиублира бирар. Масала: Хаджат дарсли ручІулри. ГІязизли шахъли улкъай бикулри. Хала дудешли бардали урцул кадердиб. ХІера, икІди предложениебазирти дарсли, шахъли, бардали ибти существительноеби кІиибил даражала члентили диубли дакІили сари.

Актив падежлизибси существительноели чили? сели? ибти суалтала цалис жаваб луга.

ХІянчи 37. ДелчІеная, декІардарибти дугъби чиди падежлизир сарил ва предложениела чиди членни диублил, бурая.

Рашид Рашидовли, школализив учІухІели, сунела рузис дарс кабирхъули вири. РучІни ункъбарахъес багъандан, сунези халаси **тетрадь** барахъес ва къиянси гъарил секІал илизи лукІахъес хъарбариб. Рузини гъалаб балбикибси чІиличил тетрадь бирбуб. ЧІи цІудара сабри. **Илини** тетрадь Рашидлизи чебаахъиб. Рашид вамкъур.

ХІянчи 38. Ишди существительноеби актив падежлизир дакІахъили, предложениеби пикридарая ва делкІеная.

Яни, дяхІи, совхоз, къялкъя, уркура, мирхъи, дудеш, мурул, къял, варачан.

ХІянчи 39. Предложениеби черделкІеная, актив падежлизир дакІибти существительноеби, уди тугъаили, декІардарая.

Дила ца хІуй селра чебиули ахІен. БукІуй ханжай бецІ кабушиб. Тухтурли гибси дармай дила бекІ къайбикахъиб. Шарализи кабихъунси гамушла ца утІи чІичІай берхъилри.

Хас падеж

АнкІла къякъ баргили, лагъани иб илизи: «ХІябра бахъІи умцІира, агъ, хІу дила бизиси». (Н.Ю.) **ХІеркІла** дубла, къярдла увяхІихъулра, уркІи гъузгъалдили къю-къмусиркулра. (Р.ХІ.) **Аршила** ургавадли, хъулга ургу-бакадли аркъулра, даг дарибти чяхІ-заблисра улгули. (С.Р.) **ГІяйдиубли** сар сагъли дубрир гІебшни **мургъила**. (Г.-Б.Б.) **Дунъяла** жагадешли гІямруличи карцІварра. (ХІ.З.)

АнкІла, хІеркІла, аршила, мургъила, дунъяла хас падежлизир дакІибти существительноеби сари.

Предложениелизиб хас падежлизиб бакІибси существительноели сунечи се-биалра имцІали хасбиъни иргъахъу. М а с а л а: Колхозла бригадир Салман сайри. Бригада лабилра членти бузера ла гъабкъяби сабри.

Хас падежлизир дакІибти существительноеби имцІаливан кІиибил даражала членни диубли дашар. Хас падежлизибси девли **чила? села?** ибти суалтала цалис жаваб луга. М а с а л а: Лагъман историяла учитель сай. Унрала къулани дахъал ниъ лугули сари. Хъубзурани хІебла ризкъи делгІулри.

ХІянчи 40. Хас падежличилти существительноеби дакІахъили, чумал предложение пикридарая ва делкІеная.

ХІянчи 41. ЧеббелкІеная. Хас падежлизир дакІибти существительноебала уди тугъаая.

Мурадла дудеш мургъи-арцла уста сайри. Мурадлис сунела дудешла хІянчиличи хІерикІес дигахъи. Ил дудешгъуна, хабарла уста ветаэс хъуликІулри.

Хіера, ишбархІира Мурад дудешличил устаханализи ацІиб. Дудешли дурубра биштІаси кьанира касиб. Амма, кьанилизидуруб хъурсбарибмадан, илини разиагарли бекІ гьакІбариб.

ХІянчи 42. БелчІеная, актив ва хас падежуназир дакІибти существительноеби чучил дархдасунти дугъбачил дарх черделкІеная. Падежуначи далдиркути суалти кадатирая.

Ца хъанцІа гІяра яни шила мякьлаб хІербирулри. Дуги бакІибхІели, илини ца лихІи дингаиб ва лехІяхъиб, гІур итил лихІира дингаиб, супелти вяшдариб, сунтІбикун ва гІела кьашмачи гугбииб. ГІур ил мурхъси дяхІикад гьачам тІяхІбухъун, кІинайсра тІяхІбухъун, гьуниладублаб тІашбизур.

ХъайгІив висуси дурхІяла бикъулри. ГІярали дургІелар сунела гьалмагъуни даргиб. Илини илдачил-ра хІяз бариб, нихъяли бугун, гІур сунела пукъализи арбякъун. Ил пукъалаб, лихІбира кьакъличи кадихъили, бускаун.

Лугу падеж

ВатІайс къуллукъбирули, узира ва ургъира. (М.Гъ.) Елкалис галга барес се бирехІе нушани? (С.Р.) Калабая дарх жагъли авна гьатІи авцІали, баршибси кьумурличил гІяхІлас гьунидиули. (А.ХІ.) Цунси ва жалукъ жагъил цугикалли нагагъла, ил – ну сайра, тІашпризи, неш, манзиллис ца гьигъла. (А.Гъ.) Гаплисван саб бурули Романовхъалачила, хІябдарш дус Россиялис бекІдеш дирниличила. (М.ХІ.)

Чедир декІардарибти ВатІайс, елкалис, гІяхІлас, ман-
зиллис, Россиялис ибти существителъноеби лугу падеж-
лизир дакІили сари.

Лугу падежлизир дакІибти существителъноебани
лугнила баркъуди сунечи чеббурхни иргъахъу.

М а с а л а: Илъясли колхозла складлис къараул биру.
Рузис ХІусей жуз бедиб. Анхълизирти цІедешла гал-
губас чебетаибси къуллукъ биреная!

Лугу падежлизибси дев предложениела кІиибил да-
ражала членни биубли башар. Лугу падежлизибси
девли **чис? селис?** ибти суалтала цалис жаваб луга.

ХІянчи 43. Предложениеби черделкІеная. Лугу падежлизир
дакІибти существителъноебала уди тугъаая.

– Башир, ахІерси, гІяхІси барири хІу вакІни, нуни
Нуржайс селра вайси барибси лебси ахІен. (ГІ.А.-Б.) ХІу
акІнила хІурматлис; ветааб или анхъчи, чедатурти сар
икІди вацІала галгубачи. (Р.Р.) Гурдас ил язихъбизур,
кумекбарес къасбариб. (ХІ.ЦІ.)

ХІянчи 44. Удир гибти дугъби лугу падежлизир дакІахъили,
предложениеби пикридарая ва делкІеная.

Ялчи, урчи, ВатІан, тІул, хІянчи, гІяхІял, къацІ, вацІа,
чяка.

Г І и б р а т: Сергокъала совхозла гъаркъя ялчилис
улкали Бузера Игитла у бедиб.

Барх падеж

УркИиличил хъубяхІрумас шаладешличи хІерси, дила берхІила саламти къабулдара, ахІерси. (З.Х.) – Цаибилгъуна, зулмуличил сунечи дигай дихъахъес баягъи сари Асиятра къабулхІериркур. (М-д-Р.). – Ялгъузкабирули саби юртра, – ГІяшурлавличил ихтилат даимбариб Маржанатли, къялра дурхъи бухІнаили. (А.Къ.) Дураулхъас хъуливад бай хъатлаб берхІиличил, ахІерси шила шанти ванабарес къасличил. (С.Р.). Азихъ някъла касили, тІашилзас хІулбас гъала, гъунивайбси гъела хунжачил хІеблис гъала. (Г.-Б.Б.).

ДекІардарибти уркИиличил, зулмуличил, ГІяшурлавличил, берхІиличил, хунжачил барх падежлизир дакІили сари.

Барх падежли ца секІал итилличил барх биъни, баркъуди кІилилра барх бирни чебиахъу. Барх падежлизибси девли чичил? селичил? ибти суалтала цалис жаваб луга. М а с а л а: ДурхІначил нура гІинцби далцІес вацІализи вякъунра. Нешличил Раисат базарличи аррякъун.

Барх падежлизиб биубси существительное предложениелизиб кІиибил даражала членни бирар.

ХІянчи 45. БелчІеная. Барх падежлизир дакІибти существительноеби чедаахъая.

ЦІубабала халаси отряд Лавашала ши буцес аркъулри. Амма ГІяякъақьализиб хІунтІена партизанти илис гъуни гъабариб. Лаваша букъес бирниличи душмантала

умут бетахъиб. ИлхІели илдани ДешлахІярлизи чарбиэс пикрибариб. Амма илди гІелабяхІ аркъуси гъунира партизантани буцилри.

Даргала партизанти, мурдати – шушкначил, хъурати – ханжултачил, гъужумлизи бухІнабухъун.

Сагати гІямру багъанданси дяви партизантала чедиб-дешличил таманбиуб.

ХІянчи 46. ЧеббелкІеная. Барх падежлизир дакІибти существительноебала уди тугъаая.

1. Ну дудешличил шагъарлизи вякъунра. 2. Ухъна сунела рухъначил хІериуб. 3. Адавзичил нуша киноличи дякъунра. 4. Авлахъла хІянчурбазиб тракторличил цугбуцеси селра агара. 5. Гъачам ну нешличил варх хъучи вякъунра. Нуша къелхІначил, газначил дузули дуира. 6. Давудличил СалихІятра Рукъиятра бакІиб. Ну илдачил абзли узира. 7. Унрубачиб нушани багълабарира. Илдачил дарх нушара ниъличил къацІли дукунра.

ХІянчи 47. Удир гибти существительноеби барх падежлизир дцахъубли, предложениеби пикридарая ва делкІеная.

Къуйрукъ, хІункъа, хІяка, ургъур, урдур, хІяйван, гавлаг, хъали.

Гъалабихъ падеж

Далай саб ВатІайчила, хъучиб лугиличила. (Д.ГІ.) Дануфличила се бурес вируда? (А.Къ.) Наб хІези Салмайчила бурес дигусири. (М-д-Р.) Залумли аргъиб туснакъварибси дудешличила илис гъайикІес хІейгули виъни. (А.Къ.)

ХІушани аргъили дургудая декІардарибти дугъби гъалабихъ падежлизир дакІниличила.

Гъалабихъ падежли сунечила гъайбикІуси секІал чебиахъу, суненира чичила? селичила? ибти суалтала цалис жаваб луга.

Гъалабихъ падежлизиси дев предложениелизиб мурталра кІиибил даражала членни биубли башар. М а с а л а: Учителъли нушази динна гІилмуличила буриб. Неш сунени бучІуси жузличила пикририкІули сари.

ХІянчи 48. БелчІеная. Гъалабихъ падежлизир дакІибти существительноеби чедаахъая.

Дубсила булмачилси ит табтар гъарли-марси къръа табтар ахІенри. Ил кыматчебси сабри, сунела мягІнала пасихІдеш, адамтала гІямруличи гъамдеш хІясибли ва хІякъикъат лебси тяхІярли чебаахъниличибли. Илизи дахъал белкІани дарилри: адамтала пикрумачила, дубуртазир кадиркути анцІбукъуначила, къисматуначила, гІядатуначила, къаманала ва жамигІятла историяличила, гъар журала аманатуначила ва насихІятуначила. Илди белкІани дарилри дебали гІякълучевси ва уркІи гъаргси Къара Дагъистанли бикІуси мутагІялимли.

ГІ. Абу-Бакар.

ХІянчи 49. БелчІеная. Гъалабихъ падежлизир дакІибти существительноеби чучил дархдасунти дугъбачил черделкІеная.

Нушала унраличир ца Рукъият бикІуси рухъна лер. ДурхІнала собрание сабри. Собраниеличиб бухънабас

бируси кумекличила гъайбикІулри. Нуни Рукъиятличила, илала гІямруличила, яшавличила дурхІнази хабар бурира. Собраниеличиб илис бареси кумекличила дахъал гъай детаур. Нушани пикрибарира рухъна Рукъиятлис шин дихес, урцул кавдес, хъалицІа умудирес. Нушала ил баркъудиличила адапти даим гапбикІар.

ХІянчи 50. Удир гибти существителъноеби гъалабихъ падежли-зир дакІахъили, предложениеби пикридарая ва делкІеная.

Адам, азгъин, бетІу, гамуш, кІуркІур, къарчигъа, бецІ, гІиникъ.

Сабаб падеж

Къарличибли дила дяхъи жявли гІяхІкабкуб. ГІяхІси сабухъличибли адамтала яшав къулайбиахъес имкан бакІиб. **Машиналичибли** нушала халкъла бузери гъамадбиуб, кункбиуб. **Унраличибли** набра гІяхІдеш биуб.

Сабаб падежли кабиркуси баркъудила сабаб иргъахъу, суненира **чичибли? селичибли?** ибти суалтала цалис жаваб луга. Сабаб падежлизибси дев предложениелизиб кІиибил даражала членни бирар. М а с а л а: ТІунтІрачирли излуми тІинтІдирар. Гъалмагъла къайгъиличибли дила архІя бетерхур.

ХІянчи 51. Предложениеби черделкІеная. Сабаб падежлизибси существителъноела уди тугъаая.

Мирзачибли хІедра гІяхІси къимат бикиб. Запирличибли Зугъумла хІянчи жявли таманбиуб. Рузичивли ну къанирули хІилхІи калунра. Ил ралкъаахъурли яслили-

зи рулес гІягІнилири. Унраличирси Хамис рухІнарухъун
ва нушаб кумекбариб. Хамисла гІяхІдешли ну школали-
зи кьанхІейубли валкьаурра.

ХІянчи 52. БелчІеная. Сабаб падежлизир дакІибти существи-
тельноеби чедаахъая.

Хабарагарли Хадижатла уркІи изесбяхІиб. Се биру-
сил, балули ахІенри. Унраличиб телефон лебри. Теле-
фонна гІяхІдешличибли хъярхъли тухтур живарес ну-
шаб имканбакІиб. Хадижатлис тухтурли жявли кумек-
бариб. Хадижат къулайриуб. Телефойчирли Хадижатла
жан дерцахъиб.

ХІянчи 53. Ишди существительноеби сабаб падежлизир
дакІахъили, предложениеби пикридарая ва делчІеная.

Урчи, буцІардеш, гъяйми, уркъули, хияр, гІиниз.

ХІянчи 54. ХІушани колхозла фермализи дураберкІибси экскур-
сияличила биштІаси хабар белчІеная. Хабарлизир сабаб падежли-
зир дакІибти существительноеби, уди тугъаили, чедаахъая.

Мер падежуни

МухІилиличи хъат бухили, илини ну лехІяхъахъес
лишанбариб. (М.А.)

Хъат някъби гьадурцулра савлила берхІилис, хъяб-
руцбашули саби берхІила шала набчи (З.Х.). Адамти
хІербирути тІабигІятличи гъамли гъигъла гъавлизибал-
ра хІебирар кьяркъли, хамли (М.-З.). ВецІ эмхІечибяхІ
хІербизур (Х.Х.) ГІялини урчиличибяхІ гъайбариб (Х.Х.).
ХІуни наб сириличиб карцІли бучІуси лайла, бехІбихъуд-

ри, ахІерси, дила дякъла далайла (З.Х.). ТІяхІбикІар кенгуру гІеларти къяшмачиб. (Р:Р.). Гъарахъси мерличирад уркІили чедаасли шилизир алки цІами, шалми – цІилцІилдикІули, неш, хІечи гуми биру гІурра дила уркІили. (А.К.). ХІябличирад хІявбуцІи дебшиб, игъубси хІярхІя къяйда (Х.д.).

Существительноеби мер падежуназирра дашар. Мер падежуни авал сари:

Гъамдешла падеж – чичи? селичи?
БяхІчибиз падеж – чичибяхІ? селичибяхІ?
Паргъатдешла падеж – чичиб?ч селичиб?
ДекІарбикла падеж – чичибад? селичибад?

Гъамдешла падежли баркъуди селичи-биалра яра чичи-биалра гъамбиъни иргъахъу. Масала: Вожатый дурхІначи гъамиуб. Дила рузи школализии аррякъун.

БяхІчибиз падежли баркъуди чинабяхІ-биалра яра селичибяхІ-биалра бяхІчибизни чебиахъу. Масала: Муслим узичивяхІ дуцІухъун. Халкъ школализибяхІ батбихъиб.

Паргъатдешла падежли баркъудила яра секІа мер чебиахъу. Масала: ХІяйвантала хІенкъ авлахъличиб гІяйбикІулри.

ДекІарбикла падежли ца секІал цархІил секІайзибад декІарбикни чебиахъу. Масала: Къаякъличибад дурхІни хІеркІла дубла кабацІиб. Хъалчибад лагъа уди пархбухъун.

Мер падежлизибси существительное предложениелизиб кІиибил даражала членни биубли башар.

ХІянчи 55. БелчІеная. Гъамдешла ва паргъатдешла падежуна-
зир дакІибти существительноеби чучил дархдасунти дугъбачил дарх
черделкІеная.

Раисат мяхІкамлі чадурла къадализирад дурарухъун
ва хъула дубличир рагъарриуб.

Помидортани, хияртани, редискали дегІунти тугъи
азбарличи бикайчи тІинтІадиублири. Илди диркъуб-
лири, арцІилизирад умударилри. Помидортала арани
гІулудлизи мяхІкамли дигъири.

Анхъла гІямзилаб барибси кІав саби. ВецІал дусла
дурхІя, кІавлизирад шин ахъили, бадирабачил поми-
дортаци чертІес гъамирули сай.

ХІянчи 56. БяхІла газетализи макъала белкІеная. Макъалализир
мер падежуназир дакІибти существительноеби пайдаладарая.

ЦАЦАДЕХІ СУЩЕСТВИТЕЛЬНОЕБИ ПАДЕЖУНАРДИРНИЛА ХАСДЕШУНИ.

У.п.	дарман	мурул	чІичІала	хъали
А.п.	дармай	муруй	чІичІай	хъай
Х.п.	дарма	мура	чІичІа	хъа
Л.п.	дармайс	муруйс	чІичІайс	хъайс
Б.п.	дармайчил	муруйчил	чІичІайчил	хъайчил
Гъ.п.	дармайчила	муруйчила	чІичІайчила	хъайчила
С.п.	дармайчибли	муруйчибли	чІичІайчибли	хъайчибли
Гъ.п.	дармайчи	муруйчи	чІитчІайчи	хъайчи
Б.п.	дармайчибяхІ	муруйчибяхІ	чІичІайчибяхІ	хъайчибяхІ
П.п.	дармайчиб	муруйчиб	чІичІайчиб	хъайчиб
Д.п.	дармайчибад	муруйчибад	чІичІайчибад	хъайчибад

У.п.	Гіяшура	Тамила	палчи
А.п.	Гіяшурани	Тамилани	палчини
Х.п.	Гіяшурала	Тамилала	палчила
Л.п.	Гіяшурас	Тамилас	палчис
Б.п.	Гіяшурачил	Тамилачил	палчичил
Гъ.п.	Гіяшурачила	Тамилачила	палчичила
С.п.	Гіяшурачибли	Тамилачибли	палчичибли

Гъ.п.	Гіяшурачи	Тамилачи	палчичи
Б.п.	ГіяшурачибяхІ	ТамилачибяхІ	палчичибяхІ
П.п.	Гіяшурачиб	Тамилачиб	палчичиб
Д.п.	Гіяшурачибад	Тамилачибад	палчичибад

У.п.	бецІ	гІярмия	ялчи
А.п.	бецІли	гІярмияли	ялчили
Х.п.	бецІла	гІярмияла	ялчила
Л.п.	бецІлис	гІярмиялис	ялчис
Б.п.	бецІличил	гІярмияличил	ялчичил
Гъ.п.	бецІличила	гІярмияличила	ялчичила
С.п.	бецІличибли	гІярмияличибли	ялчичибли

Гъ.п.	бецІличи	гІярмияличи	ялчичи
Б.п.	бецІличибяхІ	гІярмияличибяхІ	ялчичибяхІ
П.п.	бецІличиб	гІярмияличиб	ялчичиб
Д.п.	бецІличибад	гІярмияличибад	ялчичибад

ХІянчи 57. Ишди существительноеби гІядатла падежуназир падежунардая.

Ханича, гІябул, букІун, урчи, школьникуни, гъункъя.

ХІянчи 58. Ишди уди делкІунти существительноеби мер падежуназир дакІахъая.

Урцул, ХІямид, гамуш, барха.

ХІянчи 59. Ишди гІергъити существительноеби лерилра падежуназир цалихълизирра дахълихълизирра падежунардара.

ЧІака, тІул, къакъба.

ХІянчи 60. Предложениеби черделкІеная, бяхІчибизла ва декІарбикла падежуназир дакІибти дугъби, уди тугъаили, декІардара.

ДурхІни ургубализибяхІ дуцІбикІули саби. Авлахъ-личибад лебгІеб халаси машина – комбайн – башули чебиули саби. Хапли илала мякъла машина бакІиб. Комбайнала турбализирад машинала духІна анкІи чяхІдикІесдииб.

СУЩЕСТВИТЕЛЬНОЕЛА ХІЯБАЛ СКЛОНЕНИЕ

Падежуни	1 склонение	2 склонение	3 склонение
	чула актив падежла ахир – ни биубти	чула актив падежла ахир – й биубти	чула актив падежла ахир – ли биубти
У.п.	ГІиса Палчи учительница	СирхІян хъунул беркала	БятІ Адам Батирай
А.п.	ГІисани палчини учительницани	сирхІяй хъунуй беркай	бятІли адамли Батирайли
Х.п.	ГІисала палчила учительницала	сирхІя хъуна берка	бятІла адамла Батирайла

Л.п.	ГПисас палчис учительницас	сирхІяйс хьунуйс беркайс	бятІлис адамлис Батирайлис
Б.п.	ГПисачил палчичил учительницачил	сирхІяйчил хьунуйчил беркайчил	бятІличил адамличил Батирайличил
Гъ.ц.	ГПисачила палчичила учительницачила	сирхІяйчила хьунуйчила беркайчила	бятІличила адамличила Батирайличила
С.п.	ГПисачибли палчичибли учительницачибли	сирхІяйчибли хьунуйчибли беркайчибли	бятІличибли адамличибли Батирайличибли
Гъ.п.	ГПисачи палчичи учительницачи	сирхІяйчи хьунуйчи беркайчи	бятІличи адамличи Батирайличи
Б.п.	ГПисачибяхІ палчичибяхІ учительницачибяхІ	сирхІяйчибяхІ хьунуйчибяхІ беркайчибяхІ	бятІличибяхІ адамличибяхІ БатирайличибяхІ
П.п.	ГПисачиб палчичиб учительницачиб	сирхІяйчиб хьунуйчиб беркайчиб	бятІличиб адамличиб Батирайличиб
Д.д.	ГПисачибад палчичибад учительницачибад	сирхІяйчибад хьунуйчибад беркайчибад	бятІличибад адамличибад Батирайличибад

ХІянчи 61. Пергъиси хабарлизир существителноеби даргая ва илдала падеж баянбарая.

Даршудешла вягІда

МяхІяммадхѡа унраличив хІериулри ца гІулухѡа урши ГІяли. ГІябулван велкунси ГІялила гІебшнилизиб бекІличиб кѡапІа хІебирар, хІеблизиб биалли дулгѡуби агарси бухѡутІа майка чегѡурли вашар.

Шала гІяйдиубмад, шила дублабси шаралав куртІир-хІур, ши-алав кункли дуцІикІар. Дубуртази дуцІрум хѡурадиалли, дудешлис кумекбарес дурзамличилра вашар. Дубватурли-хІетурли, МяхІяммад хѡалчла дубла дуцІулхѡан, дубхІехѡили, киражли бакибси лацла гІела дигІяниркур. ГІялила кѡаралди ганзухѡунала хѡар-бекІличибад гѡаббакІибмад, гѡалакли вехІирхѡур:

– ГІяли, ГІяли гІябул бекІ.

ГІяббасилис хІябал декІ!

ГІяйниб гІяргІя бебшахѡан,

Хѡулиб чирагѡ билшахѡан!

ГІяли дебали гѡимурги, амма ил ласяхѡили тамбихІбарес валкѡаайчи, МяхІяммад шинна кІантІван пяхІли ветихѡи...

– Чевверхи эс дигули тІамадарибсири, – уркІухѡунси МяхІяммадла хІулби вебшес азадси гѡуни баргес кѡяйцІдухѡун.

– ГІяхІси барилри, виштІал унра. – ГІялила хІулбазир малхІямти лишанти лямцІдухѡун.

– Даршудеш?! – ГІялини някѡ гѡабуциб.

– Даршудеш! – МяхІяммадли илала някѡ цІацІабариб. Дяв агарли хІербиес кІелра унрали вягІда бариб.

МяхІяммад СягІидовлайзибад.

ПРИЛАГАТЕЛЬНОЕ

1. Сунени секІа лишан чебиахъуси ва сегъуна? чиди? сецад? ибти суалтас жаваб лугуси гъайла бутІалис прилагательное или бикІар/ Масала: жагаси рурси, берхъибси вацІа, кегІебси чарх, камси хІянчи, чедибси жуз, халаси хІянчи, къанси гІяхІял, дахъал маза.

2. ЦацадехІ прилагательноеби жинс ва лугІи хІясибли дарсдикІар. Масала: халал узи – халати узби; халал рузи – халати рузби; биштІал къалам – диштІати къаламти.

3. Предложениелизиб прилагательное определениели, сказуемоели яра илала бутІали биубли башар. Масала: Разиси ученик школализи айцІули сай. ГІяли дигичевси сай. Урши дебали духусири.

ХІянчи 62. Назму белчІеная. ДекІардарили чедаахъибти дугъбани сегъунти суалтас жаваб лугулил, бурая.

Галга баргес хІемцІуси
Арцанра арцан ахІен,
Арцан кахІебируси
Галгара галга ахІен.

УркІби даргес хІемцІуси
Далайра далай ахІен,
Далайли хІебаргибси
УркІира уркІи ахІен.

С. Рабадановлайзибад.

ХІянчи 63. Ишди дугъби тІем иргъахъути прилагательноебачил дарх делгІеная: гІинц, пастІан, ниъ, дитъ, заб, чакар, хъяр, улелъа.

ГІибрат: цІикІси гІинц.

ХІянчи 64. Ишди дугъби секІултала ранг иргъахъути прилагательноебачил дарх черделгІеная:

вацІа, къацІ, мукъара, хя, бецІ, жита, синка, авлахъ, вава.

ГІибрат: шиниша вацІа.

ХІянчи 65. Назмулизир прилагательноеби даргая. Илдани сегъунти суалтас жаваб лугулил белгибарая ва илдачил предложениеби цахІнадахъая ва делгІеная.

БерхІили сар нушаб гъе гибти,
Тяп сунела рангти ва тІемти.
Гъели делгІеная, адамти,
Гъели делгІеная!

Атомла цІакъ абхъиб бикІаргу,
Гъела къякълизибцад цІакъ агу!
Гъели делгІеная, адамти,
Гъели делгІеная!

ВелгІули вамсурси адамла
Анкъира баракатси бирар,
УркІира сахаватси бирар.
Гъели делгІеная, адамти,
Гъели делгІеная!

Р. Рашидовлайзибад.

ХІянчи 66. Ишди секІулти, чула куц, чебаала хІясибли сегъунти дирара:

гІинц, хъяр, хІула, жуз, галга, адам, чарма, тІерхъа, мурчІ, дурега, хияр, картошка, помидор, турба, БерхІи?

ХІянчи 67. КІунтІрала мерла прилагательноеби (далдиркути) кадалтули, удирти предложениеби черделкІеная.

Базарличирад нуни ... гІинцби асира. Нешли узис ... жуз асиб. ПатІиматли ... картошка дакІахъиб. Нушала анхълизиб дебали ... хъярла галга леб. МяхІяммадли ... чармализи шин картІиб. Наб ... помидорти дигахъис. СягІидли вацІализирад ... сирмугла мурчІи кадухиб. Колхозла авлахъличир, чина хІеръадра, ... хиярти лайкадиублири.

КІунтІрала мерла чедирти предложениебази кадалтути дугъби: халати, мурити, сагаси, ахъси, журуга, хІунтІенаби, чІяртІаби, шинишаби.

ХІянчи 68. Ишди буралабачил тянишдиирая, черделкІеная.

Лебтасалра гІяхІси ветаэсра, бахълис вайси ветаэсра хІейрар. Житасра ванаси мер дигахъу. Анкъилар хъу делгІан, хъулир мура удан. БацІ тІакъалаб тІиз мирхъи. Беркунси кабурхар, батурси кавлан.

ХІянчи 69. Удирти умас гъала, гІибратличи хІеръили, далдикибти прилагательноеби кадатирая:

зумаси урцул	... урхъу
... ши	... хинкІ
... хъу	... мукъара

ХІянчи 70. СекІа ранг чебиахъути прилагательноебачил чумал предложение пикридарая ва делкІеная.

ХІянчи 71. Ишди удирти прилагательноебас гІергъи далдикибти существительноеби делкІеная.

разиси...	бухъутІа...	... цІакъси ...
биштІаси...	хІунтІена...	... бухъяна...
бягІуси ...	буркъа...	... дурхъаси...

ХІянчи 72. Ишди предложениеби делчІеная. Гъар прилагательное сунени баянбируси существительноеиличил барх чеббелкІеная ва прилагательноебала уди тугъаая.

1. ХІеблизир гъар мераначир мура дердес хІядурдарибти шиниша къарла майдунти сари. 2. Къугъати жура-журала вавни чедиули сари. 3. ХъанцІа зак урхъуван чебиули саби. 4. Арцантала жагати макъамти чедихули сари. 5. Унхъразибад башуси цІедешла бизиси тІем къян-къубази бухІнабулхъулри.

ХІянчи 73. Дубура, къада, вацІа, хІеркІ, шин ибти дугъби баяндирути прилагательноеби делкІеная.

ХІянчи 74. ЦІакъси, биштІаси, серхурси, цІуба ибти дугъбачи далдиркути существительноеби пикридарая ва делкІеная.

ХІяячи 75. Ванаси, ахъси, цІудара, хъярхъси ибти дугъбачи къаршиси мягІнала дугъби пикридарая ва делкІеная.

ПРИЛАГАТЕЛЬНОЕЛА ЛУГИИ

ХІянчи 76. ЧерделкІеная ва прилагательноебала уди тугъаая.

ВиштІаси узи – биштІати узби
Хъярхъил урчи – хъярхъти урчи
БуцІарси бархІи – дуцІарти бурхІни
ЦІакъси унц – цІакъти унци

Пикри бяхІчааая цалихъ лугІилизир дакІибти прилагательноебала суффиксуначи: -л, -си, -ил, дахълихъ лугІилизиб бакІибси прилагательноела – ти суффиксличира.

Сари -л, -си, -ил суффиксуначил цалихъ лугІилизир тамандирути ва чузиб жинсла гІяламат лебти прилагательноеби существительноебачил лугІи хІясибли далдиркур. М а с а л а: халал адам – халати адамти, цІакъси урши – цІакъти уршби, итил хъали – идилти хъулри.

Лерти сари прилагательноеби, существительноебачил сари дарх дакІибхІели, лугІи хІясибли далхІедиркутира. М а с а л а: шиниша авлахъ – шиниша авлахъуни, гІямултар адам – гІямултар адамти.

ХІянчи 77. Ишди прилагательноебачил существительноеби пикридарая, гІур предложениеби делкІеная. ЛугІи хІясибли дарсдикІни белгибарая.

цІикІси ..., муриси ..., цІуба ..., хІунтІена ...,
халал ..., буркъа ..., сагаси

ХІянчи 78. ХІябал – лугІи хІясибли существительноеличил дархдиркути, кІел – далхІедиркути прилагательноебачил предложениеби пикридарая ва делкІеная.

ХІянчи 79. Иш назму белчІеная. Прилагательноеби даргая: илдани баяндирути существительноебира сарира дарх делкІеная ва цалихъ-дахълихъ лугІурбазир чедаахъая.

... ДяхІиван цІуба палтар
Сари, бикІар, мурдачир.
Урчира саби, бикІар,
ЦІубси цІуб магъиличиб.

... ГІур багълали мурдани
Хъуракабиру, бикІар,
ЦІудара урхъулизи,
Зак баршили зубарта.

ГІ. Абу-Бакарлайзибад.

ПРИЛАГАТЕЛЬНОЕЛА ЖИНС

ХІянчи 80. Ишди дугъби черделкІеная. Дугъбала гъаларти жинсла гІяламатуни -в, -р, -б, уди тугъаили, декІардарая.

1. Вялхъя урши, рялхъя рурси, бялхъя унц.
2. Вабза мурул адам, рабза хъунул адам, бабза дехъ.
3. Ухъна ГІяли, рухъна Сакинат, бухъна жита.

Прилагательноеби лерти сари жинс хІясибли дарсдикІутира дарсхІедикІутира. Жинс хІясибли дарсдикІар чузиб жинсла гІяламат лебти прилагательноеби. М а с а л а: валкІа урши, ралкІа рурси, балкІа кецІа.

Жинсла гІяламатуни агарти прилагательноеби жинс хІясибли дарсхІедикІар. М а с а л а: ахъси урши, ахъси рурси, ахъси юрт ва ц.

✓ **ХІянчи 81.** Ишди удирти дугъбазир жинсла гІяламатуни чеда-
пхъая, ва илдигъунти прилагательноеби хІушанира пикридарая.
ЧерделкІеная, жинсла гІяламатуни, уди тугъаили, декІардарая.

Барскъа урши, барскъа рурси, барскъа унц. ВалкІа
Муса, ралкІа ХІялимат, балкІа гъай.

ХІянчи 82. Удир гъандушибти прилагательноеби пайдаладари-
ли, дуцІрумличила хабар белкІеная. Жинсла гІяламатунала уди
тугъаая.

ДуцІарти, буцІарси, шиниша, хІунтІена, ухъна
(ГІяли), рухъна (ХІялимат), муси (дирихъ), халаси
(хІеркІ).

ХІянчи 83. Ишди удирти дугъби черделкІеная. Дахълихълизир
чидни жинсанас цагъунти жинсла гІяламатуни дакІилил, пикри
бяхІчааая. Жинсла гІяламатуни, тугъаили, декІардарая.

ВиштІаси мурул адам	БиштІати мурул адамти
РиштІаси хъунул адам	БиштІати хъунул адамти
БиштІаси тІерхъа	ДиштІати тІерхъуби

ХІянчи 84. Прилагательноеби чедаахъая. Илди жинс хІясибли
дарсдикІулил ахІенал, бурая.

ДурхІни, гІямрула хІерла
Шаласи, шадси савли,
Хъуммартабая хІуша
ГІяхІти хІязта ва гъавли.

Халадааба – гъар гъигъ
Абалтес ВатІан гъанни,

Бихес чебяхІси гъуни,
Гъаргбарибси ВатІанни.

А.Гъазилайзибад.

ХІянчи 85. Ишди дугъбачи далдикибти прилагательноеби пик-ридарая ва делкІеная.

... вава, ... тап, ... къар, ...дяхІи, ...дуги, ...бархІи,
...бугъа, ...къакъа, ...анхъ.

М а с а л а: хІунтІена вава.

ХІянчи 86. ЛугІи хІясибли дарсдикІутира дарсхІедикІутира хІяб-хІябал прилагательное делкІеная ва, суффиксунала уди тугъаили, декІардарая.

ХІянчи 87. Иш назмулизир прилагательноеби даргая ва чули баяндирути дугъбачил дарх черделкІеная.

ГІяйдиубли сар гІебшни
Дубуртазир мургъила.
Ца дирихъмала дебшни
Дубкад дила махъила!
КуртІли сари ириъван
Улкни ванайхІи къургъи,
ХІядяргІили хІердиэс
Бирути гІяхІси къайгъи.
Бузули саби шанти
ХІулкІути, абархили,
Чула чебяхІси ванза
МаранкІили балхули.

Г.БяхІяндов.

Назму уркІиличиб багъирая.

ПРИЛАГАТЕЛЬНОЕБИ ПАДЕЖУНАРДИРНИ

У.п. хъярхъси	халал	ахъушан	цІуба
А.п. хъярхъсили	халалли	ахъушай	цІубани
Х.п. хъярхъсила	халалла	ахъуша	цІубала
Л.п. хъярхъсилис	халаллис	ахъушайс	цІубас
Б.п. хъярхъсиличил	халалличил	ахъушайчил	цІубачил
Ѓ.п. хъярхъсиличила	халашшчила	ахъушайчила	цІубачила
Сп. хъярхъсиличибли	халалличибли	ахъушайчибли	цІубачибли
Гъ.п. хъярхъсиличи	халалличи	ахъушайчи	цІубачи
Б.п. хъярхъсиличибяхІ	халалличибяхІ	ахъушайчибяхІ	цІубачибяхІ
П.п. хъярхъсиличиб	халалличиб	ахъушайчиб	цІубачиб
Д.п. хъярхъсиличибад	халалличибад	ахъушайчибад	цІубачибад

И ш а р а. Прилагательноеби падежунардирути
существительноела мерлар пайдаладарибхІели сари.
-л (-ал, -ил) – личил тамандирути прилагательное-
бала актив падежла ахир существительноела къяйда
-й ахІенну, мурталра -ли саби.

ХІянчи 88. БерхІе, бялхъя, дураша, хІурхъан, икІил, цІерхъси
ибти прилагательноеби падежунардара.

ХІянчи 89. ХІябал прилагательное пикридарая ва илди падежу-
нардара.

ТАМАНТИ ВА ТАМАНАХІЕНТИ ПРИЛАГАТЕЛЬНОЕБИ

Сари суффиксуначил детауртас таманти прилага-
тельноеби бикІар. М а с а л а: буцІарси, цІерхъси,
гІяхІси, ахъти, мурхъти ва ц.

Сари суффикс чеббушили дашути прилагательное-бас таманахІенти или бикІар. Масала: **мурхъ** къада, **дянг** авлахъ, **вай** замана, **бугІар** дуги, **ахІер** рурси ва ц.

Прилагательноела таманси формали суненицун суайс жаваб гес бирар, ва предложениелизиб сабицун декІарси членни биэс бирар. Масала: Дурхъати саламти дурхъула хІечи. Сегъунти саламти? или суал кабатехІелли, дурхъати или жаваб бедес дирехІе. ХІебиалли, дурхъати ибси прилагательное предложениелизиб определениели биубли саби.

Прилагательноела таманахІенси формали суненицун суайс жаваб гес хІебирар ва предложениела декІарси членни биэс хІебирар. Масала: Ихди мурхъ къадурбазир шараб гъанни шин дилъан.

Эгер нушани ишаб, сегъунти къадурбазир? или, суал кабатехІелли, илис жаваб чІянкІли мурхъ къадурбазир ибси бирар, сенахІенну **мурхъ** или жаваб бедес хІейрар. Таманси форма лугІи хІясибли барсбикІар, таманахІенси биалли барсхІебикІар.

ХІянчи 90. Ишди дугъбала аслубазирад таманти прилагательноеби даргая. Илдачил предложениеби цахІнадяхъяя.

Хъярхъ, журуг, мурхъ, дянг, цІяб, хъанцІ, шинкІа, ахъ.

ЧИСЛИТЕЛЬНОЕ

Числительное или бикІар дуйгІути, дуртІути секІултала къадар яра илдала гъаб-гІергъидеш чеби-ахъуси гъайла бутІалис. Иллини жаваб луга **чум? сецад? чум-чум? чумбехІ? чумъибил? чумъэсил?** ибти суалтала цалис. Масала: вецІал, дахъал, урег-урегал, верхІбехІ, шуибил, авэсил, чумал ва ц.

ХІянчи 91. Текст белчІеная. Илизирти числительноеби даргая
ни делчІеная.

Солдатунала гьалмагъдешличила

Илди урегал лебри. Уагар ахъдешлизиб кІел дуги-
хІери кьакъаси окоплизи кабирилри, ва чули душма гьу-
жумти гІела дянгилри. КІизил дуги илдала шин та-
мандиуб.

— Ахъдешла гІелаб, даршлим шуцІали метрла тййди-
ли, хІеркІ леб, — иб лейтенантли.

Урегалра лехІкахъилри. Ахирра-ахир, ца солдатли
приличи фляга дебабариб ва, селра хІеили, окоплизиwad
дуравхъун. Ил Дон хІеркІличи арякъун, фляга шинни
бицІиб ва гІелавяхІ чарухъун.

Окоплизи ваэс 18—19 метр лерай, бекІла чедиб душма
ракета пархбухъун. Окоплизи шелра пяхъбикири. Сол-
дат биалли ванзаличи гъяжиублири, амма кьаннири: ца
хІярхІя флягаличи чегиб, ва илизирад шин чяхІдухъун.

ИлхІели, левил ахъиубли, ва тІярхъиличи тІулра
гъяжбарили, фляга някъла буцили, солдат окоплизивяхІ
дуцІухъун. Окоплизиб илини фляга лейтенантлизид гъа-
буциб. Илала лутІилар биалли ца къум бицІари шин
сарри калунтк.

Лейтенантли фляга кІунтІбачи ахъбуциб, кІинайс
мякълавси солдатлизид бедиб. Фляга шулизилра баиб ва
чарбухъи шичи вякъунси солдатличи бакІиб. Флягала
лутІилар биалли баягъи итди ца къум бицІари шин
калири.

Ю. Мишаткин.

ХІянчи 92. Числительноела гъарил суайс хІяб-хІябал масъала пикридарая ва делкІеная.

ЦАЛАБИКНИ ХІЯСИБЛИ ЧИСЛИТЕЛЬНОЕЛА ЖУРАБИ

Царка числительноеби: ца, урегал, урчІемал, вецІал, гъал, даршал, азир, кІиибил, вецІъибил ва ц.

Учидяхъ числительноеби: кІидарш, верхІдарш, вецІ-вецІал, хІяб-хІябал, урег-урегал ва ц.

Цаладыхъ числительноеби: азирлим даршлим шел, шуцІанну авра, кІел байхъала, авал бутІала ца бутІа ва ц.

ХІянчи 93. Текст белчІеная. Илизирти числительноеби белгида-рая. Гъарил, цалабикни хІясибли, сегъуна числительное сабил, белгибарая.

«ХІябилра лер дарес дигусилис», – или, ГІисаев цакъадар къалабали гъайикІесвахІиб. – Гъар хІябал мазалис ца хІясибли адапти кахІебатурли 700–800-ла хІенкъ барили, 4 – 5 адамлизи сен дуки хІедикахъутив?..

Ахирлизиб 100 къяйчирад 100 къача, гъар къяйчирад 2000 литр ниъла, 100 неш мазаличирад 125 мукъара ва ца мазаличирад 4 кило балала сархес чесиб.

(Р.ГІямаров).

ХІянчи 94. Ишди гІергъити числительноебачил предложениеби пикридарая: вецІну цара, даршлим авал, азирлим урчІемдаршлим урчІемцІали.

ИРГЪАХЪУСИ МЯГІНА ХІЯСИБЛИ ЧИСЛИТЕЛЬНОЕБИ ЧУМАЛ ЖУРАЛА САРИ

а) Къадар чебиахъути (чум? сецад?). ДурхІнани Іуфегал тетрадь, кІел ручка, хІябал перо асиб. Жузас цецІну верхІра къуруш дедира. Рурсили байхъала гІинц ралликъянас бедиб.

б) гъаб-гІергъидеш чебиахъути (чумъибил? чумэсил?). Ну шуибил класслизив учІулра. Ну кІиэсил бархІи бархІехъ хІушачи лявкъяс.

в) дуртІу числительноеби (чум-чум?). ДутІибхІели, нушаб ца-ца гІинц даиб. Учителъли дурхІнас хІябцІа-хІябцІали тетрадь дедиб.

ХІянчи 95. ГІергъити лугІурбазирад гъаб-гІергъидешла числительноеби дарая ва делкІеная.

5, 8, 4, 9, 100, 888, 1998, 60, 25, 160.

ХІянчи 96. ДуруІу числительноеби дакІахъили, чумал предложение пикридарая ва делкІеная.

ЧИСЛИТЕЛЬНОЕБИ ПАДЕЖУНАРДИРНИ

У.п.	хІябал	бутІала	ца	бутІа	гехІел
А.п.	хІябал	бутІала	ца	бутІали	гехІли
Х.п.	хІябал	бутІала	ца	бутІала	гехІла
Л.п.	хІябал	бутІала	ца	бутІалис	гехІлис
Б.п.	хІябал	бутІала	ца	бутІаличил	гехІличил
Гъ.п.	хІябал	бутІала	ца	бутІаличила	гехІличила
С.п.	хІябал	бутІала	ца	бутІаличибли	гехІличибли
Гъ.п.	хІябал	бутІала	ца	бутІаличи	гехІличи
Б.п.	хІябал	бутІала	ца	бутІаличибяхІ	гехІличибяхІ

П.п.	хІябал	бутІала	ца	бутІаличиб	гехІличиб
Д.п.	хІябал	бутІала	ца	бутІаличибад	гехІличибад
У.п.	хІябцІали		кІиибил		авал
А.п.	хІябцІай		кІиибилли		авли
Х.п.	хІябцІа		кІиибилла		авла
Л.п.	хІябцІайс		кІиибиллис		авлис
Б.п.	хІябцІайчил		кІиибилличил		авличил
Гъ.п.	хІябцІайчила		кІиибилличила		авличила
С.п.	хІябцІайчибли		кІиибилличибли		авличибли
Гъ.п.	хІябцІайчи		кІиибилличи		авличи
Б.п.	хІябцІайчибяхІ		кІиибилличибяхІ		авличибяхІ
П.п.	хІябцІайчиб		кІиибилличиб		авличиб
Д.п.	хІябцІайчибад		кІиибилличибад		авличибад

ХІянчи 97. Ишди гІергъити числительноеби падежунардара: верхІел, хІябъибил, вецІну авра, нуша урегала.

ХІянчи 98. ИмцІа-имцІали числительноебира пайдаладирули, хІушала мер-мусаличила хабар пикрибарая ва белкІеная.

МЕСТОИМЕНИЕ

СекІал, илала лишан яра къадар гъанхІебушили, илдала мерлаб бузахъуси гъайла бутІалис местоимение или бикІар. Масала: Дузабличиб нушала шилизибадси урчи гъалабикиб. Ил дебали бахъхІи балхули хІядурбарибсири. («Ил» ибси местоимение «урчи» ибси существительноела мерлаб бакІили саби.) Класслизи кабиили кІел дурхІя бучІулри. Илдани гІергъила бархІила дурсри хІядурдирулри. («Илдани» ибси местоимение «кІел дурхІя» ибти дугъбала (числительноела ва существительноела) мерлаб бакІили саби.

ХІянчи 99. Текстлизир местоимениеби даргая, чучи суалти кадатая ва черделкІеная.

...ХункІгъуна кецІа бирухІели, ил нуни тІалаббарибсири ва абикъурсири. Гъачам, ну архІяли аркъухІели, нуни саби арбукес къасхІебарира. БухІнаахъес бурили, дуравхъунра. Гъалцад километрла гъуни ахъибхІели, дила гъалмагъунира нура урчази багълабарахъес ва илди мухъили дугахъес тІашдизурра. ГІела чаряхъили хІерикІус гъари – гъуникад ца шинкъяван цІударалямцІбикІуси секІал, тупангла хІярхІяван кабухъи, лябкъули. Ил – хъяблаб гъаяла бутІара сабра дила кецІа сабри. Ил сабаиб, ну-алав тІяхІ-тІяхІбухъун ва уркурладяхІцІила кабихъун. Саби дебали бамсурлири: хІехъбикІулри, хъатцад лезми дурабахъилри, гъигъ гІеббиули ахІенри. Ил гъачам итил, гъачам ишил шайчи ласбикІи, ва сунени къуйрукъ ванзализи бирхъи.

Нуни кІинайс багъурра: саби улкъайла шиша бячи дурабухъири ва дила къел дуцили бакІилри...

Л.Н.Толстойла хабар хІясибли.

ХІянчи 100. Адрес бархъли лукІес бурсидиирая.

Куда

Республика Дагестан,
Акушинский район,
с. Акуша

Кому

Алиеву Магомеду Ахмедовичу

368510

Махачкала, 367025,
проспект А.Акушинского,
д. 30, кв. 35
Омаров Али Магомедович.

МУ51РАД

МЕСТОИМЕНИЕЛА ЖУРАБИ

Жураби | Цаибил бяхІ | КІиибил бяхІ | ХІябъибил бяхІ

1. БяхІла – ну – нуша, хІу – хІуша, сай – саби (сари).

2. Белгидешла – гъар, гъарил, гъар-чиди, гъар-чиди ца, баягъи, пулан, лебил, лебилра, гъарилра.

3. Ишарала – иш, ил, ит, икІ, их (ишди, илди, итди, икІди, ихди).

4. Суалла – чи? чихъали, чум? чумбехІ? чумдехІ? чиди? чум-чум? се? сецад? сегъуна ва ц.

5. Белгиагрила – чумал, чумрил, цачумал, чумилра, чидил, чидирил, чирил, чи-биалра, чиди-биалра, чиди-дигара, се-дигара, се-биалра, серил, се сабил, се сабрил, чиди-саял ва ц.

6. Инкарла – цалра, селра, чилра, чизилра, селизилра, чичилра ва ц.

ХІянчи 101. Ишди местоимениеби чула мягІна хІясибли журабачи дутІая. Ишдазир лерти белгиагрила местоимениеби дакІахъили, предложениеби цаладяхъяя ва делкІеная.

Ну, дила, наб, хІу, хІела, сай, сари, саби, чус, чучила, чучиб, ит, икІ ил, иш, илала, ихичил, итала.

Гъар, гъарил, баягъи, пулан, лебилра, лебилралала, леблалра, чи-дигара, чиди-дигара, се-дигара, селис-дигара.

Чи, чихъали, чум, се, сегъуна, сецад, чумал цачумал, чумрил, чидил, чидирил, серил, цаца, се-биалра, села-биалра, сели-биалра, чис-биалра, чичила-биалра.

МЕСТОИМЕНИЕБИ ЖИНС ВА ЛУГИИ ХІЯСИБЛИ ДАРСДИКІНИ

ХІябъибил бяхІла, цацадехІ суалла ва белгиагрила местоимениеби жинс хІясибли дарсдикІар. М а с а л а: сай, сари, саби, чумбехІ (мурул, хъунул жинсла), чумдехІ (урга жинс), се-биалра (урга жинс), чи-виалра (мурул, хъунул жинс); чиди-саял, чиди-сарил, чиди-сабил (мурул, хъунул, урга жинс).

ГІяхІцад местоимениеби къадар хІясибли дарсдикІули сари. М а с а л а: ну – нуша, хІу – хІуша, сай – саби, сари – саби, ит – итди, икІ – икІди ва ц.

Илкъяйда къадар хІясибли дарсхІедикІути (дахълихъ-ла форма агарти) местоимениебира лер, масала: чумал, чумилра, гъар-чиди ва ц.

ХІянчи 102. Дила, наб, хІечи́ла, итда́чи ибти местоимениеби дакІахъили, кІикІел предложение делкІеная.

ХІянчи 103. КІунтІрала мерличи балбиркуси местоимениера кабалтули, текст чеббелкІеная.

– ... туснакълизи кайибси такъсир багъандан сайра,
– иб...

– Ва ... чебси саби лерилра гІямру туснакълизир деркІес, ... гІяйиб камси-биалра чебахъес багъандан.

... анцІбукъличила ханнизи багъахъур.

– ... сегъуна ахмах сая? – пишяхъиб хан. – Ил ... вакІахъая. ВацІапІакъ ханничи кавкиб.

– Сегъуна такъсир саби ... барибси? – хъарбаиб ханни. – Бархъли бура, урухмакІуд. ИшбархІи ... хІялра гІяхІси саби.

– ... мурталра бархъси буруси саби. – жаваб чарбариб вацIапIакъли. – ... такъсир халаси саби! XIела жинс берцахъибси гимиргъи бакIахъибси ... сайра ...

Э.Къапиев.

XIянчи 104. Ну, нуша, ит, итди ибти местоимениеби дакIахъили, предложениеби пикридарая ва делкIеная.

МЕСТОИМЕНИЕБИ ПАДЕЖУНАРДИРНИ

Существительноела мерлаб бакIибси местоимение падежуни хIясибли барсбикIар. Местоимение падежунарбарнира, сунела ахирти хIясибли, существительное падежунарбирнигъуна саби.

Падежунала уми	1 бяхI		2 бяхI	
	цалихъ	дахълихъ	цалихъ	дахълихъ
У.п.	Ну	Нуша	XIу	XIуша
А.п.	Нуни	Нушани	XIуни	XIушани
Х.п.	Дила	Нушала	XIела	XIушала
Л.п.	Наб	Нушаб	XIед	XIушаб
Б.п.	Набчил	Нушачил	XIечил	XIушачил
Гъ.п.	Набчила	Нушачила	XIечила	XIушачила
С.п.	Набчибли	Нушачибли	XIечибли	XIушачибли
Гъ.п.	Набчи	Нушачи	XIечи	XIушачи
Б.п.	НабчибяхI	НушачибяхI	XIечибяхI	XIушачибяхI
П.п.	Набчиб	Нушачиб	XIечиб	XIушачиб
Д.п.	Набчибад	Нушачибад	XIечибад	XIушачибад

Паде- жунала уми	3 бяхІ			
	цалихъ	дахълихъ	цалихъ	дахълихъ
У.п.	Сай	саби	ит	итди
А.п.	Сунени	чуни	Итини	Итдани
Х.п.	Сунела	Чула	Итала	Итдала
Л.п.	Сунес	Чус	Итис	Итдас
Б.п.	Сунечил	Чучил	Итичил	Итдачил
Гъ.п.	Сунечила	Чучила	Итичила	Итдачила
С.п.	Сунечибли	Чучибли	Итичибли	Итдачибли
Гъ.п.	Сунечи	Чучи	Итичи	Итдачи
Б.п.	СунечибяхІ	ЧучибяхІ	ИтичибяхІ	ИтдачибяхІ
П.п.	Сунечиб	Чучиб	Итичиб	Итдачиб
Д.п.	Сунечибад	Чучибад	Итичибад	Итдачибад

ХІянчи 105. Назму саркъахъили белчІеная. Илизирти место-
имениеби черделкІеная ва чиди падежлизир дакІилил, бурая.

Кагибтира сагътира
Пикруми мурхъдикили,
УркІилар дарцли сари.
Илди лерил хІечила
Сари, сабурчеб ванза,
Дила мургъила сири.
Сари хІела жагІялла
Къадар-къисматличила.
ХІела къисматличила.
Балас хІела къадрила
Къибламаличил виэс
Чебла биъни дилара.
Ил чеблала чебяхІдеш
Букъурлис къабулбиру
Нуниван дурхІнанира.

С.Рабадановлайзибад.

ХІянчи 106. Текст саркъахъили белчІеная. Цаибил, кІиибил ва хІябъибил бяхІла местоимениеби гъаб-гІергъидешличил черделкІеная, илди чиди падежлизир ва чиди бяхІлизир сарил, белги-барая.

Ухъна ва чІака

ЧІака, арцес или, дуклумачил гъакІбухъун, амма бихъІебиуб. Сунела качІначиб ванзаличибад бебшиб, гъунар агнили шайчи бетикахъиб. Уста ШапигІ, гъамиубли, илала мякъла кайиб, някъли чІакала къакъ хІяршбариб ва илала хІулбачи хІеръиб.

Арцан, хъябшси къяйдали, декІли гъигъбикІулри, гъаман сунени къудкъуди ибхъулри, илис гъигъбарес гъава биули ахІенри. «Урухмабируд, арцан, нура, хІу къяйда, ухънакаилра», – иб ШапигІли ва чІакала качІначи хІеръиб. ЧІакала качІнани чула бугадеш беткахъахъилри, илди бядбядлайчи мешудикилри. «РахІяткабии, арцан, ахІерси, гъанна нушачибад гІяргІяра чедибикес бирули саби. Дигив, хІед нуни гІяхІси диъла кесек лугасра. Баши, дила уршили кигъа белгъи кІеб. Баши, арцан, набчи гІяхІладли!»

ГІ.Абу-Бакарлайзибад.

ХІянчи 107. КІунтІрала мерла гІятІнити местоимениеби делкІеная.

Нушала колхозла у «Сагаси дунъя» саби... 60 хозяйство цаладикили сари ... хІянчи ункъли бузахъниличила чуйнара газетализи белкІи саби.

Лебтанилра ... гІяхІси колхозлизи хІисиббиру. Арбякъунси дус выставкаличиб ... премия бедибсири.

ХІянчи 108. Скобказир чедаяхъибти местоимениеби хІязатси падежлизир кадатирая.

... дежурный виэс ярга чесабаиб (ну, хІу, ит). Гъайа-
ла ... сари (нуша, хІуша, идти). Итини гъалмагъдеш
дариб ... (хІу, нуша). Умудешла комиссияли ... хъарба-
риб (хІу, ну, ит). ИшбархІи хІу ... мякъяд (ит, ну).

ГЛАГОЛ

(ХІябъибил класслизир делчІунти тикрардарес)

Суалти:

1. Глагол или селис бикІара?
2. Иллини се иргъахъу?
3. Ил се хІясибли барсбикІара?
4. Глагол жинс (класс) хІясибли существительноеличил балбик-
ниличила хІушани се бурес дирудая?
5. Глагол селичибли декІарбулхъана существительноелизибад ва
прилагательноелизибад?

ХІянчи 109. БелчІеная.

1. Лебри, лебри

КІел зиланти,

КІелра узби

КІилизанти.

ВикІули сай гъачам ГІяхІмад:

ЛехІизи, гъари, МяхІяммад.

Уми дирхахъули гІергъи,

Ваши уми дарсдирехІе.

ХІу – ГІяхІмад гъаннала гІергъи,

Ну – МяхІяммад детарехІе.

Р.Рашидов.

2. ХІябъэсил бегІла гІягІниагархІели вагъар ... у ... си пассажи ... ра сунела мерличи паргъатиубли усаун ва бяхъибси жаниварван хухухъун.

ГІ. Абу-Бакарлайзибад.

ЦІударли чедаахъибти дугъби глаголти диъни каби-захъая. Ил кабизахъес гъалаб белгибарая: 1. Илди дугъ-бани сегъунти суалтас жавабти лугули? 2. Илдани се иргъахъули? 3. Илди се хІясибли дарсдикІули?

Глагол имцІаливан предложениела сегъуна членни биубли башара?

Текст чеббелкІеная, урдатурти хІурпри кадалтули. Глаголти, уди тугъаили, декІардарая.

ХІянчи 110. Белгибарая, чиди гъайла бутІали биубли бакІилил гъарил дев, ва илди хІябал тІайзи делкІеная:

1 – существительноеби, 2 – прилагательноеби, 3 – глаголти.

Разидеш, разиси, разииз; буцІардеш, буцІарси, буцІарбииз; цІакъси, цІакъ, цІакъбииз; халаси, халабаиз, хала; дуцІбикІес, дуцІси, дуцІ; гІяхІси, гІяхІ, гІяхІбарес.

Гъарил тІайзи хІушанира кІикІел существительное, прилагательное ва глагол имцІадарили делкІеная.

ХІянчи 111. Р.Рашидовла «КІел гъалмагъ» бикІуси назму белкІеная, глаголти чедаахъая ва илди чиди жинслизир дакІилил, бурая.

КІел гъалмагъ

ХІекъли парпарбухъири
ХІебла аргъ.

Шадиб дурабухъири

КӀел гьалмагъ.

Аркъукад се-биалра

Баргибу –

Ил паргъатли хӀебалта,

Баргиу!

Гъу - дублаб уркайзибри

Ца урчи.

КӀилизивад гъамиуб

Ца урши.

Уркан бигъунси къярда

БакӀахъиб.

КӀиэсилли къаркъали

Бикахъиб.

ХӀянчи 112. БелчӀеная, глаголти даргая, гӀур мурул жинслизир ва хъунул жинслизир кадатурли (дакӀахъили), черделкӀеная.

Къарани пахруличил бурули вири: «Ну Мяммала ученик сайра, Мяммани вяркъурсира, ну къуръадачи биштӀативан, Мяммала мактаблизи вашули калунсира». Наб цацахӀели гъанбирки, валлагъ Мамай Мяммара иш Къарагъуна сай или. Масхуртар адамличил пешкеш анцӀрукъунира имцӀали кадиркули дуили, Къарара шелра дусла ухӀнав чумра дукелцӀила аги-хӀяйзи викибсири.

ХӀ. ГӀялиев.

ХӀянчи 113. ВакӀиб, чарухъун, дуцӀухъун, ахъиуб, лявкъян, дуцӀрукъун ибти глаголти, жинслизир далдикибти сущестительно-ебира дакӀахъили, предложениеби цаладыхъая ва делкӀеная, жинсла гӀяламатунала уди тугъаая.

Г л и б р а т: Дудеш хъули лявкъян. Неш хъули ляркъян.

ХІянчи 114. Глагол жинс хІясибли барсбикІнилис мисалли ди-
эсти урегал глагол пикридарая ва илдачил предложениеби делкІеная.

ХІянчи 115. ХІушала гьалмагъуначи яра шила дураб хІербирути
узи-уршиличи кагъар белкІеная. Кагъарлизир баркъуди иргъахъу-
ти дугъби пайдаладарая.

ХІянчи 116. Дагъиарая ишди багъираби. Белгидарая илдазирти
глаголти.

1. Ил адамтас дигахъу,
Сабицун букхІебука.
Адамта ил агарли
Берклуми камли дука.

2. Унраличиб кІел узиди —
КІелра цагъунти узиди —
Мякълаб сабкъи цала ца
ЧехІебиу цали ца.

Ж а в а б т и: (хІулби, зе).

ГЛАГОЛЛА БЕЛГИАГАР ФОРМА

ХІянчи 117. БелкІеная.

Жуз секъяйда хІербарес чебиркура?

Жуз мурталра умули бирахъес чебси саби. АсухІебирар
илала кІапІри къ...мчІиэс, кІирк...дирес. КІапІи с...бир-
хъес чебиркур, хъар гІямзилабад буцили. Жузлизирад
кІапІри гъярудес асухІебирар. Жузлизи лукІес яра ил
нясбирес асухІебирар.

Даргая -ес (-эс) – личил тамандирути глаголти. Вирау илдала замана белгибарес? Урдатурти хIурприра кадалтули, текст чеббелкIеная.

Замана хIясибли барсхIебикIуси, секIа баркъуди, хIял аргъахъесцун бузахъуси ва се барес? се бирес? ибти султала цалис жаваб дугуси глаголла формалис белгиа-гар форма или бикIар. Илала ахирти сари -ес (-эс):
се барес? – белчIес, вявэс;
се бирес? – бучIес, вявикIес.

ХIянчи 118. Назму саркъахъили белчIеная. Назмулизир цIударли декIардарибти дугъбачи суалти кадатирая, илди дугъба иргъахъуси баркъудила чиди замана чебиахъулил, пикрибарая.

Някъби

ИшбархIи вехIихъилра
ДекIти имтихIян дуцес:
БегIла гъалав вакIилра
Авлахъличи, хъу бацес.

Ухъна хъубзарли хъучи
ХIекъли дархъти «хатI»делкIун,
Амма дила гъаршани,
Тяп чIичIалаван, далкIун.

ХIери дукес кайира
Нуша шиниш майдайчи.
Къарчигъаван берхIира
Кабизур дай хIерейчи.

Дила папрус алкахъес
Алкун пирхикІ ухънани:
ГІяшуйзирад дарибти
Някъби чеира нуни.

– ХІед пирхикІ се бируси,
Суркдирен цализи ца,
ХІела някъбазирадли,
Валлагъ, дурадиркур цІа.

С.Рабаданов.

ХІянчи 119. ДелкІеная глаголти кІел тІайзи: **1-се барес?** ибси суайс жавабли диахъубли, **2-се бирес?** ибси суайс жавабли диахъубли. ЛукІеная, пикридухъи.

БучІес, белчІес, асес, исес, лайбакІес, лайбикІес, вявикІес, вјавэс, бедес, лугес, бедлугес, белкІес, лукІес, буцес, бурцес, вазес, изес, чедикес, чедииркес, бухес, бихес, вакІес, вашес.

ХІянчи 120. Се барес? Се бирес? ибти суалтас жавабтили диахъубли, гъарил глаголличи пикридарая ва делкІеная ца хІячила дегІти глаголти.

се барес? се бирес?

Буцес – бурцес, белшес –, вакІес – ..., белчІес – ..., чарухъес –....

Пикридарая ва делкІеная предложениеби.

ХІянчи 121. Гъарил глаголличи чула мягІна къаршители цархІилти глаголти пикридарая ва делкІеная.

Имѿабарес – камбарес, бархбяхъес –..., дуѿѿухъес – ..., вакѿес –..., чарухъес –..., къалабабарес – ..., алкес – ..., ахъбиѿс –..., чегъес –....

ХІянчи 122. Ахъбуѿес, гъалакбарес, къулайбарес, саѿс, гъамиѿс, чериѿс ибти белгиагар формала глаголтачил предложениѿи пикридарая ва делкѿеная. Икѿди глаголтала ахирти, уди тугъбарили, декѿардарая.

ХІянчи 123. Ишди глаголтачи къаршили белгиагар формала глаголти делкѿеная.

Дуѿѿикѿулра–дуѿѿикѿес, учѿулра – ..., далайикѿулра – ..., лехѿкахъилра –..., хѿерикѿулра – ..., вашулра –..., узулра– ..., хъусбяхъилра–..., ирзулра–..., бихулра–..., тѿашбалтулра–..., ганзикѿулра –....

ХІянчи 124. Белгиагар формала глаголти чеимѿѿадирниличил гъарил предложение чебиѿѿахъая.

Пайдалати насихѿятуни

Се бирес хѿѿжатли, арасили вирес багъандан?

Бархѿила режим ... Спортлизив Савли вайла чедила дярѿѿибти шинни Янила замана гъѿѿйличив ва конькабачив, лыжабачив Дуѿѿрумлизив хѿеркѿѿлизив ва урхъназив Мурталра заманаличив усес....

Жаваблати дугъби: бузахъес, узес, иѿсес, калхъес, изес, калхъес..

Режим – низам

ХІянчи 125. Пикридарая мягІна хІясибли мешути глаголти.

Разивиэс – ..., вякькайзес – ..., гьанкІухъес – ..., гьимукІес – ..., бачабархес – ..., къугъабиэс – ..., бацІбалтес – ..., бархъбалтес – ..., къагъизес – ..., къа-
лабайкес –

Мешути дугъби: якьинбарес, хІеризес, усаэс, вачавархес, жагабиэс, уббалтес, азадбалтес, мугълатагаризес, гьалакикес.

ИкІди глаголтала цаличил предложение цалабяхъяя ва белкІеная.

ХІянчи 126. Дугъбала цаладыхъуни цайти дугъбачил дарсдарая ва делкІеная. Чидни глаголтани се барес? ибси суайс, чиди глаголтани се бирес? ибси суайс жавабти лугули?

Чедибдеш сархес – чедиикес, хІукму къабулбарес – ..., къаниубли вакІес – ..., дуцІикІули вашес – ..., вамсурли кайэс – ..., шинни иркес – ..., хумарли кайэс –

Цалабяхъунала мерлар лукІути дугъби: хІукмубарес, къаниэс, дуцІикІес, бамсриихъес, шебирес, хумариэс.

ХІянчи 127. Диктантличи хІядурдия.

Ленинградла ДуцІрумла анхълизиб тІашли саби Иван Андреевич Крыловлис барибси памятник. Ил вахъхІи хІериубсири ил шагъарлизив ва сунела акъути сягІятуназив дигахъи ДуцІрумла анхълизи вашес ва илав къунзикІес. Ишав Крылов къаршиирки А.С.Пушкинчил. Галгубала дяхІярау кабиили, илди ихтилатбикІи.

Баяндарая деклардарибти дугьбала ахирти. Глаголти мягІнуби хІясибли цугдуца: **вашес** ва **къунзикІес**. Селичил илди сари-ургар мешудиркули, селичирли деклардиркули? Илди чиди формала глаголти сари?

ГЛАГОЛ ЗАМУНТИ ХІЯСИБЛИ БАРСБИКІНИ

Сегъунти хІябал замана лера глаголла? Селичил декларбулхъули ца замана цархІиллизибад?

ХІянчи 128. БелчІеная саркъахъили.

ХІеб садаиб, хІеб садаиб,
Ванадеш нушаб хили!
Яни бебшиб, яни бебшиб,
БугІярдеш арбухили.
БерхІи бакІиб, дяхІи бацІиб.

ДяхІи-уркад вавни дакІиб,
Шинишдиуб диркъурби.
Арцантира чардухъи сар
Жагати макъамтачил.
ВацІа кІали бакІили саб.

ГІ. Абу-Бакар.

Назмулизир глаголти даргая. Белгибарая, чиди заманализир дакІилил глаголти. Ил селичил кабизахъес ви-рара? Пикридарая 2 предложение: гъаннала заманала глаголличил ва убла заманала глаголличил.

ХІянчи 129. Предложениеби делчІеная, глаголти декІардарая. Глаголтани иргъахъуси баркъуди, чиди заманаличи хасбирулил, пикрибарая.

ВатІа ЧІебяхІси дергълизиб нушала гІярмия чедибикиб. Нушала улкала халкълис эркинни хІербиэс дигули саби. Нуни школала гъала галгуби удалтас. Нушани вацІализи экскурсия дурабуркІехІе.

Глаголти замунти хІясибли дарсдикІар. Илдала лер хІябал замана: гъаннала, убла ва гІурла.

гъан.зам.	убла зам.	гІурла зам.
се бирулра?	се барира?	се бириса?
Ну киноличи	Ну киноличи	Ну киноличи
аркъулра	вякъунра	аркъяс

ХІянчи 130. Глаголти имцІадирули, ишди предложениеби черделкІеная.

Ишдус нушала колхозла унхъри дебалягъ. ЦІедеш луцІуси замана колхозла председатель школализи ... Илини колхозлис кумекбарахъес ... Школала дурхІнани дахъал цІедеш ... Колхозла хІякимтани школьникунас халаси баркалла ...

КІунтІрала мерличи кадалтуту дугъби: далцІун, вакІиб, тиладибариб, дерхъиб, багъахъур.

ХІянчи 131. Замунти хІясибли дарсдикІахъули, делкІеная ишдигъунти глаголти: гъайикІес, учІес, лукІес, суратикІес, улхъес, далайикІес, пикрикІес, ицес, вявикІес, шалабикІес, вашес.

гъан. зам.	убла зам.	гІурла зам.
гъайикІудра	гъайикІира	гъайикІус

ХІянчи 132. Чедибикиб, аркьулра, удибиру, ахъбурцу, гъанбикиб, хІердирулра ибти глаголти дакІахъили, предложениеби пикридарая. Глаголтачи суалти кадатирая ва глаголли иргъахъуси баркьуди чиди заманализиб кабиркулил, бурая.

ХІянчи 133. Гъаннала, убла ва гІурла заманала глаголтира дакІахъили, хІяб-хІябал предложение пикридарая ва делкІеная.

ХІушани баладаяв?

ДуцІрум усадли, янилизив висуд.

Жагати дяхІличир арши хІедухъар, хъуцІрумачир галгуби хІедашар.

ХІянчила бехІбихъуд жапаси, ахир муриси бирар.

ГушхІейубсини къацІла къадри хІебала.

Душмайзибад ВатІан мяхІкамбара, уркІила дигІяндеш – лявхъазибад.

ХІянчиличи багълали вехІихъи, амма, хІянчилизи ахъили гІергъи, ил чІумали буца.

ГІяхІси баркьудилис шабагъат – ил хъараахъни.

Къалабали барибси секІал бахъхІи кахІевлан.

Адам жамигІятла дурав виэс хІейрар.

Адамтала ургавцун адамли сунени сай вагъес вирар.

Адам сайцун хІериэс хІейрар, илис жамигІят хІяжатси саби.

Адам гІякълучевси виубцад, илини илцадра духути адамтира бургу.

ГЛАГОЛЛА ГЪАННАЛА ЗАМАНА

Гъаннала заманала глаголли сай гъайикІухІели ка-
биркули лебси баркъуди иргъахъу. М а с а л а: Нуни
газета бучІулра. ХІуни газета бучІулри. АсхІябли газета
бучІули сай.

Гъаннала заманала глаголличи ишдигъунти суалти
кадатес виар: **се бирулра? се бирулри? се бирулрая?**
се бирули?

ХІянчи 134. КІунтІрала мерличи гъаннала заманала глаголтира
имцІадирули, предложениеби черделкІеная.

Колхозла авлахъличир хІянчи ...

Лебил халкъ авлахъличи ...

Комбайнаба арши ...

Машиналичир ризкъи ...

ДурхІнани колхозлис ...

Дила неш-дудеш гъар бархІи хІянчила...

ХІянчи 135. БелчІеная. Гъаннала заманала глаголти даргая ва
черделкІеная.

Къядга

Къядгали къадала бухІнаб дерубти дахъал кІари лер-
си цІябси мер баргиб. Хиб илини кІантІити къар. Сунес
кІантІиси ухъа бариб ва бархІи ахъайчи рахІятли буска-
ун. ЦІябдиресдяхІиб. Къядга вяшбухъун. Илини сунела
чІартІа цІудара бяхІ дурабатур, шалати хІулби абхъиб,
сахъли лихІби дянгаиб. СунтІ-сунтІбикун къядга, агарал
чинабалра селра. Батбихъиб вацІализибад бикесилигІиб.
Ма, буциб ца цІуздаги, бергун. БакІиб къядгас чІичІа

гягІ. Ил агъула чІичІала сабри, къядга урехи агарли
илабяхІ бетухъун. Къядгали сунела цулбачил чІичІала
буциб ва бекІахъиб, гІур сунела пукъализи арбякъун ва
ряхІятли бусаун.

ХІянчи 136. Бацун, убатур, кабяхъиб, хІербариб, ахъбуциб ибти
глаголти гъаннала заманала глаголтачи шурдатирая ва илдачил пред-
ложениеби делкІеная.

ХІянчи 137. Хабар белчІеная. Илизирти глаголти даргая ва гъан-
нала заманаличи шурдатирая.

ВацІализир къукъу-лямцІ

ВиштІахІели ну вацІализи хъярбачи вякъунра.
ВацІализи ветаили, хъярбира дучили, нура чарухъес
валкъаайчи, рахли цІяббуб, къукъуиб, картІиб заб. Ну,
урухиубли, ца халаси мигла галгала уди кайира.
ЛямцІбухъалри, нуни хІулби гІянчІдикІаси. Серил дила
бекІлизичегиб. Ну, къагъиубли кайкили, тѣп заб та-
мандиайчи, илав калунра.

ЧеваргъибхІели вацІализирти галгубачирад шин
кІантІдикІулри, арцанти дучІулри, бархІи ахъилри.
Баргили дила къапІара, касили дила хъярбира, нура
дуцІли хъайгІи вакІира.

ХІянчи 138. Гъаннала заманала глаголтачилти предложениеба-
зибад цалабяхъибси школьникунала гІямруличила биштІа-биштІаси
сочинение белкІеная.

ХІянчи 139. Гъаннала заманала глаголти дакІахъили, чумал
предложение пикридарая ва тетрадунази делкІеная.

ГЪАННАЛА ЗАМАНАЛА ГЛАГОЛТАЧИЛА БЕЛЧІУНСИ ДАИМБАРНИ

ХІянчи 140. Белчіеная.

ХІеб

АтхІебла савлила аргъ
Зайили бучІули саб,
Мармартяш къаркъа къяйда,
Амъурли шалали саб.

ХІуркІби, вацІа, къадурби,
БерхІила шалалиур
Къугъали шиниш рангли
ЛямцІдикІули чедиур.

Гъава булхІехъули саб
Чякнала ахъти тІамра.
Бухъи кунк цІуэри саб
БикІули цІакъра хІярхІра.

Шиниша дубуртачир
Вавни пишдирхъули сар,
БерхІиличи илдани
Саламти дурхъути сар.

Р.Рашидов.

Назмулизир даргая гъаннала заманала глаголти ва
тетрадунази черделкІеная.

ХІянчи 141. БелЧіеная.

Поездличив аркѣхІели

ГІянручІла цатамашаси шала улкѣайла бухІнайхъули саби, ва гѣанкІли дила хІулби багълали кІапІкадирули сари. Поездли ну пергерли гардирулра...

СецадхІи усасил хІебалас, амма велхІунхІели, урчІемал сягІят диркулри. Улкѣайлавад хІерикІулра. Дураб гІебшнила аргъ саби, амма гІебшни дахъ къугъати сари. ХІунтІенкадиубти вацІала сиртани, адам хІерирути ибти мерани-алав диркѣбикуначир тугъли гѣайдиубти къуз-ри ва бутІри, жинсла кѣулала хІункѣри – лерилра илда-ни паргъатти, тухъти баракатла гІямру гѣандиркахъу-ли сари.

Текстлизир гѣаннала заманала глаголти даргая ва тетрадунази черделкІеная.

ХІянчи 142. Ишди глаголти гѣаннала заманализир диэсли, предложениеби пикридарая ва делкІеная.

ВакІира, белкІунра, уббатурра, бебшиб, цалабикиб, арякъун, алавбуциб, ахъбуциб, учибикиб.

Г І и б р а т: Ну школализи аркѣулра.

ХІянчи 143. БелЧіеная назму. Глаголти чедаахъая, бурая, илди чиди заманализир дакІилил.

ХІеб

Гъар шайчир хъярхъти хІуркІби
Ка...ухъи сар кІух - или,
Чула тІама-гѣамали

Дубурти дулхІехъули
Дубурличир вава-къар
Ахъдиэс дуз...ли сар,
БерхІила нурлиур шин
Пар - или ухули сар.
Хъубзури авлахъличи
Дураб ... хъули саби
Д ... мж ...р унхъразир хІянчи.

Кь. МяхІяммадов.

КІунтІрала мерличи лайикъти хІурприра кадалтули,
глаголти черделкІеная.

ХІянчи 144. БелкІеная. ДекІардарибти глаголти гъаннала зама-
нализир дашахъули, изложение белкІеная.

Къарциндешра гашира чекасес хІейубли, дила халал
узи Юрхан шилизивад арякъунсири. Илини ГІярасайла
дахъал шагъурти къяйцІдариб. Велкъес къацІлис хІянчи
баргес хІейуб. Ахирра-ахир, илини Петербурглизи урду-
бахъиб. ВецІал дус иличибад сегъуналра хабар бакІибси
ахІенри. ВецІал дус гъарил бархІи дила нешли цадехІ
дугъбачил бехІбирхъи: «Балагъ-къадарлизивад дила урши
верцахъа, жан аллагъ». ВецІал дус гъарил бархІи дила
нешли цадехІ дугъбачил таманбири: «Дила урши ара-
сагъли чарухъахъен, жан аллагъ». Аллагъли дила нешла
тилади къабулбарили урги. Яра узини нешла тІама
бакъили урги. ВецІну цара ибил дуслизиб нушала
Юрхайчибад кагъар касира.

М.Расулов.

ГЛАГОЛЛА УБЛА ЗАМАНА

Убла заманала глаголли сай гъайикІес гъалаб каби-
кибси анцІбукъ, баркъуди иргъахъу.

Масала: Ну шагъарлизи вякъунра.

ХІу шагъарлизи вякъунри.

Мурад шагъарлизи вякъун.

Убла заманала глаголтаци ишдигъунти суалти када-
тес виар: се барира? се барири? се барирая? се бариба?

ХІянчи 145. Назму саркъахъили белчІеная. Убла заманала гла-
голти даргая, илди, гъаннала заманалайчи шурдалтули, черделкІеная.

ШятІахъи

ШяллитІ чІяжбулхъахъира,

Касили кисалабад.

Ил сабри наб цаибил

Дила дудешла савгъат.

Дунъя гІелабуршира

УрхІагар агурбази.

ЧІака делхъли кайира

ХъанцІа закла дайлизи.

ХІера, ну ишбархІира

ВакІилра хІеркІла дубла,

БахъхІи дурахІесибси

Касира шяллитІ гІурра.

М.ХІямидов.

ХІянчи 146. «Нуни тІабигІят мяхІкамбириула» бикІуси темала чебкад се барири? сели виркѣади? ибти суалтас жаваб лугути глаголти дакІахъили, хабар цахІнабяхъя.

ХІянчи 147. Се бариба? Се бири? ибти суалтас жавабти лугесли, ишди глаголти кІел тІайзи делкІеная: ибес, тІяхІикІес, тІяхІухъес, бирбес, вјавѣс, вјавикІес, вирхаѣс, вирхес, учІес, багъес, балес, арцес, урцес.

ГІибрат: гъан. зам.
учІула

убла зам.
учІира

ХІянчи 148. БелчІен текст.

Жяр нушала мер-мусаличи дебали балбикибси галга саби. Ил чинаб-дигара башар. Къяли чеббяхъили, зярхІси ванзализи къузкабаралли, илини мякъи датиу. Нушала улкъайла гъаларад кІел жярла галга дакІилри. Илдала къялуби ванзализи къямкаурлири. Савли илдала кІарачир лямцІдикІули маркала кІунтри чедиулри.

А. Сулайбанов.

Текстлизир гъай селичила сари? Авторли селичила бурули? Даргая глаголти, белгибарая, илди чиди заманализир дакІилил.

ХІянчи 149. Саркъахъили назму белчІеная.

Чебудуси маза

(басня)

Лебсири дурзамлизиб
Чебудуси ца маза;
ЦархІилти тІашлихІели,
Илини ихъиб муза.

Дурзамла дайлизиб ил
Хлебуи, гъалабулхъи
Яра гъелакабулхъи,
Декларбулхъи, бетихъи.

Цархилти дугухъели,
Хлебугули кабилхъи.
Цархилти дусухъели,
Бугес или, абилзи.

Буклунна балкла тѣрхъа
Чуйнара илис чейги.
Чебудуси мазали
Сунела ахир баргиб:

Гъачам бархѣхъ гъаббердиб
Маза дурзамлизибад,
Берцуди баргхѣбаргиб
Гушдиуб буцѣазибад.

С.Рабаданов.

Чебудуси мазалис се бѣтаура? Чебудуси маза сегъун-
ти адамтачил цугбуцес вирара?

Назмулизир убла заманала глаголти даргая, илдачи
суалти кадатирая, глур тетрадунази черделкѣная.

ХІявчи 150. Ишди глаголти, гъаннала ва убла заманализир
даклахъили, кѣл тѣайзи делкѣная:

цаибил тѣайзи – гъаннала заманала, кѣибиблизи –
убла заманала: тѣашизес, дуцѣулхъес, дуцѣухъес,
тѣашилзес, хѣериэс, ахтардибарес, вяшбухъес, лехѣкахъес,
лехѣкайхъес, ахъбуцес, гъакѣбарес.

ГІ и б р а т:	гъан. зам.	убла зам.
	хІериули сай	хІерири

ХІянчи 151. Ишди убла заманала глаголтачи кършити мягІнала дегІти глаголти пикридарая ва делкІеная:

айзурра, ватихъира, арякъунра, ахъбуцира, абхъира, дуцІухъунра, гымукІира, кыдавиубра, къалабаикира, вемжурра, велкъунра, разириублири.

ГІ и б р а т: айзурра – кайира.

ХІянчи 152. Ишди белгиагар формала глаголти убла заманала глаголтачи шурдатирая ва илдачил предложениеби делкІеная.

ЯхІбарес, пикриухъес, къабуликес, чарбатес, лямцІбухъес, гъаббухъес, тІашбизес.

ХІянчи 153. Назму саркъахъили белчІеная. Назмулизирти глаголти чиди заманализир сарил, бурая.

ДелхІунраяв, дубурти!
 Эгъе-гъей, делхІунраяв,
 ТалихІчерти дубурти,
 Дила уркІила гъавлис
 Ламира цІакъра гибти!
 Жагъдешли кепварили,
 ХІекъли къагъизурхІели,
 ХІушазири буруси
 Дурхъаси дард итхІели,
 ХІурхъала рангти хІяндеш
 ДахъдикІуцад бекІличир,
 Дила гІямрула мурад
 Уржили саб хІушачил.

Эгье-гьей, делхІунраяв,
Ну айкьурти дубурти,
Ахъли далайикІахъес
Тіама ва ари гьити!

Р.Рашидов.

ХІянчи 154. Убла заманала глаголти имцІаливан пайдаладиру-
ли, хІебла замана школала анхълизир дурадуркІути хІянчиличила
сочинение белкІеная.

ГЛАГОЛЛА ГІУРЛА ЗАМАНА

Гіурла заманала глаголли сунечила гъай диубли
гІергъи кабиркуси баркъуди, анцІбукъ иргъахъу.

Нуни дарс бучІас.

ХІуни дарс бучІад.

Рашидатли дарс бучІа.

Гіурла заманала глаголличи ишдигъунти суалти ка-
датес вирар: се бириса? се бирехІе? се бирида? сс бири-
дая? се биру?

Нуни ВатІайс къуллукъбирис.

Нушани ВатІайс къуллукъбирехІе.

ХІуни ВатІайс къуллукъбирид.

ХІушани ВатІайс къуллукъбиридая.

Итдани ВатІайс къуллукъбиру.

ХІянчи 155. Хабар белкІеная ва илизирти Гіурла заманала гла-
голти черделкІеная. Илди глаголти гъаннала заманализир дакІахъили,
ца-ца предложение делкІеная.

Москва

Нушала улкала лерилра гъундури Москвализи аркъ-
ян. Москвализир илди дархдиркур. Москвализиб лебси
ца вокзал ахІен, я кІел ахІен—арагІерли урчІемал сари.
ГІергъити дусмала духІнар илдачи гІурра кІел вокзал
имцІадиуб: гъавала вокзалра хІеркІла вокзалра. Гъанна
хІуша Москвализи дакІес дирудая дегълара, гъавалара,
шиннара гъундурикад. КъалабаикІусилис гъаваличив
арцни селичибалра гІяхІси саби. Самолетунира, поезду-
ни къяйда, расписаниели кабизахъурси замана, дурусли
садиур.

ХІянчи 156. Ишди убла заманала глаголти дакІахъили, 3 пред-
ложение пикридарая ва хІушала тетрадунази делкІеная:

ВакІиб, узусири, учІи, кайиб.

ГІ и б р а т: Узи шагъарлизивад хъули вакІиб.

ХІянчи 157. ГІурла заманала глаголти дакІахъили, чумал пред-
ложение пикридарая ва тетрадунази делкІеная.

ХІянчи 158. Хабарлизирти убла заманала глаголти даргая, илди
тетрадунази черделкІеная, кІинайс гІурла заманала глаголти дета-
ахъая.

Дила урши

(Олег Кошевойла нешла хабар)

Дила урши Олегла ца Гриша бикІуси гъалмагъ леври.
Олегра Гришара арагІеб бархІи анхълаб хІязтабиркъули
бири. Гришала неш имцІали зягІипли рири, дудеш ви-
алли агарсири. Гриша вайтІа хІерирулри.

Нуни майла байрамлис Олеглис кѣл хѣва дарира. Олеглис илдазибад ца дебали дигиатур. Ил хабарагарли набчи гъамиуб ва гъайухъун:

— Гъанна дила кѣл хѣва лер, амма Гришала цалра агара, рашигу, неш, ил гѣяхѣсигъуна хѣва Гришас бедлугехѣе. Ну къабулрикира. Олегли, дебали разиубли, ил хѣва сунела гъалмагълис бедес арбухиб.

Хѣянчи 159. Кѣлунтѣрала мерличи далдиркути гѣурла заманала глаголти имѣѣадирули, предложениеби черделкѣеная.

1. Узуси ... 2. Ункъли узадли, гѣяхѣси сабухъ ... 3. Умуси гъаваличи дураулхъадли, хѣла арадеш ... 4. Физкультура дирадли, лапни ... 5. Къияндешуни цашалдарес багъадли, хѣла мурадличи ... 6. Хѣуни хѣла гъай ункъдарес къасбарадли, ункъли пикруми дуресра ... 7. Газета бучѣадли, дунъяличир сегъунти анѣѣбукъуни лерал ... 8. Азгъиндеш буцадли, ... 9. Папрус битѣикѣадли, уркѣи-михъири изайзи...

Ка д а т е с д у г ъ б и: кайсид, чѣумадирар, диркур, баланируд, пучируд, балад, укар, цѣакъдирар, виуд.

ГѣУРЛА ЗАМАНАЛА ГЛАГОЛТАЧИЛА БЕЛЧѣУНСИ ДАИМБАРНИ

Хѣянчи 160. Хабар белчѣеная. Убла заманала глаголти даргая ва гѣурла заманала глаголтачи шурдатурли, черделкѣеная.

Мухтар

— Мѣлгѣунти! — Мухтарли сунела гъала чѣикъбитѣунси беѣѣ къяшли къужбариб. Арбякъунси жумѣгѣ буѣѣани нушала хѣенкълизирад кѣл къача кадушиб, ардякъунти

дургъбазиб кІикъяшан жанивартани дила кІел урши кабушиб! Сецад талихІчевси вираси гъари ну, гъанна илди нуни мицІирли чебиули виасри.

Мухтарли къапІа-хІяка пяхІдариб, хІякала хъарлизи бушкили, ханжал къартІайзи кабакІиб, жаниварличира тудяхъили, хъайгІи чарухъун.

ГІАбу-Бакарлайзибад.

Буралаби ва багъираби

Дахъал дигуси – тякулхъан.

Маза ара-сагъли кални, хяличи хІеръили бала.

УркІи къакъабарили хъалли, къацІ гъарзахІебирар.

ЯхІла вегІ жявли ухънавиур.

Ца къя ниълира ужули, диъбара укес хІейрар.

Къиянагарли бакІибси баракат агарли аркъян.

Адамдеш дицес вирар, амма асес хІейрар.

Лацлара лихІби дирарну, гІела-гъала хІерхІеили, гъай мабурид.

Някъби агара, къяшми агара, амма някъишбикІес бала. (яни)

ХІянчи 161. Убла ва гІурла замунтазир дакІахъили, делкІен ишди глаголти: узес, гъайикІес, хІерликайэс, вакІес.

ИкІди чедир делкІунти дугъбала цаличил предложение пикрибарая ва тетрадунази белкІеная.

ХІянчи 162. БелкІеная текст.

Хадижатли гъар бархІи хъулри умудирули сари. Хъулри умударили гІергъи ил азбарлизи карицІули сари ва азбар-гІая умудирули сари. Гъарил ваяхІ сунес хасба-

рибси мерличи кабирхъули сари. Илала гІергъи хъули арицІули сари ва беркала хІядурбирули сари. Илли лерил секІал сунела заманаличир дирули сари.

Текстлизир глаголти даргая. Илди, гІурла заманализир дакІахъили, черделкІеная.

ГЛАГОЛЛА ХІЯБАЛРА ЗАМАНА

ХІянчи 163. БелчІеная таблица.

Замунти хІясибли глаголти дарсдикІни

Белгиагар форма	Гъаннала замана	Убла замана	ГІурла замана
се барес?	се бирули?	се бариба	се биру?
далайикІес	далайикІулра	далайикІира	далайикІус
арзес	ирзули сай	арзіб	ирзу
усес	усули сай	усаун	усалан

Таблица хІясибли ишди глаголти замунти хІясибли дарсдара: вашес, тІяхІикІес, дуцІикІес.

ХІянчи 164. Замунти хІясибли дарсдара ишди глаголти: хІянчили виркъес, хІерли кайэс, гъайикІес. ДелкІеная. Таблица хІясибли ахтардидарая. ИкІди глаголтала цаличил предложение цалабяхъая.

ХІянчи 165. Узулра, учІулра, ариулра ишти глаголти, хІябалра заманализир дакІахъили, предложениеби пикридарая ва делкІеная.

ХІянчи 166. БелчІеная.

Хъубзар ва батрак

Ца ухъна хъубзар сунела батракличил мураличивад чарирулри. ВацІализивад ил сунела хъули лывкъулри.

Хапли илдас синка цугбикиб. Илдачи синка чебухъун. Иллини хъубзар, ахъуцили, ванзализи вяхъиб, пяхъяр-вариб, вяхес бехІбихъиб.

«Дила дигуси Степан, верцахъаба!» – тиладиикІули сай ил синкала удивад сунела батраклизі.

Къуватчевси батрак ветухъун ва чейзурли синкас барда бяхъиб, синкала байхъала бекІ чеббушиб. Синкали чІярбяхъиб ва кабикили бебкІиб.

И.А.Крылов.

Текстлизир глаголти даргая ва илди чиди заманала сарил, белгибарая.

ХІянчи 167. Чузир хІябалра заманала глаголти лерти хІяб-хІябал предложение пикридарая ва делкІеная.

ХІянчи 168. Игъес, уцес, гъабуцес, учибахъес, пикриухъес ибти белгиагар формала глаголти, хІябалра заманализир дакІахъили, предложениеби делкІеная.

ГІибрат: ХІусей тап игъуб. ХІусей тап иргъули сай. ХІусей тап иргъу.

ХІянчи 169. Текст белчІеная. Глаголти черделкІеная ва, чиди заманала сарил, бурая.

Нешли дучІути далуйтани ва дурути хабуртани Батирайличи халаси асар бирулри. Батирайла нешла жагаси тІама ва далуйти цаладирхъес устадеш дири.

Иллини дахъал хабурти, буралаби, багъираби, айтуби, далуйти дали. Илбагъандан Шамайли дурутаци лехІбизес ГІямархъалачи бахъал адапти цахІнабирки. Далуйти халаси устадешличил дучІни багъандан, шилизиб Бати-

райла нешлис Лайла-Шамай бикІи. Шамай пергер уста
рири балгни дучІесра. Шилизиб вайла анцІбукъ биалли-
ри, ил къутІкьули риси. Илала жагаси тІамали ва дучІути
дугъбала пасихІдешли лебилра хІяйранбирахъи.

С.ГІялиевала хІясибли.

ГЛАГОЛ БЯХІЯНИ ХІЯСИБЛИ БАРСВИКІНИ

Ну шагъарлизи аркъулра.

Нуша шагъарлизи аркъулра.

ХІуша шагъарлизи аркъулири.

ХІуша шагъарлизи аркъулрая.

Ит шагъарлизи аркъули сай.

Итди шагъарлизи аркъули саби.

Глагол бяхІяни хІясибли барсбикІар. Глаголла дирар
хІябал бяхІ. Цаибил бяхІ: ну лявкъулра, вакІира, лявкъ-
яс (цалихъ), нуша ляркъулра, дакІира, ляркъехІе (дахъ-
лихъ). КІиибил бяхІ: хІу лявкъулри, вакІири, лявкъяд
(цалихъ), хІуша ляркъулрая, дакІирая, ляркъядая (дахъ-
лихъ). ХІябъибил бяхІ: ит лявкъули сай, вакІиб, лявкъ-
ян (цалихъ), лябкъули саби, бакІиб, лябкъян (дахълихъ).

ХІянчи 170. Хабар белчІеная.

Гъабзадеш

Нушани нушала дудешхъала, хала дудешхъала
гъабзадешличи халаси пахру бирулра. Илдани нушала
вавалибяхъибси ВатІайчи дугадарибти душама цулби
чуйнара къябдариб. Илдала бузерила халати гъунарта-
нира адам тамашаирахъу.

Дагъиста адамтала халати гъунартачила учительли
гъаман нушаб хабурти дуру. Нушанира нушала дудеш-
хъалигъунти детаэс уркИи-уркИилабад къасбирулра.

Хабарлизирти глаголти черделкІеная ва илди чиди
бяхІла сарил, белгибарая.

ХІянчи 171. Удир гъандушибти предложениеби ишкъяйда
делкІеная: 1) цаибил бяхІла цалихълизир; 2) кІиибил бяхІла дахъ-
лихълизир; 3) хІябъибил бяхІла дахълихълизир.

ДуцІрумла замана нуша экскурсияличи дякъунра.
БегІлара ахъси дубурличи черяхІдикира. Иладли алав-
чарти мер-мусаличи хІердизурра. Бахъ жагасиригу нуша-
алавси тІабигІят!

ХІянчи 172. БелкІун, белчІун ибти глаголти, хІябалра бяхІла
цалихълизир ва дахълихълизир дакІахъили, предложениеби пик-
ридарая ва делкІеная.

ХІянчи 173. «СуратикІулра» ибси глагол хІябалра бяхІлизиб
бакІахъили, предложениеби пикридарая ва делкІеная.

ХІянчи 174. Назму саркъахъили белчІеная.

Адамлис

Дила ВатІанна адам,
ХІела къатавтар някъбас,
ХІела сахават някъбас
Нуни деза дирулра.

ХІела някъба ахІену,
Дила зяхІматчи адам,

Хіела къайгъна ахІену,
Дила къайгъичев адам!

Урехи агарри хІу,
Дунъя хІербикІар хІечи,
Кадирхъулри гъундури
Гъарахъти зубартачи.

Р.Рашидов.

Назмулизирти глаголти чедаахъая ва илди чиди бяхІла сарил,бурая.

ХІянчи 175. Автоколонна, аэродром, истребитель, парашют, госпиталь, «Мессершмит», «Макки – 200» ибти дугъбала мягІна учительла кумекличил баянбарая.

ГЛАГОЛЛА БЯХІЛА АХИРТИ

Гъаннала замана

- | | |
|-------------------|--------------------|
| 1. Ну лукІулра | Нуша лукІулра |
| 2. ХІу лукІулри | ХІуша лукІулрая |
| 3. Ит лукІули сай | Итди лукІули саби. |

Убла замана

- | | |
|--------------------|---------------------|
| 1. Нуни белкІунра | Нушани белкІунра |
| 2. ХІуни белкІунри | ХІушани белкІунрая. |

Гъаннала ва убла заманала цаибил бяхІла цалихълизиб ахир -ра саби.

КІиибил бяхІла цалихълизиб ахир -ри саби, дахълихълизиб биалли -рая саби.

ХІябъибил бяхІлизиб глаголла ахир агара.

Гурла замана

- | | |
|---------------|----------------|
| 1. Ну лукIас | Нуша лукIexIe |
| 2. XIу лукIад | XIуша лукIадая |
| 3. Ит лукIар | Итди лукIар. |

Гурла заманала цалихъла цаибил бяхIла ахир -ас саби, дахълихъла биалли -exIe саби.

KIиибил бяхIла цалихъла ахир -ад саби, дахълихъла биалли -адая саби.

XIябъибил бяхIла ахир агара, илабси -ар суффикс саби.

XIянчи 176. Глаголтала уди тугъра кайули, предложениеби черделкIеная.

Наб ВатIан дигахъис. Муса вацIализи арякъун. Зак гъагулта буциб. Мурадли шилизи вьвдеш хиб. Совхозла тIутIи садаиб. ДурхIни школализи башар. Совхозла ял-чни ункъли бузар.

XIянчи 177. Цаибил бяхIла глаголтачил хIябал предложение, KIиибил бяхIла глаголтачил кIел предложение ва хIябъибил бяхIла глаголтачил кIел предложение пикридарая ва делкIеная.

XIянчи 178. БелчIеная текст.

Нушани сут бархIи вацIализи экскурсия дураберкIира. ВацIализир нушани жура-журала вавни далцIунра ва халуби дарира. Дила гъалмагъ Заурлис жагъси гIинцла галга лебIеб жагабизурлири. Иличирад хIулби чери-сули ахIенри. БерхIи буцIарбикIулри. Хъули чардухъес замана байлри. Хапли дягI бухъун, зубри гъагулта

дуциб, чекъур заб. Нуша халаси мигла галгалиу чукур-диубра. Заб тІашдизурмад, нуша хъули чардухъунра.

Даргая глаголти. Белгидарая илдала ахирти. Бурая, илди чиди заманала, чиди бяхІла сарил.

ХІянчи 179. Кабихъиб, усулра, убушиб, чебушиб ибти глаголти хІябалра заманализир бяхІянардарая, бяхІла ахирти, уди тугъаили, декІардарая.

ХІянчи 180. Хабар белчІеная.

Саламтала кагъар

АхІерси гьалмагъ Амир. ХІечи иш кагъар лукІуси хІела гьалмагъ, Муса сайра. Гъу, Амир, сен саби хІела арадеш? БегІти сена? Гъанна хІу сен-сен учІулри? Гъа-лав къяйда ункъли учІули ургуд. Дилара ца саби «хІябла» лебси. Амма четвертьла ахирлизиб цалра бирхІебирар.

БелкІен набчира кагъар. ХІуни делчІунти жузачила гъанбушес хъуммартид. Ну хІела жавабличи хІерли вирус. Дила саламти дурес хъуммартид хІела бегІтазира, юлдашуназира.

Нура хІела гьалмагъ, Муса.

Глаголти черделкІеная, илди чиди бяхІла ва чиди заманала сарил, белгибарая.

Гъаннала замана

БяхІяни	Цалихъ	Дахълихъ
I-бяхІ	Ну узулра	Нуша дузулра
II-бяхІ	ХІу узулри	ХІуша дузулрая
III-бяхІ	Ит узули сай	Итди бузули саби

Убла замана

I-бяхI	Нуни белчIунра	Нушани белчIунра
II-бяхI	XIуни белчIунри	XIушани белчIунрая
III-бяхI	Итини белчIун	Итдани белчIун

ГIурла замана

I-бяхI	Нуни ирис	Нушани ирехIе
II-бяхI	XIуни ирид	XIушани иридая
III-бяхI	Итини иру	Итдани иру

XIянчи 182. Ишди предложениеби, цаибил бяхIла дахълихълизир ва хIябъибил бяхIла цалихълизир дакIахъили, делкIеная.

Ну имцIали вацIализи вашус. Галгала уди кайили, бамсриихъис. ГIяхIти хъярба укас. Къугъали дучIути чякнала тIамрачи лехIилзас. Халал кеп чебаили, ну хъайгIи чарирус.

ГIибрат: Нуша имцIали вацIализи дешехIе. Ит имцIали вацIализи вашар.

XIянчи 183. Цаибил бяхIла, кIиибил бяхIла ва хIябъибил бяхIла глаголтачил кIикIел предложение пикридарая ва тетрадунази делкIеная.

ГЛАГОЛ СУЩЕСТВИТЕЛЬНОЕЛИЧИЛ ЛУГИЛИЗИБ БАЛБИРКНИ

Дарган мезлизир дахъалгъунти глаголти лугIи хIясибли дарсдикIар.

цалихъ	дахълихъ
ахъбуциб	ахъдуциб
чарбариб	чардариб
гъайбариб	гъайдариб

ЛугІи хІясибли дарсдикІути глаголти сари дархда-
сунти существительноебачил лугІилизир далдиркур.

цалихъ

Урши вакІиб

Рурси ракІиб

Машина арбякъун

Галга убатур

дахълихъ

Уршби бакІиб

Рурсби бакІиб

Машинти ардякъун

Галгуби удатур

ХІянчи 184. Хабар белчІеная.

БуцІи

ХІямид чеваргъиб. Мякълаб тІяхІбухъес хІядурли хя
тІашлири. Хя гъимили гъур-гъурбикІулри. ХІямидли
бугІярси аргълизиб зайбикІуси авла тІама бакъиб.

ДяхІили кІапІкабарибси алгъай шайчибси дякъкад
аркъухІели, ХІямидли чумал бецІ чедаиб. Илдала хІулби
цІа къяйда ухулри.

З. Зулпукъаров.

Глаголти даргая. Белгибарая, чидни глаголти суще-
ствительноебачил лугІилизир далдикилил. Чучил дал-
дикибти существительноебачил глаголти черделкІеная.

✓ ХІянчи 185. Глагол существительноеличил лугІилизиб балби-
кахъили, чумал предложение пикридарая ва делкІеная.

ХІянчи 186. Назму саркъахъили белчІеная.

Ну чарулхъас хІечи, дила урши

Дургъбазиб алхунти

Халкъла вакилти

ГІянжилизи ахІен

ХІярибихъибти.
Илдала мавзолей
Марти уркІбази
Хъурабарили леб
Чула дурхІназиб.

(Халкъла далайлизибад)

Глаголти даргая. Белгибарая, илди чидни существительноебачил лугІилизир далдикилил.

ГЛАГОЛЛИЗИР ИНКАРЛА ПРИСТАВКАБИ

ХІе-, хІя-, ма- – глаголла инкарла приставкаби сари.
Масала: хІебирис, хІябярГІяс, мабирид.

ХІянчи 187. Предложениеби делчІеная.

ХІянчи дигуси адам мурталра узар. ХІянчили адам-
лис разидеш лебху. ХІянчили юртлизиб давла имцІа-
бикІахъу.

ХІуни секъяйда иргъулри кІиибил предложениела
мягІна? Текст белчІен. Уди тугъкаили, глаголти чеда-
ахъа.

Сегъуна приставка чебалта, эгер гъай азгъин адамли-
чила диалли? БелкІен.

Азгъин адамлис хІянчилииркъес хІейгахъу. ХІянчили
илис разидеш хІеху. Азгъиндешли юртличи къарцин-
деш лерху. ХІянчи хІебирути адамти халкълис хІейгахъу.

Инкарла приставка **ма** – мурталра а-личил лукІуси саби. М а с а л а: мабирид, мабучІад, мабакІаб.

Инкарла приставка **хІе** – имцІагъунти хІяланазиб е-личил лукІа: хІебирис, хІекІиб, чехІебиэс, хІебикиб ... Ца-чумал глаголлизиб биалли приставка хІя лукІа: хІякъян, хІякъяс, хІябяхъяб, хІябяргІиб.

ХІянчи 188. Хабар белчІеная.

ВацІала гьалмагъ

ВацІала гьалмагъ ветаи ва саби мяхІкамбара. ВацІала гьалмагъли галгуби хІядялча, галгубачирад кумри я кІари ахІевду. ВацІала гьалмагъли арцантала пукъни заяхІедиру. Заралчиба кам заябиру ва кІари дуга. ВацІала гьалмагъли, цІахІедикахъес багъандан, вацІализиб цІа ахІебилкъа.

И. МяхІяммадовлайзибад.

Чузир инкарла приставкаби лерти глаголти даргая ва черделкІеная.

ХІянчи 189. Ишди предложениеби, глаголтала урдатурти ахир-тира имцІадирули, черделкІеная.

Иш шангличила нушачиб хабарцун лебсири, гъанна биалли хІушани иличила бикъридеш дируси кагъар баргил...

Къ.Мажидов.

Ну някълизиб хІеваличил гъаннара тіашли леѳал...

(И.ХІусейнов).

ХІябѣбил бархІи гѣуйчивад аркѣул *м*хяра сайра
гІяяркѣяна.

(С.Аксаков).

ХІянчи 190. Чузир инкарла приставкаби лерти хІябал предложение пикридарая ва делкІеная.

ГЛАГОЛ ТИКРАРБАРНИ

Тикрардарес суалти:

1. Гѣайла сегѣуна бутІалис глагол или бикІара?
2. Глагол секѣяйда (се хІясибли) барсбикІара?
3. Се иргѣахѣу гѣаннала заманала, убла заманала, гІурла заманала глаголли?
4. Глаголла чум бяхІ диэс дирара?
5. Глагол лугІи хІясибли барсбикІару?
6. Инкарла приставкаби сен-сен лукІути?

ХІянчи 191. Ишди глаголти хІябалра бяхІлизир дакІахѣили, предложениеби пикридарая ва делкІеная.

ВакІиб, касиб, узиб, учІи.

ХІянчи 192. Предложениеби черделкІеная. Чиди глагол се заманализиб бакІилил, бурая.

ВацІа чІянкІбиуб, авлахѣуни дацІдухѣун. Уктемли сай нушала адам: хІеркІла дуцІ барсбирули сай, ахѣти дубурти шикѣдирули сай. Даргала урибси далайчи ГІямарла Батирайли жагати далуйти дучІи.

ХІянчи 193. Ишди глаголти хІябалра заманализир дакІахѣили, предложениеби делкІеная.

Арцур, лукІулра, кайхьи сай, хІерикІар.

ГІибрат: Арцур. Даг аэродромличибад халаси самолет арцур. Нушала шила чебкад самолет урцули саби. Дубурла чебкадли чІака урцар.

ХІянчи 194. Удир гибти дугъбачи далдиркути баркъуди яра хІял иргъахъути глаголти пикридарая ва делкІеная.

ДягІ ...	Заб ...
ЧІака ...	Жита ...
Поезд ...	ХІеркІ ...
Ракета ...	Урхъу ...
Гами ...	Авлахъ ...
Хя ...	Ургуба ...

ГІибрат: ДягІ ваяшбухъун.

ХІянчи 195. Глаголти гІурла заманализир дакІахъили, чеббелкІеная.

Ардякъун дирихъми, гъаббакІиб берхІи, разикабиуб алавчарси дунъя. Къакъала дурхІни дурабухъун. Къакъурби дулхІехъули, тІама-гъама дехІдихъиб.

ГІибрат: Дирихъми аркъян.

ХІянчи 196. Хабар белкІеная, гІур чеббелкІеная. Глаголла бяхІ, замана ва лугІи белгидарая.

Тамашала машина

Гъачам хІерикІулрагу, чебиулра – дурхІни ургубализибяхІ дуцІбикІули саби ва вявбикІули саби: «Комбайн! Комбайн!». Нуни илхІели ил дев бегІла гъалаб

сабри аргъибси. Нура дурхІнас гІелавад дуцІухъунра. Авлахъличиб лебгІеб халаси машина башули чебиули саби. Илини арши ца гъакІли иршра иршулри, дугра дугулри. Хапли илала мякъла дехла машина бакІиб. Арши иршуси машиналичирад иличи умути анкІи чухдикІескадииб. ХІера комбайн сегъуна машина буилил!

ХІянчи 197. Ишди глаголти хІябалра заманализир дакІахъили, предложениеби делкІеная.

Арцур, лукІулра, кайхъи сай, хІерикІар.

ГІ и б р а т: Арцур. Даг аэродромличибад халаси самолет арцур. Нушала шила чебкад самолет арцурли саби. Дубурла чебкадли чІака урцар.

ПРЕДЛОЖЕНИЕ (делчІунти тикрардирни)

ХІянчи 198. Цайна белчІеная.

ГІялиев Башир нушала колхозла председатель сай. Дила нешла рузи Сакинат колхозла гъаркъя доярка сари. Нушала класс школализиб бегІла умуси саби. Класслизибти дурхІазивад вегІла ункъли учІуси Муса сай. Илини мурталра «шула» къиматуни дирар кайсути.

– Нушала гъай селизирад цаладикили?

– Нушала гъай цаладикили сари декІар-декІарти пикрумазирад.

– Илди пикруми нушани селичил иргъахъехІе?

– Предложениебачил иргъахъехІе.

- Гъарил предложениели сегъуна пикри иргъахъули?
- Таманбиубси пикри иргъахъули саби.
- Ишар нушала чум пикри лера ва илди чум предложениеличил аргъахъили?
- Ишар шел пикри лер ва шел предложениеличил аргъахъили сари.

ХІебиалли, нушала гъай пикруми хІясибли предложениебачи дуртІути сари. Предложениели сегъуна-би-алра таманбиубси пикри иргъахъули саби.

Таманси пикри иргъахъути дугъбала цалабахъилис предложение или бикІар.

Мурад учІули сай. Арали бираб нушала улка! Муса, хІу школализи вакІирив?

Таманси пикри аргъахъес асубиар ца девлира:

ЦІяббиуб. УрзесбяхІиб. Шаладикиб.

ХІебиалли, илдира предложениеби сари.

Предложениелизир бекІ члентира кІиибил даражала члентира дирар.

БекІ членти сари: подлежащее, сказуемое, объект.

Мурад школализи вакІиб. Заур, тІяхІикІули, хъули арякъун.

ХІянчи 199. Алгъай шайчи делкІунти дугъбачи балуй шайчирад дугъби кайсули, предложениеби делкІеная.

ВацІа	бучІули саби
Дубура	адалкири
Къадурби	дучІулри
ХІяйванти	бузулри
Арцанти	кІухдикІулри

Бавни гІяйдиублири
Хъубзури дяхІили убуцилри
ДурхІни сагадиублири
Чиргъми шинишбиублири.

Пикридухъеная, ишар чум предложение лера? Илдан
ни сегъунти пикруми иргъахъули?

ХІянчи 200. Ишди дугъбазирад предложениеби цаладыхъая ва
тетрадунази делкІеная.

ВакІиб, пионервожатый, собраниеличи. СуаликІулри,
дурхІни, вожатый. ДурхІни, экскурсия, даг, вацІа, бя-
къун. Асиб, Муса, тетрадь.

ХІянчи 201. Ишди дугъби дархъли кадатурли, предложениеби
дарая.

1. Шкодализивад, Мухтарли, чарухъунхІели, дурс-
рира, къацІли укес, хІядурдарили, керъур. 2. Музыка,
вирус, дудешли, ну, лехІирхъули, дяхъибхІели. 3. Яни,
саби, палтар, чегъни, ванати, гІяхІси. 4. Багъасра,
сурат, дила, балас, сен, барес. 5. БуцІи, дуги, хъубзар-
ла, духІнадухъун, бугІярси, азбарлизи.

ХІянчи 202. Алгъай шайчи делкІунти дугъбачи далдикести дугъби
пикридарая ва, балуй шайчи делкІи, предложениеби детаахъая.

Галгуби
МицІираг
Адамти
ГІебшни
Арцанти
Бялихъуни

ХІянчи 202. Хабар белчІеная.

АсхІяб школализивад чарухъун. Илини къял ва къяча шинни дужахъес хІеркІличи ардукиб. Илала гІергъи АсхІябли азбар-гІяя умудариб. Газа-кІатІа чула мерличи кадихъиб. Дудеш хІянчиличивад чарухъайчи, илини дурсри хІядурдири. БегІти АсхІябличи разили саби.

Иш хабарлизир чум предложение лера?

Гъар предложениелизиб селичила бурули?

ХІянчи 203. Хабар белчІеная ва сунезир чум предложение лерал, бурая. ГІягІниси мерла ишараби кадатирая.

ВацІа

Нушала дубурличиб халаси вацІа леб. Илар лер мигла, пурпила, шимла, хурла, мехІедахъла галгуби. ВацІалис къараул биру Къистама дудеш ГІисакъов Муртузли вацІа палакатбарахъес хІебалта вари вацІа палакатмабиридая вацІала халаси пайда лебси саби.

ХІянчи 204. Ишди предложениеби гъала-гъала делчІеная, гІур, чучи далдикибти дугъби кадалтули, тамандарая.

Хъубзура янилис урцул ... Янилис ванати палтаркъяшра хІер... исути. ХІеб гІяхІил узалли, яни паргъатли усесра ... Дудешли виштІаси Мусас янилис чакма, Шарипатлис -.... Пионерта рухъна ГІябидатлис урцул кадердес ... ДурхІни колхозла фермализи экскурсияличи ... Школьникуни ВатІа ЧебяхІси дергъла бутІакъянчибачил ... Чули илдази дургъбачила дахъал хабурти ...

*Бурая, ишар чум предложение лерал. ХІушанира ил
тяхІярли предложениеби пикридарая, илди дучІнила
къяйдаличи пикри бяхІчааая.*

ХІянчи 205. Предложение таманбиубси мерла гІягІниси ишара-
ра кабалтули, белкІеная.

Нушала улкализиб хьунул адамла халаси хІурмат
леб, илис, мурул адамлисгъунти, рузес, белчІуди касес,
арадеш бихІес, бамсриихъес, къуллукъуни дузахъес
ихтиюрти лер иличирли хьунул адам сунела улкала
гъарли-марси регІ сари демократ общество лушнилизир
жигарла бутІакъянчи сари хьунул адам, нушала улка-
лизирван, дигили ва къайгъили алавуцибси цалра улка
хІебири.

Гъанна улкализир тяхІяр-къяйда дарскадиубли сари
ишбархІилизир илала талихІчерти гІямру дарскадиубли
сари бахъалгъунтала хІянчи агара заманаличиб алапа
касес рирули ахІен.

П.Маллаевала хІясибли.

ХІянчи 206. Пикридарая хІяб-хІябал предложение, илдазир чум-
чум дев лерал бурая.

ХІянчи 207. Пикридарая таманси пикри иргъахъути ца-ца дев-
лизирад цаладикибти предложениеби. КІинайс, илдачи цархІилти
дугъбира чедалтули, цархІил журала предложениеби делкІеная.

ХІянчи 208. Почтальон, тракторист, учитель, агроном ибти дугъ-
бачил предложениеби пикридарая ва делкІеная. Илди предложени-
ебазиб селичила бурули?

ХІянчи 209. Ишди буралабала мягІна гьаргбарая.

Буралаби

Хлеб някъ белкъайчи узадли, дус алавбиайчи укад.

ВахъхІи хІеризс дигалли, галгуби удалтен.

Глебшнили бурчуси – хІеблизиб барибси саби.

Хлеб усусила яни уси бацІли бирар.

ХІу узадли, ванзара бузар, хІу азгъиниадли, илра азгъинбирар.

КІиэсил буралала бухІнабуц баянбарая ва аргъахъая.

ХІянчи 210. Хабарла бутІа белчІеная, гІур чеббелкІеная.

Целда лехІкахъилри, илини Шамха уркІила тІама бикъули ахІенри. Шамхал шарала дубла мураличи кайиб, иличи бяхІчиси бяхІлизиб къулала хІенкъ гІяйбикІулри. Шамхай, къалабахІейкІули, палтар чердатур. ДягІути хъуцІрумани ва аваданси михъирли илала кегІебси чарх мушлукъялайчи мешубиркахъули саби.

ГІАбу-Бакар.

ХІянчи 112. ЧеббелкІеная. Гьар предложение декІар-декІарли хІербарая. Гьар предложениелизиб баркъуди сунезибад дурабулхъ-уси чиди дев сабил, белгибарая ва, уди тугъаили, декІарбарая.

Харьковла мякълар нуша дургъухІели, нуни хъайгІибад кагъар касира. Кагъарлизиб дурхІялизирад дила хъунул ребкІниличила белкІири. Дила неш риалли гІурра жявли шалгІеррухъири... ХІушани пикрибарая, сегъунарил итхІели дила хІял. ДекІли вяхъибси ну госпитальлизиври, чеди – илди дарданира. Лерилра дила

дахъурбачиб хъайгибад бакибси ил хабар деклири наб.
«Акубсилра мицирли ахенара», – пикрииклулри ну.
Дила гьалмагъ Салихличи кагъар белкунра. Илли
набчи, виштиал мицирли сай или, белкун. Акубси
рурси руилри.

М.Бахшиев.

Хиянчи 213. Ишди мурул адамла умачи сегъуна девла бутла
имцабаралли хъунул жинсла уми детара?

Пагъир ...	Султан...
Рашид ...	Муслим ...
Султан ...	Хиялим...

ПРЕДЛОЖЕНИЕЛА МЯГИНА ХИЯСИБЛИ ЖУРАБИ

Гъар предложение ируси саби сегъуна-биалра му-
радличил. Цаличил ца гъайбиклули, адамта селичи-
ла-биалра хъарбиу, селичила-биалра буру, се-биалра
барахъес насихият бедлуга.

Сунезиб селичила-биалра хабар бурси предложе-
ниелис хабар предложение биклар. Масала: базли-
зир авал жумяги дирар. Хабар предложениела ахир-
лизи кланти кабалта.

Сунезиб селичила-биалра яра чичила-биалра сура-
висуси, хъарбиуси предложениелис суал предложение
или биклар. Масала: сегъуна пайда луга мирхъили?

Суал предложениела ахирлизи суалла ишара ка-
балта.

Сунезиб вав бухІнабуцибси предложениелис вав предложение бикІар. М а с а л а: Арали бираб нушала ахІерси Дагъистан!

Вав предложениела ахирлизи вавла ишара кабалта.

ХІянчи 214. Пикридухъеная ва тетрадунази делкІеная хабарла ца-ца предложение, ца-ца суалла предложение, вавла ца-ца предложение.

Уршили урцул Неш ибули сари. Рурсили цулби
кавдули сай ицули сари.

Селичила хабар бурулив цаибил предложениелизиб?
КІибиблизиб? ХІябъибиллизиб? ДелкІеная илди пред-
ложениеби.

Илди хабар предложениеби сари. Хабар предложе-
ние бучІухІели, ахирлизиб тІама гІяшбарили бучІа.

М а с а л а: тракторли хъу балцули саби.

ХІянчи 216. БелкІеная. Чум предложение лерал ва илдазиб се-
личила бурулил, бурая.

Ца бархІи шагъарла дублар хІеррируси нешла рузи-
ни хабарра агарли ну сунела дурхІначи арукира.
ЖумягІличир имцІали нуни неш чераили ахІенри.
Дудешличила хъумкартурли, гъанна ну иличила
къакъаикІулри. «Наб хІушачиб дигули ахІенра. Дила
нешличиб дигулра. Сен ну нешличив хІелтусира?» –
нешла рузичи вехІилзира. Амма ил гъачамалра набзи
маймайхІерикІи, ишбархІи нешличи аркъехІе, жагІял
аркъехІе или, се-биалра савгъатлис гили, ну лявираси,
паргъатирахъаси.

М.Расулов.

ХІянчи 217. ЧеббелкІеная. Предложениела ахирлизи гІягІниси ишара кабатырая.

Нушала буркѡа кѡуш сагабиуб ил дуги кѡушлизиб, гѡалаб кѡяйда ахІи, ваналири Халисатли кѡушла диштІати улкѡай дирцили душкиб гІямзурбазирти хѡис-хѡала душиби урасиб кѡуш умубариб ил бекІриуб хала дудешла палтарра дирцес урчиличивад кайкибхІели гѡяр-бердибси дила шалбарра Халисатли бирбублири Туху дукаркІулри.

М.МяхІяммадовла хІясибли.

Гѡанбикахѡая, сагаси предложение сегѡуна хІярпличил бехІбирхѡусил.

ХІянчи 218. Пикридарая авал хабар предложение ва гІур делкІеная. Бурая, сен халал хІярпличил вехІихѡили лукІутил ва, тамандиубхІели, ахирлизи кІантІ сен кабалтусил.

ХІянчи 219. «Кѡала» ва «махѡи» ибти дугѡбачил дархдасунти шагѡуртала, шимала, махѡурбала хІушани далути уми делкІеная. Илдачил чумал предложение пикридарая ва тетрадунази делкІеная.

ГІибрат: МяхІячкѡала, Сергокѡала, Кѡассагумахѡи...

МяхІячкѡала – Дагѡиста тахшагѡар саби.

Сергокѡала – даргала адамти хІербируси ши саби.

Кѡассагумахѡи – сирхІяла шимазибад ца саби.

ХІянчи 220. Иш назму кІел кадизурли белкІеная: цали хѡарби-ули, итилли жаваб лугули.

– Чиларив?– ира нуни

Ца виштІал уршилизи.

– Нешлара дудешлара,

- Иб ил уршили набзи.
- Дудешлис чи бикІара?
- Дудешлис дудеш бикІар.
- Ва хІу хІела бегІтас ват,
Нешлис?
- Нешлис неш бикІар.
- ХІед чи бикІара? – ира.
- Наб Къурбан бикІар – викІар.
- Неш биалли мурталра,
«Курбанчик», – рикІар, – викІар.
- Чум дус виублири хІу?
- Авал тІул чедаахъиб.
- Чина аркъулри? – ира.
- Ил гІяхІцадхІи лехІкахъиб.

Р.Рашидовлайзибад.

Бурая, икІаб чуйна хъарбаилил, суалбарилил. Илди предложениебазиб селичила хъарбиули?

Суал предложениелизиб селичила - биалра хъарбиули бирар. М а с а л а: Хабар бурес баладу? Класслизив вегІла азгъин чи сая?

Суал предложениелизиб суал бухІнабуцибси дев бирар, иличиб тІама бара ахъбурцуси саби.

ХІянчи 221. Ишди удирти суал предложениеби делкІеная, чус жавабтира лукІули.

- ХІу мурт алзада?
- Зарядка дириду?
- ВяхІ - някъ ициду?
- Цулбира ициду?

- Дурсри мурт дирида?
- БархІехъ мурт калхъусири?
- Илгъуна бархІила низам хІед чили гІеббуриба?

Илди суалтас жавабти сегъунти предложениеби сарил, бурая.

ХІянчи 222. ХІебличила хабар цахІнабяхъя, суалтира жавабтира кадалтули.

М а с а л а, ишкъяйда:

- ХІеб чум базла дирара? – ХІябал базла дирар.
- ХІеб аргъ сегъуна бирара? – ХІеб аргъ ванаси бирар.

ХІянчи 223. БелчІеная. Гъар предложениела ахирлизи гІягІиниси ишара кабалтули, чеббелчІеная.

- | | |
|-----------------|-----------------------|
| – ГугугІя - гІя | – Лами чинаба |
| – Се биублири | – ХІеркІли бишахъун |
| – Ца дабри агу | – ХІеркІ се биуба |
| – Чина бикиба | – Унцани бержиб |
| – Хяли арбухиб | – Унци чинара |
| – Хя се биуба | – БуцІани дергун |
| – Унзали бячун | – БуцІи чинара |
| – Унза чинара | – ГІяяркъяна вакІиб – |
| – Ламили дигуб | – Тупанг пІянкъаиб. |

(Халкъла)

ХІянчи 224. Ишди предложениеби делчІеная. Илдас суалти делчІеная.

Къяй ниъ луга, диъ луга, кабц луга, къачни диркъу. Мазани бала луга, диъ луга, гулби луга, мукъри диркъу,

ниъ луга. Унцани диъ, кабц луга, дех биху. Урчили кабц луга, диъ луга, дех биху, мурдали адам вику. Нуни дурсри дирис, хъайгІи – хъулиб ва хъучиб неш-дудеш-лис кумекбирис, хІеб колхозла хІянчира дирис. Житали вацни дурцу. ПяргІяли диъ луга, пяхІли луга, гидгури диркьу, жибхІни адилкьа.

М а с а л а: ишкъяйда:

Къяйзибад сегъуна пайда леба?

ХІянчи 225. Хабар предложениеби суал предложениебачи шур-датурли, хабар белкІеная.

1961-ибил дуслa Апрельла 12-личиб нушала улкали-зиб лебил дунъя тамашабиахъубси анцІбукъ кабикиб. Ил бархІи вегІ гъалав космослизи адам арцур. Ил арцур-си космонавт нушала улкала адам – Юрий Алексеевич Гагарин сайри. ИлхІейчибад Апрельла 12-космонавти-кала бархІи саби. ИлхІейчибад космослизи бахъал со-ветский космонавтуни арцурли саби. Гъанна ила Росси-яла космонавтикуначил барх узити улкнала космонав-тунира урцули саби.

Космос руркънила адамтас халаси пайда лебси саби.

М а с а л а, ишкъяйда: 1961-ибил дуслa Апрельла 12-личиб нушала улкализиб лебил дунъя тамашабиахъ-убси се кабикиба?

Багъира

Акакурла курлизир Кур-ХІяса дахъал маза.

ХІянчи 226. ДелчІеная ишди предложениеби.

Арали бираб нушала ахІерси Дагъиста Республика!
Арали дираб нушала узити улкни!
Деза биаб нушала космонавтунас!
Ва Халирбагъе Шихали!
АнкІилисра мухъилисра авхазан курега асая!

ИкІди вјав предложениеби сари. Вјав предложение-
лизиб вјав бухІнабуцили бирар. М а с а л а: Арали бираб
нушала удихІебиркуси хабарла ГІярмия! Ёй, лјавкјул-
рану, уввацІигу гъалавад!

ХІянчи 227. ДелкІеная. ГІягІиниси мерла балбиркуси ишара
кабатирая. Ё, е, я секъјйда ирутил, гъанбикахъая.

1. Ёй, далкІа хІулбар гІяра,
Лебси мерлаб тІашбизи
Чина архулри, бура
ХІуни ХІямзахъа ганзи.

(С.Рабаданов)

2. ГІяхІяйс унза дягІуси,
Анкъи шалал, шанг гІявал
ХІела хъулиб баракат
Гъачамалра каммабиъ.

(Р.Рашидов).

ХІянчи 228. БелчІеная. Сен кІунтІри, суалла ва вјавла ишараби
кадатуртил, бурая.

Шадир раши

Далхулри шинни къузри
Хала нешли гъаргалар,
Хала нешличи Хизри
Гъамиубли гъайикIар:
– Хала неш!
– Се дигулри?
– Ва хала неш!
– СейкIулри?
– ХIела къяшми дамсурлив?
– Се? Се дамсурли?
– Къяшми!
– Къяшми селис думсутив?
АхIен!..
– АхIен диалли,
Раши шадир аркъехIе,
Сабну анцIбукъи хIекъли.

Г.БяхIяндов.

ХIянчи 229. Пикридарая шел вявла предложение ва делкIеная.

ХIянчи 230. Иш хабар чеббелкIеная ва бурая, сен-сен ирулил гъар предложение.

Къядга

Къядга душмантазибад уцахъу сунечирти занзбани. Рахли чинаб-биалра урехира гъанаалли, къядга илхIайзиб журугбиубли кабилзан. Гъари, къячикенгу ца!

Чинаб буусив къядга? ХIерели ил къарлизиб, къаду-базиб бусар, дугели биалли милкъягIиб, тусухIартагIиб гIаяр башар. Рахли чIичIала чебаалли, илра буга. ЧIичIа агъу къядгас урехила ахIен.

ХІянчи 231. БелчІеная. Чина кІантІ, чина суалла ишара, чина
вявла ишара кадалтутил, бурая.

- КъутІ-къутІ
- Чи сайри
- Мирза
- Сен викІири
- ГІинцби далцІес
- Баладу гІинцби далцІес
- Балас
- Гъари, чебаахъа
- ХІера, ишкъяйда
- КъутІ-къутІ
- Чи сайри
- Сурхай
- Сен вакІири
- Картошка адитІес
- Баладу картошка адитІес
- Балас
- Гъари, чебаахъа
- ХІера, ишкъяйда
- КъутІ-къутІ
- Чи сайри
- Хасай
- Сен вакІири
- Картошка дишхъес
- Баладу картошка дишхъес
- Балас
- Гъари, чебаахъа
- ХІера, ишкъяйда

ХІянчи 232. Назму белчІеная, гьар предложениела ахирлизи сегъуна ишара кабалтусил, бурая.

БархІи буцІарли саби
Цедеш дилкъули сари
Арши сайули сари
Илкьяйда мурт бируси?
Алавчар дяхІи саби
ХІеркІ миъбяргІили саби
Бухъи халал дягІ саби
Илкьяйда мурт бируси?
Ургуба бацІли саби
Ванза шинкІали саби
Забли ургъули саби
Илкьяйда мурт бируси?
ДяхІи бицІули саби
Сага алкІули саби
БархІи бухъянни саби
Илкьяйда мурт бируси?

С. ГІябдуллаевлизибад.

ХІянчи 232. Ишди суалтас жавабти дурая.

1. Хабар предложение секьяйда иру?
2. Суал предложение секьяйда иру?
3. Вяв предложение секьяйда иру?

ХІянчи 234. Пикридали делкІеная кІи-кІел предложение: кІел хабарла, кІел суалла ва кІел вявла.

ПРЕДЛОЖЕНИЕЛА БЕКІ ЧЛЕНТИ (III класслизир делчІунти тикрардарни)

ХІянчи 235. Предложениеби делчІеная. Подлежащееби, суалтира кадалтули, делкІеная.

Нушала вацІализиб мигла галга имцІали башар. Школала гъалаб дурхІни дуцІбикІулри. Дила дудешли хІянчила план кІинали таманбариб. Собраниеличив Башир ахъли гъайикІи. ВяхІидли нешлис кумекбирулри. ГІусман шагъарлизивад чарухъи сай. Яни аркъули саби, хІеб садиули сари. ГІябдурашидли историяла дарсличиб «шула» касиб.

ХІянчи 236. «Анхълизир хІебла хІянчи» темала чебкад хабар цахІнабахъя ва белкІеная. Подлежащееби, суалтира кадалтули, декІардарая.

ХІянчи 237. КІунтІрала мерла подлежащеели диубти дугъби кадалтули, предложениеби черделкІеная.

1. ... далайрикІули сари. 2. ... гІяхІладли нушачи вакІиб. 3. ... хъулиб дуцІбикІули саби. 4. ВиштІаси ... сирилав висули сай. 6. Базарличивад, унцира дицили, ... чарухъун. 7. БархІехъ ... къял бирзиб. 8. ... ванза балцули саби. 9. Савли дарибти ... халкълис халал зарал бариб. 10. ... дурсри хІядурдариб.

ХІянчи 238. Ишди удирти дугъби подлежащеели диахъубли, предложениеби пикридарая:

Колхозник, заб, дяхІи, яни, Чамкур, вацІа, хала, дудеш, шиндалан, мирхъили, хІеркІли.

М а с а л а: Багъла-багълали заб тІашдизур.

ХІянчи 239. Чи? се? чили? сели? ибти суалтас жавабти лугути подлежащеебала деґІти авал предложение делкІеная.

ХІянчи 240. БелкІеная. Чи? се? чили? сели? ибти суалтас жаваб лугути существительноеби делкІеная.

Алипунала архІя

Нуни чедаира
АрхІяличир шагъурти,
Нуни хІушаб дучІасра
Тетрадьлизи делкІунти:
ЦацадехІ тукентазив
Аги цалра туkenчи,
Тетрадь дуцІбухъун набчи.
Ну телескоплизибад
ХІербизурра зубрачи.
Гъарахъси заклизибад
Зубар гъамбиуб набчи.
Чедаэс пагъливанти
БякъунхІели цирклизи,
Къаршибикиб цовкранти
Дудеш ва верхІел рузи.
Дудеш кункси гъинтаван
АцІибну гъаяличи,
Рурсби тІяхІбикІи тапван,
Дудешла хъуцІарличиб.

С.Рабадановла хІясибли.

Телескоп – зубартачи, Бац-БерхІиличи хІерикІуси,
илди гъамдиахъубли чедиахъуси секІал саби.

ХІянчи 241. ЧеббелкІеная ва подлежащееби декІардарая.

Гурднягъ

ВацІализиб дигІяй-дигІяй укабиръули бирар халаси дугІла жита-гурднягъ. Илала гули кърхІе рангла бирар, цІудара дамгъначилси. Къадубазиб ил чебаэс къиянни бирар. Амма гурднягъли вацІализир кадирку-ти секІал гІяхІил чедиу. ЧІянкІличиб гІяра чебаалли, ил житаван укабиръур, ва тІяхІбухъи бурцу. Илала алтІути къялшубазис гъачам бикибси секІал гІур батхІебулхъан. Хабарла чебкад изложение белкІеная.

ХІянчи 242. БелчІеная. Подлежащееби чедаахъая.

ВиштІал кумекчи

Картошка убалтуси хъучи хала неш ГІяйшани сунечил варх сунела рурсила уршира арукиб. Ил уршилис Муртуз бикІусири. Хала нешли атхІеб Муртузличи чумал диштІати картошка дедиб ва иб:

– Набчи хІерикІен, ва, нуни къяйда, удалтен. ХІера иш картошка убалтадли, чумал базли цала мерлар вецІал-вецІну кІира картошка ляркъян.

– Нушала житаливан, дурхІни диркъуси балан, – пикриухъи, мешубуциб Муртузли.

– АхІен, урши, илис къуллукъбарес гІягІниси саби. БуцІардешлизибадра берцахъес гІягІнибиркур, бугІяр-дешлизибадра, мулкъазибадра, – аргъахъиб хала нешли.

Сунени удатурти картошкалис къуллукъбарес Муртуз мурталра хІядурли вири.

ГІ. Абу-Бакарла хІясибли.

ХІянчи 243. Камси дев имѣабара. Предложениела бекІ членти
декІардара.

Каса, гъари, беркен ...

Лебал бурис хІела ...

ТІ-лизир палтар ицис,

Р-личил духъби рурчис,

КІ-личил лукъхІелукъас,

Сецад бучаллира м 9.?

Хъучир дегІун анкІили

Церхъкабиахъубі ...

МурчІ имѣабарибхІели,

Бетаур зумал ...

Ка датес дугъби: тІас, ваца, рас, клас, цІакъ, мас,
кѣацІ, вацІа.

ХІянчи 244. Ишди предложениеби черделкІеная. Сказуемоебала
уди кІел тугъаили, декІардарая.

1. Арцанти урцули сари. 2. Дубуртачиб дирихъ
пухІбухъун. 3. Нешли наб сагати дабри асиб. 4. Дарсли-
чиб дурхІни далайбикІи. 5. Савли къули мядикІи.
6. Неш ралкъаайчи, къачали къял берхъиб.

ХІянчи 245. КІунтІрала мерла сказуемоеби делкІи, предложени-
еби черделкІеная.

1. ХІеб трактор авлахъличи ... 2. Учителъли наб днев-
никлизи «шула» ... 3. Нешли уршилис тап ... 4. Савли
айзурхІели, Мирзани дяхІ-някъ ... 5. ДурхІни гъар
жумягІ киноличи...

Буралаби:

Хлеб вавни дирар, глебшни – цледеш.

Хлеб хледегладли, глебшни дурчра хледурчид.

Багыраби:

Ванзаличи кадиркур, шинишли дурадиркур. Дугели баклес урухкIус, хIерели баклес урузкIус, дирихълиуб бакIиша.

ХIянчи 246. Ишди удирти дугъби сказуемоели диахъубли, предложениеби делкIеная:

АвбикIар. ГягIбикIар. КъяйкбикIар. ШятIбикIар.
ДянгбикIар. Къиздашар.

ХIянчи 247. БелкIеная. Сказуемоеби чедаахъая.

Тухтурли виштIасиличи хIеръиб, кьак гьаргбарахъиб.
– ИзесяхIибмадан, кавкес гIягIнилири. Селичила пикририкIули неш? Дяхънушачи игъдибар бихъирив?

Хъунул адам пашманриуб, нургъби душикиб. Тухтур гъузгъалдивиуб, пишяхъиб: – Гъу, биур, биур... Изалав, гъатIи, иш? Гъари нушани бусягIят. – Иллини рецепт белкIун ва хъунул адамлизи гъабатур.

– Ца-кIел бархIили, кьяцаван, тIяхIикIар, – ва сестрачи дугъаизур: – Кумекбара ишис, рурси, аптекализи раахъа.

Сестрани хъунул адамлизивад урши сасиб ва, гъуйчир дукаррирхIули, мегIрикIули, виштIаси кIина-хIяйна пишяхъяхъиб. Урши пишяхъибхIели, нешра пишрирхъулири.

З.Зулпукъаровла хIясибли.

ХІянчи 248. Иш хабар чеббелкІеная, подлежащееби ва сказуемоеби декІардарая. Подлежащеебала уди ца тугъ, сказуемоела уди кІел тугъ каая.

ДугІла цура

ДугІла цура хъа цурмачи камли мешуси саби. Ил лебил хъунцІбадкабикибси, чІукъаси саби. ДугІла цура хъярхъли дуцІбикІар. ДугІла цурми хІердиарар вацІурбазир ва билхІлумар тјалурбазир. Илдани дуга гъар журала мякъи, миги, дугІла гІинцби. Рахли дугІла цурми картошкала авлахъуначи шакдикалли, берцуди биаб – лерил картошка убилчедиру.

ХІянчи 249. Удирти предложениеби делчІеная.

Устали ута Нешли урши
бирули сай. ицули сари.

Рурсили къача балхули сари.

Цаибил предложениелизир чинара подлежащее, сказуемое?

- Устали – подлежащее, бирули сай – сказуемое.
- Бирули сай ибсиличибад баркъуди селичи чебурхули?
- Уталичи.
- Бирули сай (се?) ута.
- Ута объект саби.
- КІиибил предложениелизир чинара подлежащее, сказуемое?
- Нешли – подлежащее, ицули сари – сказуемое.
- Ицули сари ибсиличибад баркъуди селичи чебурхули?
- Уршиличи.
- Ицули сари (чи?) урши.

– Урши объект саби.

Хіябъибил, предложениелизир чинара подлежащее, сказуемое?

– Балхули сари ибсиличибад баркъуди селичи чебурхули?

– Къачачи.

– Балхули сари (се?) къача.

– Къача объект саби.

Суалти:

1. Биубси баркъуди сунечи чебурхуси дев сели бирара??

2. Объектли сегъунти суалтас жаваб луга?

ХІянчи 250. Ишди предложениеби черделкІеная. Чузирти чи? се? ибти суалтас жаваб лугути дугъби, уди ца бархъа, ца балкІа тугъаили, декІардарая.

1. Писани хива киса бицІиб. 2. Халикъли урчи дуцІбариб. 3. РиштІаси ПатІини дудешличи кагъар белкІун. 4. Нешли МугІидлис байрамлис сагаси хІева бариб. 5. Савли дурхІнани зарядка диру. 6. Хъулкна хала нешла хиви дигІун.

ХІянчи 251. КІунтІрала мерла объект кабалтули, предложениеби черделкІеная.

1. БуцІа ... кадуршу. 2. Мирхъили ... биру. 3. Дояркабани бархІехъ ... изу. 4. Нешли карилаб гІяваси ... берцІиб. 5. Дудешли наб шагъарлизибад кІел хІулала бегІ ... асиб. 6. ГІябидатли къачас ... диршиб.

ХІянчи 252. Чузир объектуни лерти шел предложение пикридарили делкІеная.

ХІянчи 253. ДелкІеная. Объектуни даргая. Гур предложениеби делкІеная, объектунала уди ца бархъа, ца балкІа тугъра кайули.

Галгала занзбар къялубази дяхІ-някъра хъяршдарахъ-или, нешли халаси къияйчил дурхІяла тап касиб (М.Расулов). Хала дудешли Аминат мазалис къараул барахъес ратур, ва сай колхозла зоотехник Муса варгес арякъун. (З.Зулпукъаров). Дирихъли дубурти кІапІдарилри. (З.Зулпукъаров).

ХІяпизли симкъъала тІашаиб. Нургъба дицІибти диштІати цІудара хІулби хІяршдариб, дудешличи разили хІеризур (Р.Рашидов). Хабарагарли ХІямидли сунела дудеш чеиб ва, «Дудеш!» – или тІамара дарили, иличивяхІ ветухъун (М.Абакаров).

ХІянчи 254. Ишди дугъби объектуни диахъубли, шел предложение пикридарая. Илдачи, сказуемоеличирад дехІдихъили, суалти кадатирая.

ВацІа, хъу, анхъ, хІева, гІяра, жуз, пластилин, краска, щетка, хиви.

ХІянчи 255. Чумал предложение пикридарая, чузирра лерил бекІ членти лерти. Илдазир объектуни декІардарая.

ПРЕДЛОЖЕНИЕЛА КІИИБИЛ ДАРАЖАЛА ЧЛЕНТИ

Предложениелизир, бекІ члентала дурарад, кІиибил даражала члентира къаршидиркур.

Предложениела кІиибил даражала членти сари определение, дополнение ва аги-къяйда. Илдани бекІ

членти яра чузибадли чиди-биалра ца член белгиди-
ру. Илдани сегъуна? чиди? секъяйда? мурт? сен-сен?
селичил? чила? села? чис? селис? чичил? селичил?
чичи? селичи? чина? чинаб? чинабад? селичибад? ибти
суалтас жаваб луга.

ХІянчи 256. ХІердизирая предложениела схемаличи. БекІ член-
ти ва кІиибил даражала членти белгидирути дугъби дурая.

мурт? сегъунти? села? се? се биуба?

Хапли гъалакти гунзрала тІама чехиб (ГІ.А.-Б.)

чинаб? сен-сен? се бирули? сегъуна? се?

Удиб кІухли кабухъи саби бамкъурси Сулахъ (ГІ.А.-Б.)

ХІянчи 257. БелчІеная. Сегъуна? секъяйда? мурт? ибти суалтала
цалис жаваб лугути дугъби даргая. Илди дугъбачил хІушанира
кІикІел предложение пикридарая.

ГІялибег

Пяхъли гъалав ГІялибег, гІелабад кІелра милиционер
диванханала бухІнахъибхІели, някъбира кадихъили,
селизирил хахамикІули, чурха гІясатІин къапІачевли
участка кайилри. Сунела хамирла къацІван кабизурси,
чахъали бултІунси вяхІ, цІивдизурти хІулби илини
бухІнаахъибтаци дяхІчиаиб. Илис дигулри сунела кахси
бяхІчибизли вакІибси урухварес. Милиционерти унзала
гІела тІашбизур. Стол – вархъли гъала арслан къяйда
кайзурли, сунечи къаршисила къургулагъунти хІулбачи
сунела къарчигъалагъунти хІулби вякъаили, ГІялибег
тІашлири.

ГІ.ГІялиев.

ХІянчи 258. БелчІеная. Чила? села? ибти суалтала цалис жаваб лугути дугъби даргая.

Батирай

ХІушала бухънабази хъарбаадалли, илдани хІушаб Батирайла хІекълизиб хабар буру. Иличила хІебакъибси дарган адам камли сай. Нушала бухънабани илдала далуйти чула гъайлизир мисаллис дику. Батирай гъу-нарла далайчи ва поэт сайри. Илини халал устадеш-личил ва жагаси тІамаличил халкъла диаб, сунени цахІнадяхъибти диаб, далуйти дучІи. Чугур бяхъесра ил дебали гІяхІси уста вири. Ил дебали дигахъи лебил даргантас ва цархІилти Дагъиста халкълис. Лебил адам-ти илала далайла бакъес хІяс-ратли бири, ва, илини далайалри, мурул адамти, хъунул адамти, бухънаби, биштІати – лебилра дуцІбикІи. Илгъуна халаси цІакъ бири Батирайла далайлизиб.

ДОПОЛНЕНИЕ

ХІянчи 259. БелчІеная. ЦІударли чедаахъибти дугъби чучи хъарахъибти дугъбачил дарх черделкІеная. Суалти кадатирая.

Акт.

Акт.

ГІибрат: ЛукІес (сели?) къаламли, ручкали.

ВацІала гъуйчибад илини урчи дуцІбариб. Иличил варх цархІил урчиличив АсхІябра леври. Илис жявли-ван хъарахълизи ветаэс дигулри. Ил гили-къабтала къаш-личи къухІизур. МяхІяммадли урчи гъатІира къалаба-бариб.

Дополнениели, уйхъу падеж ахленти, лерил паде-
жунала суалтас жаваб луга.

ХІянчи 260. Предложениеби даимдарая. Подлежащее, сказуе-
мое ва дополнение, уди тугъаили, деклардарая. КІунтІрала мерли-
чи, суалтас жавабтили диахъубли, лайикъти дугъби кадатирая.

Дополнениелиу ДурхІни вацІализи башар (селичи?)...
иш тяхІярли тугъаая: Нуни кагъар белкІунра (чичи?)...
Нуни ГІялис жуз бедира. Неш кариили сари (селичи?)...
 Къараул вявикІули сай (чизи?)...

Существительноебала падеж белгибарая.

ХІянчи 261. Назмулизир цаван лукІути дугъби даргая. Илдала
мягІна цагъунал яра декларсил, белгибарая.

Агъ, сунела мурад баъ!
Вялхъя урши сай Мурад.
Хъябшсила, ухънасила
Биру чумлара мурад.

– Наб чакар хІейги, – рикІар
ЦІудара хІулбар Чакар.
Муридешли рукули,
Журугдиуб ляжубар.

ХІевъар, буцили муса,
Нушала никІа Муса.
Дугели усаайчи,
КІухдикІахъу мер-муса.

ГІ. Къурбанова.

ХІянчи 262. Ишди глаголтачи существительноеби имцІадарая:

УчІес, лукІес, мурдайэс, вархес, узес.

Сегъуна падеж саби существительноела? Дополнение-
бала уди тугъаая.

ХІянчи 263. Чис? селис? чичи? ибти суалтас жавабти лугути дугъбира пайдаладарили, классла бяхІла газеталис халаси ахІенси макъала белкІеная.

ХІянчи 264. Хабарла бутІа белчІеная. Илизир чис? селис? чичи? селичи? сели? ибти суалтас жаваб лугути дугъби даргая. Илди сегъуна кІиибил даражала членни диубли дакІилил, бурая.

КІел букІун

Мазаличил дуки башули кІел букІун лебри. Илди гІяхІти гъалмагъуни бири. Ца бархІи шурмала ургабси дякъличиб илдас бецІ балбикиб. Ита-иша вебшес мер аги. Гъалав вашуси БяхІяндли ханжал абитІун ва бецІлис бяхъес вализур. БецІ чесабаили, илала алгъай някъличи къацІбикун. Газа някъра бецІла къаклабли, ил бецІлис ханжай вирхъулри, бецІ бахъ дебали гъамли, гужбарес хІейрулри. БецІли някъ батиули ахІенри, гъунчІурби-рулри.

БяхІяндличи бецІ чебухъунмад, итил букІун БяхІяндлис кумекбирули, бецІличи ханжай вирхъесяхІиб.

Дополнение имцІаливан существительноели ва местоимениели биубли башар.

ХІянчи 265. Существительноели ва местоимениели диубли дакІибти дополнениеби черделкІеная. Илала падеж чебаахъая.

ДуцІрумлизиб нушала школала бучІантани сабухъ бучахъес колхозникунас кумекбирули бирар. Савли нуша, колхозла дех бихуси машиналичи кадиили, авлахъличи дашехІе. Гъариллизиб гавлагра бирар. Комбайнали биршибси хъучир калунти лугни дурчутири. Гавлаг бицІибхІели, битІакІес умцантачи бихусири.

М.ЯхІязев.

ОПРЕДЕЛЕНИЕ

ХІянчи 266. Тахтаби делчІеная. Илдазир сегъуна? сегъунти? села? ибти суалтас жаваб лугути дугъби чедаахъая.

Каилри забли макъам	Забла къири арбякъун
Махъла ахъси чирхлизиб,	Гъарахъти шурмазибяхІ,
ГилдидикІар, гердухъи	БерхІили гъаглизирад
Заб галгала чархлизи.	Гъаргдариб сунела дяхІ.

Определениели сегъуна? сегъунти? чила? села? чиди? чум? ибти суалтас жаваб луга. Ил имцІаливан прилагательноели ва хас паждежлизиб существительноели биубли башар.

М а с а л а: Нушани Батирайла далуйти мурталра дучІехІе.

Школала бучІантани мегъла бургІлуми дурчнила план кІинали бицІахъиб.

Нешли наб байрамлис тукейзибад жагаси хІева асиб.

ХІянчи 267. БелчІеная. Сегъуна? села? ибти суалтас жаваб лугути дугъби даргая, илди предложениела чиди членни диублил ва илдани се иргъахъулил, бурая.

Наб гъанбиркур, атхлебла кеглебси дуги, багъбиуб-сиван, кабухъунси Григоринчай хлеркІла дубла, нура дудешра кадиили. ИлхІели наб дудешли тамашала хабар буриб. Ну иличи халаси иштяхІличил лехІяхъира, лебгІеб тІягІямла анцІбукъ сабри ил. Наб гъаннара гъанбиркули саби, ит дугиван, ахъсили, кеглебсили ва зубарта бар-шили зак нуни гъачамалра чехлебаирагу или. Бац биал-ли ил дуги тамай жагаси сабри.

ХІянчи 268. ЧеббелкІеная. БекІ членти ва определениееби декІардарая. Определениеели чиди суайс жаваб лугулил, хІердизирая.

ГІибрат: Ухъна уста арякъун.

- | | |
|----------------------------------|--|
| 1. Определениелиу
иш тяхІярли | 1. Востокла шайчир ахъти улкъайти
сарри. |
| тугъизеная: | 2. Гъалаб столтала ва утнала тугъ сабри. |
| <u>ЦархІилти</u> устни | 3. Гъарил устала диштІати гІянулби
сарри. |
| лябкъулри. | |

II. ХІяна муцІурла вегІ уста хІерикІулри. Ил хала устали сунела пикрумачила балусигъунари. Ил лехІка-хъилри. Шагъруни зумаси журуга някъиш бариб. (М.Р.).

ХІянчи 269. Далдикибти определениееби делкІеная. Чиди девли-чил балбикили гъарил определениее? Текстлис заглавие пикрибарая.

Чумал бархІи шилизиб (сегъуна?) аргъ саби. Гъачам дубуртачибад (сегъуна?) дягІ кабулхъули саби. Илини (сегъунти?) заб дихули сари. Зубрачир (сегъунти?) гъа-гулти камдирули ахІен. Къаркъайчи (сегъунти?) палтар чегъес чевкъули саби.

«Глагол+существительное» дакІибти дугъбала цала-
бикуні делкІеная.

Сегъунти определениеебани балахъули къантІти
гІебшни диъни.

ХІянчи 270. Аргъла сипат даимбарая. Определениеби даргая.

Даг шаласи берхІи сабри. ЦиркІли бухъунси цІуэри
дахІлизи чейгулри. ИшбархІи...

ХІянчи 271. ЧеббелкІеная. Сегъунти? Села? ибти суалтас жаваб
лугути определениееби, балкІа тугъаили, декІардарая. Илди сегъун-
ти гъайла бутІали диубли дакІилил, бурая.

Нушала Ирау бикІуси мерчибси вацІализир гъар
журала гулгуби лер. Илар кІел адамла някъбанира
алавхІедарести пурпила галгуби тІашли сари. Илрти
мигла ва махъла галгуби чедаадли, тамашахІейэс хІей-
руд. ЛергІер чІухІдитІи дакІили сари шимла галгубира.
Ил вацІала бяхІругбиубси мерлаб лергІер дяргІибти
шинна гІиниз леб. Илад шинни ужадли, къаркъала
цатамашали ряхІятбиубсиван кабилзан. ГІинизла итил
шайчир дахъал тІашли дерубти ва дягІли гъятІаибти
жура-журала дахъал галгуби лер.

ГІ. Сулайбанов.

ХІянчи 272. КІунтІрала мерличи далдикибти определениееби
делкІеная ва гъарил определениеели сегъуна суайс жаваб лугулил,
белгибарая.

1. ДуцІрумла ... бархІи нура ... гъалмагъунира
вацІализи шадир дякъунра. 2. Илар нушани ... жани-
вартала ... къел чедаира. 3. Илди къел ... синкала сарри.

4. ... кьар ... вавни ... шин ... цІуэри ... вацІа нушаб
дебали дигиаур. 5. ВацІала дайлаб ... хІеркІ саби, хІеркІ-
алав мурталра ... арцанти дирар, кьадубази ацІалли
... цІедеш сари. 6. Ил ... бархІи нушани хъумхІертехІе.
7. Нушала лебГІеб ... шадибгъуни бетаур. 8. Наб ... ду-
буртачив,... ургубалав ... сагнази шадив вашес дигахъис.

ХІянчи 273. Назму саркъахъили белчІеная. ДекІардарибти дугъби
черделкІеная. Илдачи суалти кадатирая.

Усен, дила дигуси,	Дудешра лявкъули сай,
Дила виштІаси узи.	ХІед савгъатра лебхули,
КъяпІдара цІудар хІулби.	Шарабла къудлумазиб
Усен, замана сабну,	Шала-бухъутІа вава,
Нешра ляркъули сари,	Шарабла гІинзурбазиб
ХІу усилил, хІерризес.	Шала-хъанцІа гулвава,
	Гуллавнала хІярличиб
	ХІябрангла жанай вава.

Шиниш гъябжайла дублар
ШяхІрумар жанай вава,
Усен, дила дурхъаси,
Дигуси ГІяликъади.

Къулла – шинни бирцІуси наг саби, адам визахъес
хасбарибси.

Халкъла.

ХІянчи 274. Иш хабар белчІеная. Гъар декІарбарибси определе-
ние сунени баянбируси, саби хъарихъуси девличил барх чеббелкІеная.

Г І и б р а т: ЦІуба дяхІили.

Янилизиб

Яни лерил авлахъуни ва дубурти цІуба дяхІили кІапІдарилри. Дубуртала диштІати хІуркІби хъанцІ миъли дуцилри. Ахъти дубуртачир дяхІила халати кІиликІми кайулри, бугІярси дягІ авбикІулри. МицІираг чула ванати дурхъбази, жаниварти чула диштІати пукънази дигІяндикилри.

Определениебачи суалти кадатирая

АГИ – КЪЯЙДА

Аги – къяйдали чина? чинаб? чинабад? мурт? секъяйда? сен-сен? ибти суалтас жаваб луга.

Масала: Култум гІела (чина?) ласряхъиб.

ИлхІели (мурт?) хъулибад хала нешла тІама чехиб (М.Р.).

ХІянчи 275. ДекІардарибти дугъбани сегъуна суайс жаваб лугули.

Ца дякъ катхІел аркъулри ва удиб цархІилти къаду-бала ургаб бетихъулри. Ил – Къара-Къурешлизи ва Хай-дакълизи вашуси гъуни сабри. КІиибил дякъ дубурла бяхІлизибад бетхІел аркъулри, вацІализи дигІянбир-кулри.

ХІянчи 276. БелчІеная. Чина? Чинаб? Чинад? ибти суалтала цалис жаваб лугути дугъби даргая.

Хлеблизиб

Гъачамлис ванзаличиб дяхІи бегъубли ахІенри, уркІилис биалли хІеб дигулли.

БярґІибси ванза, дяхІиличилти чят къяшмаур жянтІдикІули сари, амма алавчарли гъар секІал разили, дигесли сари. Гъава илцадра гІячихъли ва шалали саби, ахъти хъулчрачи ацІибхІели, ца дубличибад итил дубличи бикайчи лебил дунъя чебаэс вирус къалли или, гъанбикесли саби. БерхІи ухули шалабикІули саби, илала нур, пишдяхъили ва хІязтадиркъули, чякначил дарх шарубазир дизули сари. ХІеркІ тІинтІбирули саби ва бамкъурли саби, ил гъанна чебаргъили саби ва ишбархІи-жагІял бучІесбирхІур. Галгуби чІянкІли сари, амма гъанна мицІирдирули сари, гъигъдикІули сари.

А.П.Чехов.

ХІянчи 277. ЧеббелкІеная. Предложениела членти хІясибли разбор барая. Чиди гъайла бутІали аргъахъили аги-къяйдаби?

Аги-къяйдабау иш тяхІярли тугъиэная: <u>Дякъла чедиб</u> биштІаси диркъбик саби.	Г І и б р а т: <u>ВацІурбазир гІебшни</u> <u>гІяйдивбли сари.</u> 1. Галгуби багълали пяхІдирули сари. 2. КІари ванзаличи кадиркули сари. 3. Гъагулти востокличидяхІ дашули сари. 4. ДягІли илди къалабали гъадирхъули сари.
---	--

ХІянчи 278. Суалтас жавабти делкІеная. Мурт? чина? сецадхІи? ибти суалтас жавабти лугути аги-къяйдабау тугъаая.

1. ХІу мурт чевсаргъуда? 2. Мурт хъуливад дуралхъада? 3. СецадхІи кавлада школализив? 4. Чина вашуда,

дурсри тамандиубхІели? 5. Мурт дурсрачи хІядурируда?
6. Мурт усес калхъада?

Глаголтала бяхІ, замана, лугІи дурая.

ХІянчи 279. Предложениела ахирти кадизахъирая. Багълабир-нила ишараби кадалтули, хІянчи чеббелкІеная. Сказуемоебачи хъарти аги-къяйдаби чедаахъая.

ГІибрат: Илар тамашала анцІбукъуни сари.

Урхъула дублаб мигла шиниша галга саби ил мигла галгализи бигъи мургъила рахаж саби дугелира хІерелира ил рахажлизиб делчІунси жита къунзбикІули саби.

А.С.Пушкинна хІясибли.

ХІянчи 280. «Дубура» ибси дев, илала формаби дополнениели, аги-къяйдали дияхъубли, предложениеби цахІнадяхъая.

ХІянчи 281. Ишди предложениебала схемаби дарая.

ГІибрат: Цаагили дяд бучІули саби.

Гами къалабали аркъули саби. Нуни иш назму хІяйна белчІунра.

ХІянчи 282. ИкІ чедибси хІянчила схема хІясибли предложениеби цахІнадяхъая.

- 1.
- 2.
- 3.

ХІянчи 283. БекІти ва кІиибил даражала члентачила бурая.

1. БекІ членти сегъунти сари? Сен илдас бекІ членти бикІути?

2. Сегъунти дирара кІибил даражала членти?
3. Сегъунти суалтас жаваб луга дополнениели?
4. Сегъунти суалтас жаваб луга определениели?
5. Сегъунти суалтас жаваб луга аги-къяйдали?

ХІянчи 284. Удир гибти предложениебазирад гъала-гъала бекІ члентазирадцун цаладикибти предложениеби, кІинайс чузир кІибибл даражала члентира дарх лерти предложениеби черделкІеная.

1. Наташа школализи ракІиб. 2. Совхозлис дахъал тІутІи дакІиб. 3. Дудешли хІяка асиб. 4. МяхІячкъала жагаси шагъар саби. 5. Нуни МяхІячкъала чебаира. 6. Илаб бахъал халкъ хІербирули саби. 7. Учительница школализи ракІиб. 8. Илини дарс бехІбихъиб. 9. Дудешли мукъара асиб. 10. Илис шиниша къар дигахъу.

ХІянчи 285. БекІ члентазирадра кІибибл даражала члентазирадра цаладикибти хІябал предложение пикридарая ва делкІеная. БекІ члентани сегъунти суалтас жавабти лугулил, кІибибл даражала члентани сегъунти суалтас жавабти лугулил, бурая.

ЦА ЖУРАЛА ЧЛЕНТАР ПРЕДЛОЖЕНИЕ

Предложениелизир чумал подлежащее, сказуемое, объект ва кІибибл даражала членти диэс дирар. Масала: ЧІябарличи Муса, Муъминат, Расул каби-илри.

Иш предложениелизир хІябал подлежащее лер:

Муса, Муъминат, Расул. Илдани чихъали? ибси жаваб лугули саби.

Илини мяхІкамли минтан чебасиб, кецІас цІук удушиб, илис кроватьличи ниъ кадихъиб (И.С.Т.).

Иш предложениелизир ца журала хІябал сказуемое лер: чебасиб, удушиб, кадихъиб. Илдани се бариба? ибси суайс жавабти лугули сари.

Ца суайс жаваб лугути дугъбас ца журала членти или бикІар. Ца журала членти цагъуна ахъдешла тІамаличил дучІути сари.

Минтан – палтарла у.

ХІянчи 286. Текст белчІеная. Ца журала подлежащееби, сказуемоеби, объектуни декІардарая.

I. Ялчнани ярагъла заводра хІябал тукенра тІутІукъякъядариб. Чумал минутли иларад дахъал тупангуни, тупанчаби ва шушкни пяхІли детахъиб. Пунтла бутІакъянчибани уркъли дихулри, чармуни гердирулри, къакъа бицІибти къаркъуби дучили бекІадирулри, баррикадаби дирулри.

В.Гюго.

II. Гебекла хІябал батрак бири, азбар бицІили гамушуни, къули, унци дири. ЦархІилтачил дарх илала дахъал маза дири, хъулри дицІили масани дири. Гебек дебели уктемси адам вири, сунени бекІлил хІянчи хІебири ... Ил адамтала урга кайри ва уктемти гъайли угъи, пІягъикІи, бяхъили сунечила сай гапикІи.

С. ГІябдуллаев.

Пунт – халкъ хІукуматличи къаршили цауркІли дурабухъни.

Баррикада – къакъурбазибси дявилизиб хІярхІубас гъалабиз.

ХІянчи 287. ЧеббелкІеная. Чули сегъуна? ибси суайс жаваб лугути цажурала членти, уди тугъаили, декІардарая.

ДурхІни хъалчирад дашути дяхІила шинни хІябцбарибси гІянжила чІябарличи кабиилри. ВиштІалгъуна, берхІе гъезла вегІ, халати хІулбала вегІ, шел дус сайри виубси; чІукъа – чІукъаси, вайрангти ляжубачилси илала рузи – гехІел дус, халалгъуна – вецІну цара.

ГІАбу-Бакар.

ХІянчи 288. Ца журала членти лерти предложениеби черделкІеная. Илдачи суалти кадатирая.

Бурям гъамбикІулри. Шанти юртанази паргъатбиуб. Урехи гъамбикІухІели, чатІаливан, сари-алав дурхІнира кІапІбуцили, нешли хабурти дурулри.

ГІАбу-Бакар.

ХІянчи 289. Предложениеби черделкІеная. Ца журала членти декІардарая. Илдачи суалти кадатирая.

1. Гъачам, дуцІрумлизиб, савли нушачи чинадрил ца жита бакІиб. 2. ХъайгІиб, гІяйниб сакІубдеш саби. 3. Лагерълизиб пионертас савли, хІерейс ва бархІехъ ванаси беркала луга. 4. Дугели ва хІерели нушала ГІярмия улкала дазуличиб саби. 5. ВанахІели ва бугІярхІели, нушачир машинаби тІашхІедилзан. 6. ЦабехІ хъурали, цабехІ мурдали ГІяякъакъализи дубурланти къалаба-бикиб.

ХІянчи 290. Ца журала членти дакІахъили, «ГІебшни» ибси хабар цахІнабяхъяя.

ЦА ЖУРАЛА ЧЛЕНТАЗИР СОЮЗУНИ ва, -ра, я

Ца журала члентачил предложениелизир имцІали кършидиркур союзуни: ва, -ра, я. Илдани ца журала членти цализи ца дилгъа. Масала: БецІра, гурдара, синкара дугІла жаниварти сари. Неш ва дудеш хІянчиличибад къанни чарбиуб. Азбарлизиб я къял я къача аги, илди дуки ардякъири.

ХІянчи 291. Ишди предложениеби делчІеная. Ца журала членти сегъунти союзуна цализи ца дигъил, бурая.

1. ХІясанра, ХІусенра, ШапигІра школализиб бучІули саби. 2. Алавчарли вацІурби, дубурти ва къадурби дигесли кадизурлири. 3. Гурдара гІярара гъалмагъдикили сари. 4. Нуни ишбархІи я Разият, я ГІябидат, я МикагІил чехІебаира. 5. КІуркІур, дагъа ва къаз хъа арцанти сари.

ХІянчи 292. «ХІеб дакІиб дуцІдикІули» бикІуси назмула ишди тахтаби делчІеная. Гъар тахтализирти ца журала членти белгидарая.

«ХІеб дакІиб дуцІдикІули»

БерхІили гъигъдикІули,
ГІянжили тІемдикІули,
БегІ гъалабси гъаршкадли
ХІеб дакІиб дуцІдикІули.

ГІур атхІеб хІинцІирдухъун
Авлахъла михъирличир,
Дуклума тІинтІидирули
Шиниша мухъиличир...

Ахъти хІярубикадли,
Гъарзал ургубакадли,
Хала хІеркІла къярдкадли,
Закла гъарзадешкадли.

ХІеб сари дуцІдикІули,
ХІеб сар гъалакдикІули,
Гъарзали ванзаличи
ГІямрули гъигъдикІули.

ХІянчи 293. Союз -ва, -ра, -я – личил ца журала членти дакІахъили, кІикІел предложение пикридарая ва делкІеная.

ХІянчи 294. Ишди предложениебазирти объектунни сегъунти союзунани цализи ца дигъил, бурая.

Нуни ПатІиматра, Зугърара, Заремара вацІализи шадиб букира. Дила дудешли тукейзирад жузи, тетрадуни ва къаламти асиб. ГІяяркъянани даг къакъбара гІярара кадушиб.

ХІянчи 295. Ишди предложениебазирти сказуемоеби декІардарая, чучи суалти кадатирая. Бурая, сегъунти союзуна илди цализи ца дигъил.

Мухтар учІулри ва лукІулри. Илли алавчарли хІеръиб ва някъ гъакІбариб.

Аргъ хапли бамкъур ва цІяббиуб. Зубарти гъардикІули сари ва детихъули сари.

ГІямар лехІахъили тІашкайзурлири. Ил-алав Гого, Махулов ва къалмакъарла цархІилти бутІакъянчиби чукурбиублири

(М.Хуршилов).

ХІянчи 296. Предложениеби черделкѣная. Илдазирти ца журала членти белгидарая. Илди сегъунти кѣиби бил даражала члентили диубли да кѣилил, бурая. Цаи бил предложениелизирти кѣи бил даражала членти сегъуна союзли цализи ца дигъил, бурая.

Уктемси, азадси ва халаси дубурла чѣака, марлира, адамла пикри сунечи битѣи кѣуси арцан саби. Хапли окоплизи тѣхѣулхъули сай жагъси, ургабси ахъдешла, сакѣубси гѣулухъа – Батир.

Иличи урчи гъамбирули саби ва дяхѣлизи суркби-кѣули саби.

ГІАбу-Бакар.

ЦА ЖУРАЛА ЧЛЕНТАЧИЛ БАГЪЛАБИРНИЛА ИШАРАБИ

Предложениела ца журала членти цализирад ца запятаяличил декѣардиру.

Союз -ра, -я, я-я-личил дигъунти ца журала членти кѣиличир имѣѣали хѣедиалли, илдала урга запятая кахѣебалта. Масала: 1. Къялра гамушра хъа хѣяйванти сари. 2. Хъулиб дудеш я неш аги. 3. Набчил я Хѣясан я Хѣусен аги. Эгер союз -ра, -я-я-ли дигъунти ца журала членти кѣиличир имѣѣали диалли, илдала урга запятая кабалта. Масала: 1. Жузра, тетрадьра, ручкара белѣудила ваяхѣ сари. 2. Гъачамлис я авлахъ, я ваѣѣа, я дубура шинишбиубли ахѣенри. Ва союзличил ца журала членти да кѣибхѣели, запятая кахѣебалта. Масала: Илар дубурти ва авлахъуни жагали чедиулри.

ХІянчи 297. Предложениеби делчІеная, ца журала члентала урга запятая сен кахІебатурсил, бурая.

Хизри ва МугІид школализиб бучІули саби. МугІидли жузра тетрадьра асиб. Хизрира. МугІидра, Муслимра гІяхІти гьалмагъуни саби. Ил я МугІид я Муслим сунечил агарли тІашхІелзи.

ХІянчи 298. Ишди ца журала членти дакІахъили, предложениеби пикридарая ва делчІеная.

1. Кигъа, кьяца, мукъара.
2. Ручка, кьалам, тетрадь.
3. ДалайбикІулри, тІяхІбикІулри, булхъулри.
4. Авлахъуни, вацІурби, къадурби.
5. Курегала, хурла, гІинцла.
6. Школа, библиотека, клуб.

ХІянчи 299. Союз -ва, -ра, -я - личил ца журала членти дакІахъили, кІи-кІел предложение пикридарая ва делчІеная.

ХІянчи 300. Ишди предложениеби делчІеная ва запятаяби сен кадатуртил, бурая.

Нушала анхълизир бягІлила, кьякянтала ва хъярбала галгуби лер.

БецІра, гурдара, синкара дугІла жаниварти сари.

Нуни ишбархІи я Разият, я Мариям, я Кусум чехІебаира.

Гамушра, кьялра, бугъара хъа хІяйванти сари.

ХІянчи 301. Определениеби ца журала члентили диахъубли, хІябал предложение делчІеная. Илдазир запятаяби сен кадатурлил, бурая.

ХІянчи 302. ХІяжатли биалли, ца журала члентала урга запята-
яра кабалтули, хабарла бутІа чеббелкІеная.

Шагъар шилизиб

ХІердикІехІе, шилизирти хъулрази шагъар бакІилил
ахІенал. ХІера, чирагълизирти набт – илди шагъарлизи-
рад хибти сари.

ХІера, ишди дялчхІядялчути тІалхІяна – илди
шагъарлизир дарибти сари.

ХІера, чайник стакан кичІа чакар – илдира шагъар-
лизирад хибти сари.

ХІера, ишди хІянчила ваяхІ: барда къялкъя гутан
машина ва цархІилти – лерилра илди шагъарлизир
ялчнани дарибти сари.

ДукъяхІелли шила администрациялизи школализи,
чина хІеръахІелра, дургехІе шагъарла секІулти.

Учитель, тухтур агроном – илди шагъарлизибад
бархъибти саби. Шагъарлизирти чедяхІти школабазиб
бучІули саби.

ХІянчи 303. ДекІар-декІарти кІиибил даражала членти (опреде-
лениеби, дополнениеби, аги-къяйдаби) ца журала члентили диахъ-
убли, шел предложение пикридарая ва делкІеная.

ХІянчи 304. Хабар белчІеная. Илизирти ца журала членти бел-
гидарая. Илди предложениела чиди членни диубли дакІилил,бурая.

Багъираби

МицІирси секІал ахІен,
ГъайбикІар ил, адамван,
ХІушази гІякълу буру,
Нешливан, дудешливан.
ГъайбикІуси саби ил,

ГъайбикІахъес багъалли,
Гъарил бархІи сунечил
Гъалмагъдеш цІакъдаралли.
Жаваб: жуз.

Масъулти

1. Азбарлизир тІашдизурли
Кигъмира къузрира лерри;
БукІри чула авал сарри.
ДекІар-декІарли кигъмира
Къузрира илар чум сарри?
2. Чумал эмхІе ва чумал унц
Авлахъличир гІяйдикІулри.
ЛихІби чула – вецІну авра,
Мукукури авал сарри.
Багъира, декІар-декІарли
УмхІи ва унци чум саррил?

Жавабти:

КІел кигъа, кІел къаз.
Шел эмхІе ва кІел унц.

ХІянчи 305. Дурая хІушанира багъираби ва масъулти.

Буралаби:

БугІардешра дягІра – кІелра гъалмагъуни сари. Декабрь
– дуслу ахир саби, декабрь – янила бехІбихъуд саби.

Багъираби:

1. Някъби агара,
Къяшми агара,
Амма някъишбикІес бала. (яни)

2. Янилизиб шадси,
ХІеблизи агалли, бисуси. (дяхІи)

**АВЪИБИЛ КЛАССЛИЗИР ДЕЛЧІУНТИ
ТИКРАРДАРНИ**

ТІинтіти суалти

1. Мезла гІилмула сегъунти бутІни руркъули калунрая хІуша?
2. Гъайла тІамри чиди бутІализир руркъути?
3. Девлизир сегъунти бутІни дирара?
4. Дугъби секъяйда детарути?
5. Мезла гІилмула чиди бутІализир дучІути гъайла бутІни?
6. Существительное или селис бикІара?
7. Сегъуна декІардеш леба хасти ва тІинтіти существительноебала?
8. Существительноела чум жинс лера?
9. Существительноела чум лугІи лера?
10. Прилагательное или селис бикІара?
11. Сегъунти прилагательноеби существительноеличил лугІи хІясибли далдиркура?
12. Сегъунти прилагательноеби жинс хІясибли дарсдикІара, сегъунти дарсхІедикІара?
13. Числительное или селис бикІара?
14. Числительноеби сегъунти къукъначи дуртІули?
15. Сегъунти бяхІла местоимениеби даладая хІушани?
16. Глагол се хІясибли барсбикІара?
17. Глаголла сегъунти замунти лера?
18. Глаголла инкарла приставкаби сен-сен лукІути?
19. Предложение или селис бикІара?
20. МягІна хІясибли предложениеби сегъунти дирара?
21. Илала членти чум къукъяличи дуртІули?
22. БекІ члентази сегъунти, кІиибил даражалайзи сегъунти членти кадурхули?

ХІянчи 306. Существительноелизир ва наречиебазир аслу, ахир, хІячи, суффиксуни чедаахъая.

Дила узи Мурад къараул сай. Узикъар ГІяли виалли дукикъяна сай. Гъанна ил мазаличил хъарахълизив сай. Иллини жура-журала хІянчи дала. Дигалли ил аршикъяна вирар, дигалли – муракъяна.

ХІянчи 307. Пикридухъеная, удирти дугъби села кумекличил детаурлил.

бухес – сабухес	адам – адамдеш
батес – кабатес	гІякълу – гІякълукар
буцес – абуцес	Ахъуша – ахъушан

ХІянчи 308. Мурул, хъунул ва урга жинсла существительноеби даргая ва делкІеная.

1. Гъанбиркуру, бузи, хІед нуша вацІализирли?
2. ДурхІнани рухъна разирарилри. 3. ДуцІли рухІнарухъун Разият хъули. 4. Басир гІелакавхъи сай.
5. ГІяли вахъхІи висулри.

ХІянчи 309. Дахълихъ лугІи акІахъая.

Анхъ, хъали, ши, шагъар, школа, машина, ручка.

ХІянчи 310. Ишди удирти скобкабазир чедаахъибти прилагательноебазирад гъар уличи балбикибси прилагательное декІарбарая.

Къалабаси хІеркІ	байрахъ
.... юрт	бархІи
.... чакар	колхоз

(гІяхІси, ахъси, муриси, ванаси, хІунтІена).

ХІянчи 311. Удир чедаахъбти числительноебазирад гъала-гъала кьадар чебиахъути ца тІайзи, кІинайс гъаб-гІергъидеш чебиахъути цархІил тІайзи черделкІеная.

Ца, хІябъибил, вецІал, вецІну шура ибил, гъал, хІябцІали, шуэсил, урчІемал, гъану шура эсил, хІябцІанну верхІра, даршал, кІидаршъибил, хІябдаршлим ца, шударшлим шуцІали ибил.

ХІянчи 312. ХІябал кьадар числительное дакІахъили ва хІябал гъаб-гІергъидешла числительное дакІахъили, предложениеби делкІеная.

ХІянчи 313. Чузир жинсла гІяламатуни лерти глаголтала уди тугъиули, иш текст чеббелкІеная.

Школала анхъ

Садаиб апрельла ванати бурхІни. Алавчарти мер-муса мицІиркадиубли сари. ХІерикІес дебали иштяхІдухъесли саби. ЦабархІи учительли дурхІни школала участокли-чи арбукиб ва хъарбаиб:

– ДурхІни, иш нушала школала хъу саби, хІера, иш бутІа биалли нушала класслис декІарбарибси саби.

Гъари, бурая хІушани, иша се бегІалли, гІяхІсил.

– Нушала цІудара хъара кІер, дила нешли илдазирад нергъ диру, – рикІули сари Марзият. – Нуни илди лерхис.

ХІянчи 314. Гъаннала, убла ва гІурла заманализир глаголти дакІахъили, кІикІел предложение пикридарая ва делкІеная.

ХІянчи 315. Гъала-гъала бекІ члентазирадцун цаладикибти предложениеби пикридарая. ГІур кІиибил даражала члентира бекІ члентира дарх лерти предложениеби пикридарая ва тетрадунази делкІеная.

ХІянчи 316. Чузир ца журала членти лерти предложениеби пикридарая ва делкІеная.

КЪАНТИДАРИБТИ УМИ ВА ФАМИЛИЯБИ

Ахъ. Ахъ.	– Ахъай Ахъаев
Ю. Х.	– Юсуп Хаппалаев
Ан. Ад.	– Анвар Аджиев
М. XI.	– МяхІяммад ХІямидов
Р.Р.	– Рашид Рашидов
А.Гъ.	– Амир Гъази
А.Къ.	– Амирбек КъадибяхІяммаев
А.П.	– Аминат ГІябдулманапова
Г-Б.Б.	– Газим-Бег БяхІяндов
Р.А.	– Ражаб Адамадзиев
С.Р.	– Сулайбан Рабаданов
П.А.	– ГІяхІмадхан Абу-Бакар
С.М.	– СягІдов МяхІяммад
А.ХІ.	– Аминат ХІяпизова
П.Къ.	– ГІяйша Къурбанова
Х.Ю.	– Хизри Юсупов
М.П.	– МяхІяммадшапигІ ГІисаев
Х.д.	– Халкъла далай
Р.П.	– РажабГІяли ГІямаров
Х.б.	– Халкъла бурала
П.С.	– ГІябдулвагъаб Сулайбанов
Ш.М.	– Шагъемир Мурадов
М-д.Р.	– МяхІяммад-Расул
И.ХІ.	– Ильяс ХІясанов
М.А.	– МяхІяммад Абакаров
Ф.П.	– Фазу ГІялиева
Р.ХІ.	– Расул ХІямзатов
ХІ.П.	– ХІябиб ГІялиев
Б.С.	– Байрам Салимов
Ш.Гъ.	– Шамил Гъазиев
П.Ж.	– ГІяхІмад Жачаев
Н.Ю.	– Нурутдин Юсупов
ХІ.З.	– ХІяжи Залов
М.Гъ.	– Машидат Гъаирбекова
ХІ.Ц.	– ХІямзат ЦІадаса
З.Х.	– Зугъра Ханум
Д.П.	– Дагълар ГІябдуллаев
М.-З.А.	– МяхІяммад-Загъид Аминов
Х.х.	– Халкъла хабар
А.К.	– Анварбек Култаев
ХІ.Къ.	– ХІябиб Къурбанов
Къ.М.	– Къияс Магомедов.

ЖУЗЛИЗИР ЛЕР

ДелчІунти тикрардарни	3
ТІамри ва хІурпри. БиркІан.	3
Дев. Девла цахІнабик	8
Гъайла бутІни. Существительное	11
Существительноела жинс	13
Хасті ва тІинтІти существительноеби	14
Существительноела лугІи	16
Существительноела падежуни	17
Уйхъу падеж	19
Актив падеж	21
Хас падеж	23
Лугу падеж	24
Барх падеж	26
Гъалабихъ падеж	27
Сабаб падеж	29
Мер падежуни	30
Существительноеби падежунардириила хасдешуни	32
Прилагательное	37
Прилагательноела лугІи	41
Прилагательноела жинс	42
Прилагательноела падежуни	45
Таманти ва таманахІенти прилагательноеби	45
Числительное	46
Цалабикни хІясибли числительноела жураби	48
Иргъахъуси мягІна хІясибли числительноеби чумал журала	49
Числительноеби падежунардири	49
Местоимение	50
Местоимениела жураби	52
Местоимениеби жинс ва лугІи хІясибли дарсдикІни	53
Местоимениеби падежунардири	54
Глагол	57
Глаголла белгиагар форма	60
Пайдалати насихІатуни	63
Глагол замунти хІясибли барсбикІни	65

Глаголла гъаннала замана	68
Гъаннала заманала глаголтачила белчІунси даимбарни	70
Глаголла убла замана	73
Глаголла гІурла замана	77
ГІурла заманала глаголтачила	79
БелчІунси даимбарни	79
Глаголла хІябалра замана	81
Глагол бяхІяни хІясибли барсбикІни	83
Глаголла бяхІла ахирти	85
Глагол существительноеличил лугІилизиб балбиркни	88
Глаголлизир инкарла приставкаби	90
Глагол тикрарбарни	92
Предложение	94
Предложениела мягІна хІясибли жураби	100
Предложениела бекІ членти	110
Предложениела кІиибил даражала членти	117
Дополнение	119
Определение	122
Аги-къяйда	126
Ца журала члентар предложение	129
Ца журала члентазир союзуни ва, -ра, я	132
Ца журала члентачил багълабирнила ишараби	134
Авъибил класслизир делчІунти тикрардарни	138
КъантІдарибти уми ва фамилияби	141

**Ахмедов Ибрагим Омарович
Сулейманов Алибек Алибекович**

ДАРГИНСКИЙ ЯЗЫК

Учебник для 4 класса

**Редактор К. Миграбов
Художественный редактор М. Насруллаева
Технический редактор А. Курбанов
Компьютерная верстка Ю. Гусейнова**

**Сдано в набор 25.04.07.
Подписано в печать 03.05.07.
Формат 70х90 ¹/₁₆. Бумага офсетная № 1.
Гарнитура «School Book». Печать офсетная.
Усл.п.л. 10,53. Уч.-изд.л. 5,03.
Тираж 10000 экз. Заказ № 174.**

**ООО «Лотос»
367025, РД, Махачкала, ул. Пушкина, 6.**

Предложение

Предложениела жураби

хабарла, суалла, вявла.

Дудеш вакІиб.

Дудеш вакІибу?

Дунъяличиб даршудеш чедибикиб!

I. Предложениела ирниличилси разборла гІибрат

Нешли базарличиб наб жагаси
кІана асиб.

Иш предложение хабарла саби.
Предложениела бекІ членти лер:

Нешли (подлежащее), асиб (сказуемое)
кІана (объект).

Предложениела кІибиб даражала члентира лер:

(чинад?) базарличибад (аги-къяйда), (чис?)
наб (дополнение), (сегъуна?) жагаси
(определение).

II. Предложениела белкІла разборла гІибрат.

Нешли базарличиб наб жагаси кІана асиб.

Глагол

Глаголла жинс

вакІиб

ракІиб

бакІиб

Глаголла замунти

батур

балтули сай

балта

Глагол бяхІянарбирни

балас	} гІур. зам.	балулра	} гъан. зам.	багъурра	} убла зам.
балад		балулри		багъурри	
бала		балули сай		багъур	

Глаголла лугІи

цал	дахъ
учІули сай	– бучІули саби
ручІули сари	– бучІули саби
арцурли саби	– арцурли сари
куртІикІули саби	– куртІидикІули сари

Инкарла приставкаби

хІе, хІя, ма

хІеракІиб

хІякъян

макъяд, мабирид



ДАРГИНСКИЙ ЯЗЫК



“ЛОПОС”